

84 (2Рос = Коми)
0-42

Алексей ОДИНЦОВ

ПАРМА- МАМЛОН ПНЯН



44-89-08

КОНТРОЛЬНЫЙ ЛИСТОК
СРОКОВ ВОЗВРАТА
КНИГА ДОЛЖНА БЫТЬ
ВОЗВРАЩЕНА НЕ ПОЗЖЕ
УКАЗАННОГО ЗДЕСЬ СРОКА
Колич. пред. выдач.


11/08/89





Мамõс, Любовь Ивановнаõс,— Ен му улын
сылы Югыдін да Шоныдін — бурõн казтылõмõн,
Раиса Серафимовна чойлы Шондга Му вылас
кузь нэм да бур шуг сьõлõмсянь сиа.

Алексей Одинцов (Митерас Өльш)





АЛЕКСЕЙ ОДИНЦОВ

ПАРМА -
МАМЛОН
ПНЯН

челядьлы вөр-ва йылысь висътъяс



СЫКТЫВКАР
КОМИ КНИЖНОЙ ИЗДАТЕЛЬСТВО
1997

Серпасалис **Е. В. Сухарева**

Одинцов А. С.

0 42 Парма-мамлӧн пиян: Висьгъяс.— Сыктывкар:
Коми книжнӧй издательство, 1997.— 136 л. б.

ISBN 5-7555-0594-2

Муса челядь! Коми пармашӧрса сикгъясын да грездь-
ясын бидмысь нывкаяс да зонкаяс!

Парма-мамыслӧн му пуксьӧмсяньыс вӧлі и лоӧ пыр ӧти
ыджыд мог — пӧттӧдзыс вердны сэні олысь став зверь-
пӧткасӧ, чӧсмӧдлыны тиянӧс, челядь, быдтыны став войты-
рыслы содтӧд сёян. Пармаыс, сідзкӧ, быдӧнлы: зверь-пӧтка-
лы и йӧзлы — ставыслы лоӧ мамӧн, вӧсьса сьӧлӧмӧн кӧ
найӧ вольвлӧны сылӧн чинлытӧм-бырлытӧм озырлуна
жытник йӧртӧдъясӧ. Та йылысь и муӧ сёрни Алексей Один-
цовлӧн «Парма-мамлӧн пиян» нима выль книгаын.

84.2 Рос—Коми

0 4803310100 — 030 1 — 97 м
М 128 (03) — 96

БУРДӖДЫСЬ ДЗОРИДЗЬЯС



алендарь вылын июль. Тӧлысь сайӧнин кӧзяитӧ гожӧм, а пызан вылын эз на вежсьыв сӕян-юан. Боръяс вылын пидзӧсӧдз турун, а вӧрын — тшакни вотӧс. Дзоридзалӧ на пув. Важӧнин гӧрддзасьӧма, но вотӧм на чӧд.

Весиг Катыд шорсайса Нӧвина вылын абу на кисьмӧма оз — зонпоснилӧн медся радейтана вотӧс.

Гожӧмыс кызкӧ аслысногӧн, тӧдлытӧг пуксьыліс купальнича лун бӧрын. Сэтчӧдз мамъяс эз тшӧктивлыны чегъявны корӧсь, ытшкыны боръясысь турун. Курыдӧсь на пӧ кӧзаяслы бадь да пипу коръяс, сира, оз туйны пывсян корӧсь вылӧ кыз росъяс. А турунъяслӧн эз на во кӧйдысыс. А водз кӧ тшукӧдан боръясӧ да ичӧтик вӧрса видзьясӧ коса, косьмӧм бӧрас турунысь оз усь кӧйдысыс. А таdzi видзьясӧн вӧдитчӧмысь найӧ регыд изӧрмасны. Медым куран пиньяс улысь быд гожӧм чукӧрмис скӧтлы унджык кӧрым, дерт, та вӧсна мамъяс эз сетлыны вӧля аспом скӧтлы водз дасьтыны турун.

Купальнича лун вӧлі праздник кодьӧн. Но пуксьыліс сийӧ кызкӧ тӧдлытӧг, кольіс лӧня, кыз шуласны, суртӧгвинатӧг, пызан чегмӧн сӕян дасьтытӧг.

Мам чеччывліс шондӧкӧд тшӧтш. Вӧсньӧдліс нянь пӧв вылӧ тӧрмӧн шаньга куяс. Миян, дерт, оз жӧ узьсьы. Чӧла кыйкъялам пӧлать юрводзсянь — дульваным петӧ. Удайтчас чӧсмасьштны ӧдъя пач под вылын пӧжалӧм банйӧм картофеля шаньгаясӧн. Ок и чӧскыд! Нылыштигас куньсьылӧны синъяс.

Лун шөр бөрын, кор шондіс бергөдчө нин рытыв-
вылө, грездын заводитоны тшынасьны витнан пывсяныс.
Сэк кості ми, зонпосни, семьяын быдөнлы морт өтиөн
вөчалам купальнича корөсьяс.

Рытгорув, кор шонді кутас воны вөртас весьтө, пыв-
сянъяс лооны дасьось. Гөрдөдз доналөм из гор вылө көш
джын и койыштан, а кос жарыс сідзи и чишкалө пельяс.

Пывсянын ымралө чөскыд купальнича көр. Лолыштан,
тырлөны сійөн тыяс, кыптылө морөс. Дыр оз вун татшөм
пывсяныс.

Тулыс. Ыбъяс да эрдъяс сөмын на шыбитісны ас выв-
сьяс еджыд эшкынсө, бузгөны берегъяссьяс петөм ичө-
тик шоръяс, gryмакылөны Шожымка ю кузя кылалысь
гырысь йиас, а ми, зонкаяс, корсям нин купайтчан места.
Тулыснад, майбыр, лым ваыд быд гөптын тырыс. Мукөд-
лаас лоө весиг голяөдз.

Пөрччысян — ваө буз. Ыззям-купайтчам. Веськодъ тай,
көть көдзыд ваысь топавлөны сөнгъяс, ыркмунө сьөлөм.
Өта-мөд водзын петкөдлам збойлун, вартчан сям. Быдөн
крепитчөны, көсийөны овны ваын медбөрөдз — петны
вермысьөн.

Өтчыд татшөм купайтчөм бөрас ме чорыда висьми.
Вежон чөж тупляси вольпась вылын. Сэссия жарыс ли-
чаліс, но висьмис кучик. Мышку пасьта кисьтіс пупыш,
петалісны чирейяс, воссялісны дойяс. Узьөм ни олөм.

Мам мавтліс мышкуөс быдсяма мазьяснас. Эз отсав
весиг орчча сиктса вөралысьөн вайөм ош гос. Дыр май-
шаси тайө висьөмнас...

Воис купальнича лун. Рытнас медся водз лэчөдісны
менө пывсянө да купальничаөн швачөдісны-корөсялісны,
гашкө, час.

Сійө войсө узи садьмывтөг. А лун-мөд мысти мыш-
кысь бырисны мыльяс, косьмисны дойяс, бурдіс кучик.

Колисны вояс. Оз быд гожөм өні удайтчывлы пывсьы-
ны купальничаа корөсьөн. Но тайө войвывса шонді югөръ-

яс рёма мича дзоридзьясылён бурдодысь, дзоньвидзалун сетысь выныс вёлёма помтём. Кынмавла, кётасьла арьясын вотчиг-вөралігьясё, но оз кёлась некутшём прёстуда. Збыль, тыдалё, шулёмаоьсь пöчьяс: «Купальнича, чизыр вой тёлысь повтөг, чукөртö вынъяссö сөстём сынöда ыбъяс вылысь, а сылён дзоридзьясыс босьтöны мичлунсö войвывса яръюгыд шонділысь».

Тайö, төдöмысь, сідзи и эм. Öд купальнича коръяссьö, кутö туны-быдмыны, кор муртса на сылыштём лым. Оз пов, майбыр, көдзидсьыс. Со и бурдöдö быдсяма пөлос прёстуда висьöмъяссö.

ВӨРСА КАНЬ



ти пöрао мян некыдз эз ов-модчы кань. Быдтам ичотсянь-ыс, лелькуйтам. Верстяммас, сöмын на заводитас кыйны шыръясöс, мыйыськö висьмö да кулö.

Тьоткалысь, кор сийöс тöлын ыстылісны колхозсянь лэдзны сортовка, кык ыджыд кань вайöдлім. Помыс öти. Сöмын йöртлім гөбөчö — висьмисны.

Воссьыліс, чайта, тайö кадас шыръяслы да крысаяслы праздник, ыджыд пир. Йирöны кышöдзыс картофель, джынъявлöны галанкаяс, пежösьтöны йöв тыра кринчаяс. Гөбөчын эг кутöй лысьтны видзны нянь. Сөйöны, пышйöдлöны, эз этшаысь кольлыны тшыгйөн.

Веськыд мат лоис весиг скötлы. Мам лэччöдас налы гидö ведра помöй — удзöдöны. Мös ныр улысь пышйöдлöны медся чöскыдторъяссö. Наянösь. Оз, небось, повны весиг кöлач кодь крукыля сюръяса люкасысь межысь. Веськыда сакасьöны нырас, вöтлöны вор дінсьыс. Ыжъяс омöльтчисны, лыясыс кучик улас гольвидзöны.

Дивö босьтö — мегарин гожöмын мянлы, зонпоснилы, туй оз сет, люкавны кыйöдö, а картаын полö весиг крысаясысь, сетö удзöдны асьсö, ыжъясöс. Мамö лэччöдас скötлы помöй, а ме, кок улöдз пася, кыйöдча лясни розьöд, повзьöдла крысаясöс. Пельöсса розысь петас öти, дзык кань ыджда, да кок шыён локтö вор дінö. Мös чушгьялö, а ыжъяс — сюв-сяв гузьмунöны стен боклань. Кышнит-

ла — ыжгъяс повзёны, а крысаяслы веськодъ. Немтор по миянкод, этатшом тэрыб кокаяскод, тэ он воч.

Яндысьтом сингъяс. Пуктавлі налькгъяс, капкангъяс — эз отсав. Гашкё, кылёны капкангъяссыс сім дуксё, казялёны дзеваса налькгъяс.

Отчид тадзи дыркодь кыйкгъялі. «Вугырөн, ичотик гостор самаломён, гашкё, видлыны кыйсьыны?» — мовпала.

Друг пемыд пельёссиянь вор дінё ньов моз визьнитіс ичотик зверь. Лым еджид. Сёмын сингъясыс, быттьо кыкдрёб тусь, сьодось. Сійё варс курчис сьылёдыс медся ыджид крысасё да петалан розьёдыс пыртіс сійёс гид джодж улё.

— Кутшом повтом, пельк да вына аддзывлытом на зверь! — висьталі сы йылысь мамы.

— Но-о, пармаса кань, сідзкё, локтома, — нюмдіс сійё. — Ласича тайё. Пармаысь, тыдалё, бырёма кёрымыс, воис кё гидё. Медгъя, медгъя! Тэ, пиё, эн повзёд сійёс. Капкангъястё, налькгъястё босьтав, мед котъ кыйсигас оз жёшед сэтчё.

Помойтё скотлы ог на вёлі вермы лэччодлыны, но сы пыдди луннас скотос куті сёодны, гашкё, дасысь. Мед сёмын ылёдлыны крысаясёс, сетны ласичалы кыйсян кад. И аддзывлі од! Уна крысаос кутіс менам сингъяс водзын тайё пельк зверыс.

«Вот эськё поздысяс кё миян гидё ласичаыс?» — юрё воывліс завидьтана мовп. Гусьон куті петкодлыны да шыблавны гид джоджё, пельёсьясас ичотик яй торгъяс. Но ласича эз ыштыв на вылё. Кыйсис ачыс.

«Со од ещё кутшом тшап, — быттьо лөгасьла ме, кор еджид пася зверь юрсё лэдзлытөг котраліс яй торгъяс дінті. — Пуктё пыдди сёмын асьыс кыйдёссё».

Вежон-мод мысти ласича кытчөкө муніс. Немтор, тыдалё, лои сылы вочны миянын.

Еджид зверос асланыс гідгъясысь бёрынджык аддзывлёмаось и суседгъяс. Сідзкё, сійё төвсё кыйсис и мукод

ордын, грездын вайис пöльза быдöнлы, мездіс войтырсö шыръясысь, крысаясысь.

Вöрти мунігөн кө öні аддза ласичалысь кок туйяссö, бур кывійөн казытышта еджыд пася ичöтик, пельк зверös да сетча боквыв. Мед ветлöдлö аслас туйöд, корсьö кынöмпöt, бырöдö шыръясös.

ПАРМА-МАМЛӨН ПИЯН



армашөрса мыльк вылө пуксьём Митерас грездын чужлөм ныв-зонмөс, миянөс, вөр-ваыс и быдтис-вердіс. Водз тулыссянь да сёр арөдз туйсъясөн, тасьтїясөн, падъянъясөн, пестеръясөн ваялім ми, челядь, тайө чинлытөм-бырлытөм йөртөдсыс козинъяссө и пыр сейны, и төв кежлө. Кисьмөм мырпомнас, ознас-чөднас, гырысь сьөдгөрд пувнас асьным вөлі пөттөдз чөсмалям и гортө рыт кежлас ваям — мамъяслы гөснеч.

Сөмын на сылас өшинь увъясысь лым, петам мачасьны, а Венялөн бабыс, Матрен пөч, чуксалө нин гортас внук-внучкаяссө, миянөс тшөтш кесйөдлө.

— Агтө, кутшөм юмов да көра өні ярьюгыд тувсов шонді улас пөжсьөм кыдзясас зараваыс! — небыд гөлөсөн мургө Матрен баб.— Босьталөй сямөд чуманъяс, нөшта кодлөн кутшөм дозьяс эмөсь, да ветлөй жө, пармалөн пиян, пукталөй найөс кыдзяс улас. Паренча ва кодь өні зараваыс. Некор ворснытө, заптөй Енмөн сетөм юанторсө и гожөм кежлө, чөскыд ырош вылө.

Мөдысь тшөктөм-чуксалөм оз ков, здукөн чукөртам нопьясө кодлөн кутшөм дозмукьяс эм и котөртам яг вылын быдмысь пашкыр увъяса-вожъяса кыдзяс дорө вийөдчыны.

Потө коръя пуяс вылысь гар, дугдас виявны кыдзясысь зарава, а Парма-мамлөн миянлы выль пөлөс чөсмантор нин дасьтөма — коляоз. И юмов жө, и чөскыд окотасьыд, вазгө пиньяс улад.

Сөрмас, кышйысьны кутас коляоз, а яг вылын баранин вьл пёлс сёян дась — пожом ли.

— Ти, парма пиян, ягас пыранныд да пожомьяссё эн путьтөг-тёлктөг тшытшлөй-тшыкөдлөй, — велөдө Матрен баб. — Лиасьөй пес керас местаысь. Косьмасны пуясыс — төв кезлө жар пес. Сөмын гунньөдлы пельпом вылад, матисьыд весиг вөв оз ков.

Медводдза гобъяслысь петан кадсё Матрен баб жө казялө.

— Тэ, Пашө, пывсян саяд раскас, буди, он и пыравлы. Тöрыт меным сэтысь кык көчгоб дай гөрд гоб на сюри. Ветлөй, челядь котыр, Пронь нөвина вылө, кытшовтөй расъяссө, вөр дортис гөгөртөй и көдза муяс. Сэни, дертнин, петалис тшакыс.

Медводдза тшак нимкодълунсө вотчысьлы вайө вöра-лысьлы прөмысыс моз жө. Пызан вылө мам пуктас руалысь, чөскыд, нөкъя тшака шыд. Мый вермас лоны сыысь көрадзыкыс? Нинөм сэтшөм чөскыдсө сэсся войнабөрся медводдза воясас эг сөйлөй. Чөскыд тшака шыдыс, а гобъясыс кө унджык шедөны, и жаритны на вичмас. Мөс выйөн жаритөм уртшак сора гоб, позьө шуны, праздник лунся сёян. Сийөс он өткодяв голя вылад пуксысьсө көктоина рачкөд.

Гожом пуксьөм бөрын Парма-мамыс кутшөм сёян лыдлы колө, сэтшөмөс и дасьтөма. Сөмын вотчы, эн дышөдчы. Но дышөдчысьыс, быттё, челядь котырын, миян пөвстын, эз вөвны. Весиг Модялөн сизим арөса Валечкаыс, ичөтик сямөд падъяна, миянкөд тшөтш жө ветлөдлө да сюсь синъяснас и тшаксө өдйө аддзалө, и чөдсө-озсө тэрыб кияснас пөшти чой-вокыс мында жө вотө. Сэсся дышөдчынысө и Матрен баб эз лэдзлы.

Оз-чөд, мырпом либө пув воөма — ворсны оз сет.

— Мачасьөмнад, челядь, кынөмныд оз пөт, ветлөй, бурджык, Шор сайө, сотчөм вылө, озла. Ок и чөскыда сёяныд рытнас мөс вөра йөлөн! — ышөдө Венялөн бабыс.

Огджык кө пыр дугдөй ворсөмысь, Матрен баб чегыштас пурыйсь потшөс бокысь петшөр да миянлань кутас локны, но оз быдөнөс, а Веня внуксө өтнассө, быттьө, видө.

— Веняө, кывзысьтөм пиө, волю жө, волю, петшөра-лышта, гачтө лэдзөмөн, пукалан местатө! — грөз вылө Матрен баб тадзсө вөчө-сёрнитө. Но некор некодөс эз петшөравлы. А ми та йылысь, дерт, төдөм да мода вылас сөмын, сералігтыр, пөчысь пышгялам, но ворсөмысь лоө дугдыны.

Мыйкө быдмөма, кисьмөма пармаын — Матрен баб пыр и чуйдас-мөдөдас грездса челядь котырөс вотчыны, но эз жө көйы, мед кодкө миян пиысь быдмис кын сьөлөмаөн, вөр-ва куштысьөн. Пөрысьмис нин ёна мортыс, а водзаджык воясас грездгөгөрсса маті вөръясас миянкөд на ветлас вөлі. И оз вуззысь медся чөдья-пувья вутш вылас, а видзөдө, коді кызди вотчө, велөдө миянөс вотчынысө, а корсюрө и өлөдас.

— Кын бокасө, кисьмытөмсө эн вот, медым рос вылас кольө. Тысь кындзи унаөн на тані вотчынысө мөдасны... Налы колө жө кольыштны, — коркө меным тадзи шулывліс, аддзис дозйысь турунвиж чөд тусьяс да.

— Шожым-айкинасаяс тані оз вотчывны, — шуа, — найө ылөджык, Шожымкалань, Ю-Яглань, вотөсаинөджык му-нөны.

— Мыйла нө шожым-айкинасаяс, ог на йылысь баит. Татчөс олысьяс йывсьыс висьтала, Пармалөн пиян йылысь — сьөла-тар, көч и руч, посни лэбач-сильөыс вөрас кымын пөлөс олөны... И ставыслөн медпервой сёяныс — вотөс, небыд турун, кольяс. Көть и ручыслы, мед көть сійө и зэв тэрыб, и мудер, но яя пызан вылыс гежөда жө вичмылө. Быд ловья лов аслысногөн сюсь, кужө дзевсьыны и пышйыны. А вотөсыд со кок улас... Парма-мамыслөн му пуксьөмсянныс ыджыд мог — пөттөдзыс вердны став зверь-пөткасө, тиянөс, посни войтырөс, чөсмөддыны, став

му выв йӧзыслы содтӧд сѣян быдтыны. Сійӧ, сідзкӧ, быд-
ӧнлы: и зверь-пӧткалы и мортлы мам — ставлы, коді в осьса
сьӧлӧмӧн волевлӧ сьлӧн йӧртӧдӧ.

Велӧдӧ тадзи вотчигӧн миянӧс Матрен баб, вежӧр содтӧ
и асьсыс на кодкӧ вӧсна тӧждлунсӧ петкӧдлас.

— У-у, но мокойӧ! Пестерсӧ некод эг босьтӧй, а со
кутшӧм мича гоб мырбокса нитш вылас быдмӧма... Но,
инӧ, мед, урлы шуд вылӧ! — чегас пӧч тшак юрсӧ да
сатшкас сійӧс юр весьт вылнаас козлӧн кос увйӧ.—
Косьмас тані тшакыс шонді водзас да ур сійӧс и меститас
аслас тӧвса жытникас. Коз да пожӧм коль кӧйдысыс урь-
яслы эськӧ и нура, пӧтӧса — медпервой сѣян, но вом кӧрсӧ
вежлыны и тшак тшӧтш вотӧ да косьтӧ, а сѣсса и дзѣбас
кытчӧкӧ гырка пу горсйӧ.

Матрен баблыс велӧдӧмсӧ тӧд вылын кутӧмӧн ми не-
кор эг и куштылӧй чӧдъя-пувъя вутш либӧ эрд. Мый-
такӧ, медгырысь тусьяса розъяссӧ кипыралам и водзӧ
сетчам. И олісны зверь-пӧткаыс, и посни лӧбачьясыс сь-
лісны-дзользисны, вердчисны Митерас гӧгӧрса веж пар-
маын, быдтысисны. Пета вӧлі тулыснас водз асылын
кильчӧ вылӧ — вӧрыс сӧмын и шыалӧ: «Кур-р-р, кур-р-
р! Чу-фш-ш! чу-фш-ш!» — койтӧны таръяс градъяс по-
мын быдмысь кыдзяс вылын, и сэтшӧм ӧд матынӧсь.

«Пи-и, пи-и, пип-пи-пи-пи!» — пывсян сайын пи-
пуа-кыддза раскас чипсӧ ай сьӧла. Бокинджык сылы
шыалӧны воча мӧд дай коймӧд. Койтӧны пӧткаяс, сем-
йитчӧны.

Ур кок туйяс керка дінті крестасьлӧмаӧсь. Урьяс бӧрся
и сьӧдбӧж волевлӧма. Сійӧ повтӧмджык, да гидті и жыт-
никті ветлӧдлӧма. Меным, дерт, нимкодъ: кӧть пов-
зӧддыштӧс-куталіс сэтысь шыръяссӧ. Вӧрыс матын да
кӧчьясыс сійӧ воясас градъяс вылысь лымсӧ челядлы
лыбмӧн подмӧдӧмаӧсь. Весиг ручильӧйлысь кок туйяссӧ
тӧвнас унаысь аддзывлі, кӧть кынӧмпӧтыс сылы грездын
ӧдвакӧ сюрліс, но кутшӧмкӧ надея юрас кутӧмӧн со во-
ывліс жӧ пушкыр бӧжаыс.

Тувсов войясын Веня друглөн Альчик понйислы спокой эз сюрлы. Пармаыс миян ошгьяса. Петасны найо гусыныс, кор лым ваыс боксө кётодны кутас, да грезд гөгөр и шөйтөны. Став кодзувкоткаргьяссө пузувтасныгаргьясны, кодзувкотгьяссө сэтись нюлөны. Йөр помгьясыс став эжасө ошпияныс бергөдласны — номыргьясөн чөсмасьөны, а лайка-понйыд өд та вылө скөрмытөг оз ов — войбыд, асгья кыаөдз увтас, узыны весиг, кытчөдз эг велав увтөм шыас, эз сет. Ошгьяс динө Альчик өтнасөн матыстчыны оз лысыт, а пармаса көзиянлы ылісянь увтөдөмыс веськодь жө дай. Со и вөчөны ассыныс ош уджсө повтөг, войбыд. Тулысбыднас, кытчөдз небыд шыранькытш да бобөнянь оз кут быдмыны, ошгьяс скөтлысь пөскөтинаяссө дзыкөдз тшыкөдлісны, став грездөн ковмывліс петавны прөстджык кадө эжасө бөр местаас пуктавны. Но грездса войтырлы звергьяс шог эз вөчлыны — эз косявлыны ни өти мөскөс, куканьөс ни ыжөс.

Войнабөрся медводдза воясас, вөралысыясыс весиг Шожым-Айкинаас кык-куим морт сөмын вөліны, ёна и рөдмылісны зверь-пөткаыс. Миян грездын сөмын Опонь дед вөраліс, да сы помысь пармасыс ловгья лолыс эз жө чин.

Өтчыд, аргьявыв, рытнас пыри гортө бурпөт ворсөмачасьөм бөрын. Видзөда: мамө пызандорса лабич вылын пукалө да сьөла куштө. Сы дінын кань нявзө, лапасө нюжөдлө, яйсө самыштны көсйө.

— Но-о! Митерас пыр пищаля дядьө эз прөйдитлы, Опонь дед Веня внукуслы сямөдысь пестер кыө, вөрас эз ветлы... Коді нө нин миян прөмышленникыс? — юала.— Эн-ө кураннад пывсян сай вөрсыс кут? Олөны сэні сьөла-сыс, жбыркнитлывлісны вотчигөн.

— Сэтись, буди, и кыйөма со Муркаыд, прөмышленникыс... Но, но, сета, сета сювгьяссө да юр-кокгьяссө,— каньлысь паськөдөм гыжгьяса лапасө вештыштіс сьөла дорсыс мам.— Нөрөвитыштлы... Сөмын удиті лысытысьны,

керкао пырны, кыла: посводзын мыйкё шпорёдчыны кутіс. Восьті өдзёс — керкао Мурка скок чеччыштіс. Кыйдөсыс и мыні вомсьыс да — өшиньянь... Тачмуні стеклөас да и ньөмдіс, лигышмуні сэтчө.

Мыйся пөтка нин, мися, тэ вайин? — юала каньлысь. Босьті, видзөда — сьөла вөлөма... Абу өд и виөма, дойдалөма ёна, со нө пинь туйясыс, но писө велөдөм могысь ловйөн вайис.

Тайө кадсянныс колис нелямын сайө во. Митерас гөгөрсә вөр туис-быдмис, шогмыны кутіс стрөйбаяс вылө. И локтісны черьяса, мотора пилаяса йөз да өти воөн и пөрөдісны мича козья-пожөма ягсө, посни понөльяссө тракторьясөн нырисны. Вына машинаяс сарпалісны-гарйисны көрт гусеницяяснаныс вотөса кустьяссө, налысь вужьяссө, гөрисны-пуккылялісны подув нитшсө — ас бөрсяыс прөйдитны позьтөм нөвина колисны. Кытчө он видзөдлы — быдлаын гудыр, тыассьөм-нюйтсьөм, быгсялөм ваа гуран да гөп, чагйөдз, лөп-өгөдз чегьялөм-варкөдөм керьяс, пу йивьяс. И ставыс сісьмө, гөгөр вөрыс дуксьөма.

Быри тшак-вотөс, а сыкөд тшөтш и — став ловья лолыс. Парма-мамыс кулі тані, а сідзкө, и сылөн пияныслы нем лои вөчны, лэбисны-пышйисны найө сэтысь. И грездыс тшөтш быри, энөвтисны йөзыс тайө урөстөм места-яссө. Ни вотчысьөс, ни вөралысьөс сэтысь он аддзыв. А төвнас, коркө лызьөн ковмыліс вомөнтлыны да, мед көть кутшөмкө кок туй аддзылі? Эг өд! И шөгө уси: «Сөмын кө ас кежад, войыввса вөр-ваөй, кутан бурдөдны тайө дойяссө, кыксө да весиг унджык во ковмас. Тшак-вотөсыс, дерт, регыдджык кутас быдмыны, а кор на корья вөр местаас коз-пожөмьясыс кутас бөр быдмыны? А ловья ловьясыс — зверь-пөткаыс? Найө өд абу нитш, абу пув-чөд кустьяс, ай-мамтөгыс оз чужны? Из сайысь, саридз сайысь оз локны ни, матігөгөрас кө оз жө коль? Сідзкө, асланым вөр-ваын жө мед эськө налөн и гөлөсныс да борд шыыс көть нин гежөдика кылыштавліс».

МОДЯЛӨН КӨЧ



ожом пом. Пув вотан кад. Вөр пытшкө ылаалом ичотик грездад, коть кодарө сетчы, быдлаын падъяныд тырө, но ми, челядь котыр, медвойдөр уськөдчылім Гумладор ягө. Тайө вөлі пожома-кыддза ыджыд-

кодь вөр ді. Öтар-мөдарас — муяс. Яг шөртгыс визувтө көдзыд, зэв сөдз ваа ичотик шор. Сылөн берегыяс крутось, джуджыдось. Увтасын быдмысь нэмөвөйся козпожөмгыяслөн тугангыс вылас кө видзөдлан кыркөтш вывсаныс, юртө на лоө копыртыштны. Сы джуджда берегыс.

Матын вотчан местаным, йөр пытшкын и эм, но өткөн-өткөн сэтчө эг ветывлөй. Став посни ныв-зонкасө чукөртама. Көкъямысөн, өкмысөн мунам. Гажа. Босьтывлім аскөдным и креста волыса гача-сарапана войтырөс, ичөтджык чой-вокнымөс. Öд найө, коть миян серти этшаджык, но сөйөны жө. Сідзкө, и мед тшөтш вотчөны. Дозмукьяссө налы, дерт, ичөтджыкөс жө сетывлім.

Вотчөны тусь-нывгыс да сөшайгыс, оз дышөдчыны. Медводдза тусьсө көрзинаө пуктігөн, кызди Матрен баб велөдліс, шуасны на: «Дозлы тылны да не төлны!» Тайө кывгыссө кө пө шуан, дозгыд быть тырас. И тырывліс. А тыра дознад локны любө быдөнлы.

Зілісны ставөн. Чукөраинсьыд ичөтджыкгыс коді пуксөн, коді водөмөн пувсө өктө-варшалө. И асьнысө оз

удзодны: китыр — вомас, кык китыр — дозьяс. Кисьмём гырысь сьодгөрд пувйыд өд ок чөскыд!

Ягсө «джынъялөм» бөрын сэтчө некымынысь на ветывлаам, а вотосыс этшаммас да кытыськө, матысь жө, уна вотоса мөд места корсям.

Гырысьяс мянөс эз пайклыны. Налы вотчынысө некор, а сюрлө кө здук, ылөджык ветласны. Челядьлөн вотчаніө эз пырлыны. Мед нин, көнкө, шуасны, матысьсө челядь вотчөны.

Сійө воясас грездаяс пөвстысь быдөн уна картопель пуктивлісны. Арнас гөбөчаныс төрмөн. А сыысь кыңзи ещө галанка, кушман, сёркни да капуста на вөдитлісны. Уна град выв пуктас чукөрмывлө, но изсьө тай во чөжнад. Мөсьяслы — корсө, аслыным — нурсө... Ставыс сөйсө, нинөм оз шыбитсы. Арын — мамьяслөн ыджыд төжд: кытчө воштыны, бурджыка меститны ыджыд урожайсө? Ичөт, төвъян вежөсувса гөбөчө ставыс оз төр. Со и кодьявлөмаось ывла гуяс. Гумладорса яг вылө, нөрыс йылас. Оз кынмы сәні, ни ва оз босьт. Тулыснас, пуктысьны көйдыс торйөдөм бөрын, картопельсө сэтысь лэптылісны, вайлісны тыртөммөм гөбөчө. А гусө восьсөн кольлісны. Косьтыштасны-төлөдыштасны. Розь весьтсө пасьясны бипурөн сувтөдөм лэбын кодь вожа майөгьясөн и — ставыс. Йөр пытшкын, бур потшөс сайын татшөм гуясыс. На дорө скөт оз письт, а йөз аддзасны пасйөдьяссө, оз усьны гуас. А ми, челядь, оз тшөктыны да, на дінө эг матыстчывлөй.

Өтчыд, вотчөм бөрын, ме дзик гу дінас петі. Ведрөй тыр нин. Пукті сійөс зэръясөн шыльөдөм лыа вылас. Вугйыс гораа клёнмуні ведра дорышас.

«Тар-а-та-та-ра-та!» — ыджыд шыөн кутіс ризьявнышлопкыны тыртөм гу пыдөсын, быттө барабанөн брунгөны.

Төкөтө эг усь веськыда гу вом вылас. Слөйми шыбитчыны боквыв. Кольта моз шляпкыси лыа вылө. Сьөлөм

вот-вот потö виччысьтöг тадзи повзьёмсьыс. Юрсийö сувтис, мыш кузя кодзувкотьяс визнитисны.

— А-а-а! Ве-ня-ва-нь-а-а! — горöдi мый вынысь.— Сёйис! Сёйис!

Ошкысь кындзи татшöм гора кок шыыс некодлөн эз вермы лоны, да уси кö гуас — збыльысь сёйис. Öкмыс арöса зонкатö нö мый! Крутш-кратш, и — абу. Сэки ме медся ёна полi ошъясысь. Гу пыдöссияныд, усян кö, этша нин горзан.

— Ве-е-ня-а-а! Ло-о-ок! — бара на горöдi мый вынысь.— Ва-а-ня-а-а!..

Тыдалö, ошкыд повзис жö горзöмысь: гу пыдöсын шлопкöм-котралöм лөнис. А гашкö, бөр кокъяс вылас нин сулалö, пуксьылö-чеччылö, медым öдöбөн петны гусьыс? Ёсь гыжъя лапанас кватитны менö, нуны да сёйны. Ачым, йöйыд, весиг ог путьмы пышйыны, сулала да горза сöмын.

— Мый нö равзан? — котöртигмозыс юалис Модя.

— Босьт ёнджык бедь да лок öдйöджык! — тэрмöдла сийöс.— Картупель гуын — ош.

Кор ставөн матыстчисны, ме нетшыштi жö гу вылысь майöг, кокныдджыкöс.

— Абу жö öд о-ош? — чуймылис Модя.— Кодкö-мыйкö, буди!..

— Абу, дерт, волы видзöдлы! — кора сийöс.

Но Модя оз лок. Дзикöдзсö некод оз матыстчы. Олöмыс быдөнлы дона. А меным öд аслам — дона жö, и тшöтш вешйыштi налань.

— Кытысь танi ошкыслы? — оз эскы Модя.

— Ачыд либö и видзöдлы! — тшöктöны меным.

— Ы-ы! Ме видзöдла, а тi пышъянныд?

— Ог пышйöй!..

Мый лоанаыс ло. Вöчи ичöтик воськов. Ме бöрын сулалысьяс — тшöтш. Бытьö налысь кокъяссö менам кокö домöма. Ещö воськовтi — оз на тыдав. Коймöдысь, нельöдысь воськовта — дась чеччыштны бөрвыв.

Смелмөдчи сэсса, джынвийё пемыд гу пьдөсө видзөдлi.
Сэни некод эз тыдав. Быд пельос синмалi — тыртөм гуыс...

— Некод абу,— шөпнитi.

Ставөн гораа серөктисны. И сэки гөгрөс керъясысь вөчөм тшупода пос улысь быйкнитис-петис руд ёкмьль да кутис визлавны-котравны гу пьдөстi. Быттьо барабанөн и эм трамгөны-ворсөны. А зверыс сөмын и быйкъялө, сөмын и быйкъялө — ог вермы гөгөрвоны кодi, но — абу ош.

— Абу жө тай эськө ош вөлөма да... Руч кө-а?..

Руч йылысь кылөм бөрын ставөн матыстчисны гу дорө, йөткасьоны, вензьоны — быдөнлы окота видзөдлыны гу пьдөсас, а розьыс ичөт.

«Ай-ляй, ляй, ляй, ляй! Ай-ляй, ляй, ляй, ляй!» — дзик юр весьтсьыс уна йөзөс адзөм да гора гөлөсьяс кылөм бөрын кутис лөвтны весьөпөрөм зверь. Сийө, тыдалө, дзикөдз жуяммис да пуксис пельөсас. Кузь пельяса, руд гөна. Пошиктө став тушанас.

— Кө-өч! Кө-өч! — нимкодъпырысь горөдiс Модя.— Час, ме сийөс кута да петкөда... Валя, вайлы шальтө.

Модя миян пөвстын медся ыджьд. Төвнас сылы тырө дас кык арөс. Сидзкө, сийө и юр лэптысьыс. Зон тэр-масьөмөн суйис питшөгас Валялысь шальсө да бөрөн кутис лэччыны пос кузя. Көч казялис сы динө локтысьөс, быйк-нитис посувса пемыд пельөсө.

Модя — гуас нин, ноксьө шальнас. Со плавкнитис сийөс, копыртчис, нюжөдiс кисө көчлань.

— Чир-рри! Чир-рри! Чир-рри! — налькйө шедөма моз бара бөрддзис зверь.

«А-а-а! — вевттис көчлысь чирзөмсө Модялөн горш тырнас горөдөмыс.— Ой-ей-ой, о-о-ой!»

«Ы-хы-хы-ы,— нориника бөрддзис сылөн ичөт чойыс, Валя.— Сөйисны вокөс гуас, сөйисны-ы-ы!..»

— Эн пов, эн, Валюк,— бурөдiсны нывкаөс ськөд орччөн сулалысь пөдругаясыс.— Модяыд ыджьд, а көчыс кань кодь. Повзьөдiс сөмын, тыдалө...

Модя өдйө бөрынтычис пос улысь, веськөдчис, суйис чуньсө вомас да кутіс нёнявны.

— Кай лок, кай! — чукөстіс доймөм зонкаөс Веня.

Но Модя эз тэрмась. Вомас суйөм чуньсьыс, тыдалө, дойыс лөньыштіс. Сійө дугдіс ойзыны, видзөдліс пос улө йөршитчөм көч вылө.

— Курччасян, чорпа пиня лөшка син,— броткыштіс сійө.— Тэнө жө мездөны, а тэ жө и косясян-водзасян...

Модялөн эз петсьы гусьыс, но мөдысь көч дорө пемыдінас пырнысө, тыдалө, эз жө вөв окота. Чуньыс ёнтө, а ки пөвнад сэтысь көчөс он кут. Челядь чукөрысь, дерт, яндзим и: «Көч өд пурис-курччаліс, кө-өч!»

Венялөн мөдысь чукөстөм бөрын сійө, чуньсө вомсьыс кыскытөг, ки пөвнас кутчысялөмөн кутіс кайны гу веркөслань. Модялы отсалісны петны. Вирөсь чуньсө казялөм бөрын нывкаяс котөртісны лапкорла. Быд дой, быд гирыштчөм пыр сійөн көртавлім.

— Ёна курччис? — сьөлөм сетөм могысь юалі ме.

— Эз, нюлыштіс сөмын! Мун сэсся тэ, Ванька Паш дедыд кок пөв, кутась, ассьыд оштө лэпты бөжөдыс! — ырыштчис Модя, быттө ме мыйөнкө мыжа сы водзын.

— Ме лэччыла,— вештыштіс менө пельпомөд Веня. Сійө босьтіс киас ичөт бедьтор да тэрмасьтөг сувтіс пос тшупөд вылө.

Веня лэччис гуө, вөтліс көчөс югыд пельөсө да ньөжйөникөн, мыйкө меліа шөпкөдігтыр, кутіс матыстыны сы дінө. Зверь пукаліс куткыртчөмөн. Кузь пельясыс куйлісны мыш вылас. Зонка ньөжйө, видзчысьөмөн нюжөдіс кисө, повтөг босьтіс пельясөдыс да, кисө водзлань чургөдөмөн, лэптіс пельөсысь.

Көч, дерт, недыр тривкйысьыштіс жө, чилзыштіс, но, тыдалө, некыт оз доймы — лөнис. Веня босьтіс Валялысь муын куйлысь шальсө, кагаөс моз тубраліс сійөн көчөс, сөмын нырыс тыдыштө, да пелька кайис гуысь.

— Вень, петкөдлы,— корөны,— разьлы, разьлы туб-рассө?..

Модя сөмын оз матыстчы. Сылы, төдөмысь, завидь, мый эз сяммы кутны көчсө.

— Вень, а тэ мый сийөн кутан вөчны? Вай меным сийөс,— кутіс дзайгыны Модя.— Ме сийөс видзны кута курөг позйын.

— Көч абу курөг позйын олысь, абу ворсантор ни... Вөрүн сылөн оланіныс... Тадзи шуө дедуш. Лэдзам ми сийөс, вот. Медым гуляйтө,— вочавидзис Веня.

— Йө-өй-өй, он жө лэдз кутөмсө! — жальпырысь арт-мис ставлөн өтувъя ышловзём-горөдөм.

Но Веня эз кывзысь.

— Видзөдөй, кызди тілзёдас! — Веня пуктіс тубрассө му вылө да нетшыштис шаль помөдыс.— Ысь-сь-сь!

Мездмөм көч дыр эз виччысь. Звирк сувтіс кокъяс вылас, куим-ө-нөлысь чеччыштис боклань да пуксис бөръя кокъяс вылас, челядь чукөрсянь воськов дас сайө. Кузь пельясыс сувтсаөсь, оз весиг вөрзьяны. Пукалө, быттьө оз гөгөрво, мый сылы вөчнысө, видзөдө йөз вылө сувтса синъяснас. Сөмын сэки, кор Веня клопнитис кияснас, көч быттьө садьмис. Чур-чермуні да ыджыда сывкйөдлөмөн звук мысти воши синъяс водзысь.

— Котрав вөрүн, тэрыб кок! — шудаа вөзйис сылы бөрсяныс Веня.

Вотөс сийө гожөм помнас чукөртім уна. Сэсса воис школаө мунан кад. Сідз, төдлытөг и коли кадыс. Бөрдысь көч йылысь вунөдім, но сийө коркө ачыс ас йывсьыс казътыштис. Тулысын...

Школа бөрүн ми кино видзөдім. Сөрмыштім. Рытгуров локтам гортө. Туйным — вөр пыр, но унанад гажа. Лэбачьяс дзользёны, Шожымка ю бокин кургөны тарьяс. Со көнқө матын кылісны төдтөм шыяс: «Ту-лу-лу-лу! Ту-лу-лу-лу!..» Найө пыр матысмисны. Дзевсим коз пу улө, виччысям, кутшөм зверь либө пөтка мыччыяс? Регыд и пукыштім — туйнымөс вуджис көч, пуксис понөльяс дорө, бара некымынысь висьталіс асьыс «ту-лу-лу» да котөртис водзө.

— Тайö тай Модяос курчалысь кöчыд вöлöма! — серöктис Веня.

— Некутшöм тайö абу кöч, а ош! — пыльнитис Модя да мелань индöмөн серам сорөн юалис: — Ош öд? Сьölöмыд, кöнкö, век на коклябöрад лэччывлö? Ой, ой, горöдиссö кыдзи! Пыр на помнита: «А-а-а! Ве-ня-ва-нья-а! Сёйис! Сёйис!»

Серамыс... А менам думыштсис: «Ловъя-ö эськö вöли кöчыс, эз кö лэдз Веня?» А öни со чуксалö пöвсö.

Рöдмöны вöрын кöчьяс...

ВЫЛЬ ЧОЙ-ВОКЪЯСКӨД



рыс сулаліс зэра. Асывводзсянь рытөдз, войбыд бөрдісны өшиньяс. Ывла вылын тырисны канаваяс да гөпгьяс. Кизьөрмөма, ньөдздөма му. Но енэжсянь пыр кисьтис да кисьтис, быттё косөдіс жар гожөмыслысь водзөс. Тадзи

колис сентябрь, октябрь джын. Сэсся көдздөдыштис. Ывлыввса гөпгьяс быттё вевттысисны стеклөөн. Асывводзьясын колипасьлісны шоргьяслөн да Нёмыд юлөн берегьясыс. Енэжын пыр тшөкыдджыка мыччысьлісны еджыд бобувьяс. Он и төдлы, кыз миян войыввса му вылө воас төв.

Тайөс казьялөмөн, кузь туйө петисны посни лэбачьяс, эновтисны чужан местаяссө турияс, уткаяс, дзодзөггьяс да лунвылын төвйысь мукөд лэбачьяс. Ыджыд кельөбгьясөн найө шойччисны ыбгьяс, вадгьяс да ойдлан видзвывса тыяс вылын. Тэрмасисны тыртны зобгьяснысө, веськөдыштны мудзнысө, медым нюжмасьтөг лэбны водзө, шоныд море береггьяс дорө.

Лунвылө, рытивыввса кынмывтөм мореяс дорө лэбысь кельөбгьяслөн туйыс муніс миян грезд весьтти. Ми, зонпосни, колльөдлім найөс, видзөдім да өвтчим киясөн, кытгчөдз уна дас гөлөсгьясөн варовитысь ловгья гез эз вошлы сингьяс улысь вөртас сайө.

Татшөм колльөдчөмгьясас прөйдитліс лун дас. Сэсся утка-дзодзөггьяс, тыдалө, ставныс нин лэбөмаөсь шоныд местаясө, эз нин петкөдчывны грезд весьтын.

Арыс быттьо кватитчис, мый вунодіс прöщайтчыны жар гожомыскöд. Кытчöкö вешйисны кымөръяс. Енэжын лунтыръясөн кутіс дзирдавын шонді.

Öти татшөм асылö ми, челядь, ветлім Шожымка ягö вотны пув. Лун шөр бöрын тырөм кузов-падъянъясөн ми бөр нин восьлалім вөрса туй кузя гортлань.

Друг көнкö веськыдвылын кутісны кывны нора кливксан шыяс.

— Юсьяс лэбöны, — ыджыда ышловзис Веня ёртöй. — Регыд лымъялас. Юсьяс, дед шулывлö, бордъяс выланыс вайöны төв.

Венялөн дедыс тöдö быд зверь-пöткалысь оласногсö, приметаяс кузя висьталö поводдя, сёрнитö пöслöвичаясөн. Со и внукуыс велалöма. Лэбöны юсьяс да бордъяс выланыс пö вайöны төв. Сідзкö, найö шоныд муясö лэбысь медбөръя пöткаяс.

Юсьяслөн шыыс пыр öтарö матысмис.

— Со нö, со нö! — нимкодя горöдіс Веня: — Öтик, кык, куим...

Юсьяс лэбисны уліті. Көнкö матын, тыдалö, шойччöмаöсь. Кутшөм мича, лым еджыд лэбачьяс! Со найö юр весьтынöсь нин. Но мый тайö? Кельöб помын лэбис ёна ичöтджык кутшөмкö съöдруд пöтка.

Гыяс вылö шыбитөм еджыд шарп моз, юсьяс ньöжйö кывтісны юръяс весьтті. Помас, быттьö абу тырмөма еджыд сунисыс, шывкъяліс съöд тут.

— Дзо-дзөг! — гораа шöпнитіс Веня. — Найö важөн нин лэблісны. Кыдзи тайö веськалöма бокöвöй кельöбö?

Збыльысь, юсьяскöд, наысь кольччытөг, медбөрас лэбис дзодзөг. Кузь туйö петөм юсьясысь сійö пöшти кык пöv ичöтджык, но öдйö жö шенасис бордъяснас, лэбис костсö дзугтөг. Туй вылысь босьтөм ичöтджык вына воксö гөгөрвоёмөн, юсь-вожак эз тэрмась. Сійö тшöкыда сетліс бөрас локтысьяслы асьыс гора нор гөлөссö. Сёрниыс воліс и дзодзөгөдз. «Го-го-го, — быд пöрйö вочавидзліс сійö, — вöтча но, вöтча кольччытөг».

Мудзас кө дзодзөг, чайта, сетас отсөг коран шы. Сэки вожак ещö на ньöжмöдас лэбан öдсö да кутас сюся видзöдны, корсьны шойччан места.

Вөр-валөн аслас законъяс. Ми дыр вензим, кыдзи дзодзөг веськаліс юсьяслөн семьяö, но эг воій öти кывійö. Дзодзөгъяс пö зэв видзчысьысь пöткаяс, но вермис мамбатьсö суны кутшöмкö неминуча. Öткөн кольöм лэбач аддзис выль чой-вокъясöс, öтлаын быдмис накöд и со петöма туйö. Эскыссьö, мый юсьяс лючки-бура вайöдасны руд дзодзөгсö шоныд море дорö. Сэні сійö аддзас ассьыс рöдвужсö да, окотитас кө, стадитчас накöд.

Коли кузь төв. Тулысын миян войвылö бөр локтісны быдтысьны юсьяс. Но на пöвстын эз вöv руд дзодзөг. Сійö, дерт, воис бöрсö аслас рöдвужыскöд, пöлыскöд нин. Кутас быдтысьны. Мöд ногөн эз вермы лоны. Öд став сертиыс тöдчис, юсьяс тöждысисны дзодзөг вöсна ичöтджык вок вöсна моз жö. Бокöвöй семья сылы вöлі аслас семья кодьөн жö. Со кутшöм крепыдөн овлö вөр-васа олысьяс костын ёртасьöмыс.

СЕЙ, ОШКӨЙ, СЕЙ



едся шудтөм да медся мустөм лун-
нас челядь дырйи лыддылі меным
өчередьөн мөсьясөс йирөдны воан
лун. А воывліс сійө вит мөска
ичөтик грездын кык вежоннас ку-
имысь. И некытчө сысысь он сайөд-
чы. Сизим арөссиянь, креста воы-

са гача зонкаөн, чойяскөд пастукалі, а первой класс помалөм бөрын «кага» чинөй уси.

— Некор меным мөсьяс гөгөр гөгравны, — сійө тулыс-
нас жө и крапкис мамы Саня чой. — Со, мужик нин
быдмөма! — индіс ме вылө. — Быдлаө — Саньө! Ёгось
картупель градъясным, видзөдлан — юрид кольмө, сы
мында колө юравны, ёг турунсө весавны. Мукөд гортса
уджыс өтнамы жө көвъясьөма. Рая өд оз отсась, көрт
туй вылын ременнөсө гожөмбыд уджалө да...

— Сідзи, меся, өтнад и мудйысян да! — щөтясьышти
ме. — Ёг турунсө быттьө тэ и нетшкан?

— Ёг турун! Удж аддзөмыд!

— Ачыд уджөн лыддян да! Пөшти медпервойөн со и
казытыштін — сідзкө, удж, и вөча сійөс ме...

— Вөчан, вөчан! Видзөд, киясыд гаддялөмаось! Пыр
пельпом вомөныд бөрвыв кыйкъялан: оз-ө көнкө зонпос-
ни мачасьны!

Весьшөрө вензьөмөй лои. Мустөм пастукалан удж ме
вылө көвъясис, ковмис сетчыны. Школаө ветлан клеткаа
дөра сумкаө пукта вит-квйт гырысьджык картупель, сы-

мында жö кыдъя-картупеля сöчөн, бутылка йöв, и лун-
тыр кежлö лоö петны гортысь мöсьяслөн бöжъясөн ру-
литны.

А господьö! Луныс, луныс кутшöм кузь! Мойдын моз,
шондiсö быттьö турун чöвтан лэбынөн пыкöмаось! Кар-
тупель печенча пöжассьöма, сёйсöма, йöв сулея — сöстöм,
шорын мыськöма, сöчөнъяс агсалi-изi пиньяс улын, а век
на лун шөр: шондi улын вуджөрöй öти воськов кузя. Кор
на квайт час рытыс воас? Кор мына быдса вит лун кежлö
пастукалёмсьыс, татчöс гажтёмсьыс?

Ог кöсйи норасьны, мый луннас мöсьяс дiнын кодыськö
пола. Ог пов, ворсыштны некодкöд. Мачасьны öтиөн он
мачась, мöсьяскöд он ворсышт... А налы мый: варскасны
час куим веж турунсö, водасны да ружтöны-рöмидзтöны.
Матвей гöтырлөн зөр куль мешök джын ыджа вöраа
пöрысь Чернукыс юрсö луд вылас нюжöдöмөн весиг узь-
ыштас.

Аклясьсны-шойчасны час кымын, чеччасны, юыштас-
ны шорысь да бара йирсьöны. Найöс гажтёмлуныс, май-
быр, оз босьт, кадыс лючки кольö и.

Тадзи гожöм пуксигөн, июнын, кор туруныс небыд,
чöскыд, шондi жарыс оз на сэтшöма сот, лöдзьяс эз на
петны... Июлын, август заводитчигас ывлаыс жар пач
кодь лоö, лöдзьяс петасны — мöс мыш вылысь кöть ки-
тырнад кутав — вössылö жö сэки кок песан кадыс, ок и
сюрлö котравны! Мöсьяс сöмын асывводзсö и йирсьыш-
тöны да рытнас, шондi бергöдчöм бöрас. Луннас пöдтö,
лöдзьяс öдöлитöны. Йирсьöны, йирсьöны, видзöда, а сэс-
ся Давидлөн йöралөн кузьта кокъяса, вöвлөн кодь зумыд
статья-мыгöра Сюрукыс таг зiб моз лэптас бöжсö, горöд-
лас лёк ногөн да скачөн уськöдчö грездлань, медем мез-
дысьны тайö адсьыс колхозлөн öдзöстöм жыръя эновтöм,
джынвийö киссьöм сайкыд картаас. Мукöд мöсьяс, дерт,
сы бöрся. Весиг муödзыс блёнъялан вöраа Чернуклөн
вössылö кутшöмкö дзиръяöd гөгөрвотöм вын и сiйöс су-
öдны он вермы.

Оти боксянь кө, некод кө оз аддзыв, тайё эськё и бур: мынлан недыр кезлө пастукаломьсь, но аддзыласны кө гырысьяс, ёна жё видёны скётёс «картаын йирёдөмысь», весиг штрапуйтны на вермасны — мод лун дорыв тшөктасны видзны.

Аръявыв мөсьясёс видзны нёшта на сьёкыдджык. Сөрмём-чорзьём турунысь мөсьяслөн оз бурмы сьёлөмыс, да найё отарё зильёны пырны вөрө. Кватлалыштасны шыранькытш, вёрса клевер, корья турун, и мыйён пöтыштасны, кутасны вотчыны — гобьяс корсялёны. Он кө бөр бергөд, ылаласны тшакас, чөсмаласны да көть и гортад оз локны.

Отчид Нёмыд ю вомын йирөдi мөсьясёс. Шожымка берегсө колхозса скёт подмөдтөдзыс йирөмаёсь, а Нёмыд ю вомё найёс абу лэдзлөмаёсь да шыранькытша-бобөнняя туруныс пидзөсөдз. Ок и йирсьыштисны сюрукьяс. Лөддзыс шөр спас праздник бөрын гым-зэрнас усинин, а номъяссьыд-өвадсьыд мөсьяслы веськодь, йирсьёны пемөсьяс, дышиника бөжъяснас өвтчигтыр. Пөтисны, водөдчисны шойчыны. Ме пажнайтi жө да немтор вөчөмысь лэччи Нёмыд вылө. Посни чериясёс повзьөдла. Видзөда: оти кузькодь ляпкыдик курьяё ыджыд, весьтөнджынийөна сир пырөма, шондi югөр улас нюжвидзө.

Берег вылас шытөг кайи, корси вакулач краж, лэччөдi пельпом вылын курья вомё дай и шняпки-томналі сирлысь петанінсө.

И мый сэнi лоис! Тув джынья сирпиыс кыліс кражлөн усигөн ваислысь сыркмунөмсө да лыйыштис петанінас, а сийө и пөдса...

Ок и визьяліс-гежмаліс жө курьясө, лэптис пыдөссьыс нуйтсө. Видзөдi-видзөдi, кытчөдз сирпи эз лөнь, а сэсся и кутасны модi. Ваис гудыртчис, сирпи кытчөкө нуйтас дзебсис. Здук виччыси — аддзи жө, но кутны бара эз удайтчы. Дыр тадзи ота-мөдкөд шыра-канясим, да кызкө удайтчис жө кутны сирпиөс.

Котөрөн кайи берөгө. Бипурой ваймөма да кусөма, мөсьяс абуөсь...

«Аминь, аминь! Кытчо нө эськө мунисны?» — мөвпа-ла. Уськөдчылі Нөмыд берегті увань, сэссия кузякодь муні ва катчөсыс — мөсьяс юсө абу вуджөмаөсь. Дерт, найө вөрас пырисны, вотчыштисны, а сэссия Давиддөн йөра кодь сюрुकыс код төдө кытчо стадасө нуөдіс.

Нинөмла вөлі грездөдз кайлынысө: йөръясын по-тшөсьяс бурөсь. Непөштө мөсьяс, ыжъяс градъяс да кодза муяс вылө оз вермыны пырны. Төда тайөс, но век жө кытшовті грездгөгөрсө став муяссө, кыйкнитлі кукъяслөн важ гидө — некөн абуөсь мөсьяс. Аръявывсө, лөдзьяс абуөсь да, сэтчө оз и пыравлы некутшөм пемөс. Төда нин тайөс, но корсьыссьө тай и сэтысь, көні, пөшти надейнө, абуөсь.

Друг юрө быттьө кучкисны:

«А Рөдь нөвина вылө кө мунисны? Водз ытшкылөм видз вылын небыд өтаваыс весьт джуджда нин туөма-быдмө-ма. Виддзыс көрт туй бокрын... Грездө ветлан вөла туй-сянь километр да джын сэтчө вөла туй катөдө, дзик көрт туй боктыс... Петасны кө көрт туй вылас да таяссяс-ны?..

Регыд Айкинасянь Микуньө пассажирскөй поезд каяс... А збыль кө поездыс таялас? Уна-ө нө вежөр пөрысь Чернуклөн юрын? И восьласыс — мунө нисьө оз, быттьө узьө. Таяссяс кө, асланым Сюрүкөн өд ковмас мынтысь-ны?» — пөсьө быдсөн шыбитліс тайө мөвпсыс.

Скачөн котөрті Рөдь нөвиналань. И удиті өд поезд прөйдиттөдзыс, но мөсьяс сэтчө абу волөмаөсь.

Видзөддытөм местаыс, менам чайтөм серти, өти коли— Шожым горувса муяс. Сэні и көдзаясыс, и капуста да анькытш муяс колхозыслөн потштөмөсь. «Сэнось кө өд мөсьяс да веськаласны кө кодлөнкө син улө, мамлысь гожөмбыдъя став трудоденьсө пөтравасыс чиркасны!»

Нинөм бурджыкыс оз ло, кодкө кө ас грездса сэтчөс муяс вывсьыс мөсьясөс вөтлас да пөпуттьө гортө вайө-

дас. Ас грездса, дерт, колхозса начальстволы оз кутны удтысьны, но мосьясос мод лун, кыдзи штрапниклы, видзны ковмас быть.

Которті Шожымлань, кытшовті миянладор став муяс-сө — мосьяслөн весиг кок туйыс абу. Бөр кайи грездө, вөр пырыс локті, кань моз, пывсян дорө, а өшинь улын мый вочсьө! Грездса бабаяс, ставныс көрт туй вылын уджалөны да гортанысось нин квайт час рытнас, топөдө-маось чойясос.

— Мосьясос колө лысьтыны, а көнөсь найө? Көні шпана-вокыд? Небось, воштіс скөтсө да дзебсясьө өні көнкө посйылад, турун пытшкад! Корсьлөй!

— Корсьөй, колөкө, пырөй да! — ыджыдджык да, абуджык полысь да, воча щөтитчө Рая чойөй, но менө, кыла, оз жө дорйы: — Волас сійө талун, тасмаөн и куля!

— Кульнысө куль, колөкө, а мосьяссө корсьөй да вайөдөй! — стрөга тшөктө Модялөн мамыс. — Саньө, мый сэн дуввидзан? Мун вок дінад, төдөмысь, сійө көнкө матын, кывтыд либө катыд пурысь бокын пукаломөн мосьяслысь локтөмсө кыйөдө!..

— Да-а-а! Аддза ме сійөс кыськө? — бөрддзис Саня чойөй. Пемдыны нин кутіс да, төда, полө сійө вөрланьыс өтнас мунны.

Кыла, быд ногыс менө видөны-вочөны-ыджөддөлөны, и некод дорьяна кыв оз шу, и мосьясос өтвив корсьөм йылысь некодлөн дум абу. Мам колхозсьыс пемыдөн нин воывлө, а сійө эськө өтнас көть кытчө мунас: оз пов ни пемыдсьыс, ни шуштөм пармасьыс. Сыкөд эськө корсим, но он на босьт — өтнамлы ковмас.

Кынөм, кыла, вирдалө-сюмалө, но он на гортө нянь торла пырав, кор өшинь улын татшөм войнаыс мунө. Вөчны немтор, йөзыслы синьяс улас петкөдчывтөг довги катыд йөр помлань вель ылөдз. Биасьлі кос росьясө, жариті сирпиос. Но совтөгыд да няньтөгыд өдва и кылаліс, а бөрнас весиг вукөдны кутіс. Пөтөм пыдди, кажитчө, өнджыка на кынөмөй кутіс сюмавын.

Дыркодь сулалі кусём бипур дорын: гортё мунны оз позь, а кытысь корсьны мосьясос, ог жё вермы вежортны.

«Вёрын, дерт, ёні оз шойтны... Мосьясыд абу каньяс, войнас налы тшакыс оз жё сурав,— мовпала ас кежысь.— Узьмодчисны, кёнкё, кутшомкё дзоляник видзтор вылө... Кытчё нё эськё?.. Кывтыдсё ставсё лои гежмалёма-ветлөдлөма. Сідзкё, катыдлань нырөн кё Нёмыд нырдыняыс сетчисны, кёнкё грездынь катыдланьё и узьмодчисны? Кытчё нё эськё? Гөгөр өд сук козья вёра парма. Сэні весиг туруныс оз быдмы, а сёмын керка лэптан шепта нитш, пидзөсөдз. Ош нитшкөн миян сійёс шуоны... Кытчё нё, кытчё нё, вежортөмъяс, воштысинныд? Гортё кё эськё локтінныд, быдёнлы на помөй ведра лишалис, а со, узьмодчисны вёрын, йёраяс бытьё! Тьпу! Кытысь и корсьны, кытысь и корсьны?..»

Тадзи юрөс жугліг-мовпалігырйи эг и төдды, восьлавсьё вөлөм менам Ванюк туй кузя Шожымкалань. Видзьяс вылөдзыс ылын — сизим километр и, дерт, сэтчө мосьяс эз мунны...

«А Туйвыв йёнодын кё узьёны?» — воис юрө лача кутан мөвп.— И матын сэтчөдз, кык километрысь абу и унджык шыльыд вёла туй кузя... Котөртла! Чайта, сэнөсь!»

Но Туйвыв йёнодын мосьяс эз вөвны. Бё-өр ризөдікотөртті гортлань туй джынсё. Синъяс кольё кодьось, туйдорланьысджык быдмысь быд коз понөль, вужля, мыр ошкөн чайтсьёны, сырма-пола, а со рөкыс суис да быть пемыдсё повзьөдды.

Горув йёнод весьтө вои. Туруныс сэні пырей сора, но зэв төзьось, некодлөн пө төвнас мөскыс оз сөй. Арбыднас төлөдзыс нөшта на тшыкыштас. Некод оз и ытшкы. А миян Сюрук сөйё, көть джынсё жё кок улас лэдзё, вольёсө вөчө, но сөйё. Ми сёмын тайё куим дзоляник додюла видзсё и пуктылам.

«А Горув йөнөдас кө мөсьясөй? — воис юрө мөвп.— Сөмын сэтысь и коли видзөддыны, а сэсся, войнад, дзик некытысь корсьны. Быдлаысь өд нин лои гөгөртөма-видзөдлөма... Эз сюрны тай мөсьяс, эз сюрны... Аски выльысь ковмас пастучитны... А ошгъяс кө сөйисны? Сэки мый? Сідзкө, өти сайысь и менө сөй, сөй! Помыс, тыдалө, өти!»

Кежи Ванюк туйысь, лэччыны куті Горув йөнөдлань кадья, чукаялысь ордым кузя. Воськов дасдас вит мысти джөмда коз пу вужйө да өкрөметрия кымынь. Туй чукылын и пуө люкасыла — сэтшөма нин пемдіс.

Коркө вои жө йөнөдө, пыри видз вылас. Неуна и мунышти — сьөкыда ружтыштөм шыяс өтчыд-мөдысь кывлісны...

«Ошгъяс?» — воис юрө зэв повзьөдлана мөвп. Джөм сувті. Водзө кокъяс оз воськовтны и бөр гортлань котөртны ог лысьт — вөтөдасны өд! Дыр тадзи сулалі. Кыла, небын бара ружтыштіс, дівсмуні мыйкө кызөдөм сямаө...

«Да тайө жө Чернук, Матвей гөтырлөн древьльөыс! Сійө шойччигас пыр тадзи ышлолалө, кызөктыштавлө и... Кук йөр кодь ыджыд да көдзыд гидас өтнәсөн олігас кызөдан висьөм көласьөма, — кывзысьышти нөшта. — Бара дівсмуні-кызөдыштіс. — Чернук! Чернук тайө, Чернук!»

Вынысь опөсті-горөді. Непөштө видз вылыс, матігөгөрсә вөрыс шызылыс. Кузь бадь ньөр чеги да варыш моз уськөдчи мөсьяс вылө. Давидлөн Сюрукыслы өтчыд мыш кузяыс сюрлі, кодөскө кыкысь-куимысь ньөрйыс малыштіс. Öдйө тай пальөді-чеччөді, веськөді гортлань. Ньөрйөн пуясө швучйөдла, нимкодьөйла горза, вөрсө шызьөда, ошгъясөс, думысь, весьөпөрта. Öні сэсся абу нин өтнам, мөсьяскөд да унанад некутшөм полөм нин абу. Ванюк туй вылө петім да мөсьясөс гөнечөн мөдөді. Чернук, пак вывтіыс сөйөма да мясянь воськов-мөд ылнаын котөртө, ньөрйыслысь көрсө некымынысь на видліс. А мый сэсся, дөзмөдісны этатчөдз да. Сэсся, гашкө, сійө и узьмөдчынысө чуйдіс, гортас локны эбөсыс быри да?

Грездын быд мөскөс гортөдзыс коллялі.

— Мө-ө-өс-тө йөртөй! — горза, мед оз чайтны, мый найо асьныс, вайөдтөг локтисны.


Мам гортын нин вөлі, пыр и лэччыліс лысьтысьны.

— Талун пак вывтис йирсьөмаось да пөдөнчаө йөлыс өдва и төрис, — дөвөльпырысь шуис сійө, но көритыштіс жө: — Мөсьястө син увсыд некор оз ков воштыны. Видзөдтө, келавнытө сап войөдз ковмис.

Мөд луннас эськө Модя босьтчыліс жө зыртласьны. Мөсьястө пө воштылін да выльысь ковмас видзны, но ме сылы кос кулак петкөдлі, нимті уркай сөйысьөн да өвсис.

А тайө кадсянныс, көть и пемдандор, пармаөдыс ветлыны эгджык кут повны. Ог шу, мый өтнамы сэні сьывмөн гажа да долыд, но воштысьласны кө мөсьяс, ог туйясті да эрдьясті кытшлалөмөн найөс корсь, а веськыда пармасө юковта-вомөнала да наян пемөсьясөс регыдөн и аддза. И повнысө, вөлөм, пармаас дзык некодысь, быдөн сэні ас могнас ветлө, ас олөмнас олө.

ПЫЖ ПУ



армашӧрса эрд вылӧ шыльк-
нитчӧм грездса зонкаясыд, ми
водз велалім вӧравны. Кыйлім и
чери — сьӧд мышка мыкъясӧс,
сиръясӧс, ёкышъясӧс, сутш-
касысь йӧршъясӧс. Пыжтӧг,

вугыртӧг — ботйӧн. Эг уна, лэччылӧм вылӧ морт ӧти пайӧн,
пумӧн. Чериа вӧлі Нёмыд ю, но ляпкыд, сэтчӧ эз ков пыж.
Керыштам шодзьяс* вылӧ бадьяс, чинталам сэтысь ас судта
кымын бедьяс, тшуклалам найӧс ю вомӧныс неыджыд
костъясӧн, нюжӧдам визув кырйивладорсяныс ботан и
болскӧмӧн-келалӧмӧн вӧтлам сэтчӧ черисӧ. Ботаныс
Опӧнь дедлӧн. Эз жалитыв мортис кыйсян угодыӧсӧ
челядылы, тшӧкыда сетывліс кыйсьыны.

— Эн вӧйӧй, — сӧмын и шуас вӧлі, — посниджык челя-
дюловсӧ ваас эн келӧдӧй, прӧстудитчасны.

А кыйсьылімсӧ нывкаяс да зонкаяс ӧтвыв. Быдӧнлы
окоата аддзыны, кыдзи черисӧ кыйӧны. Весиг креста во-
лыса гача зонкаяс ми бӧрся вӧлі вӧтчӧны, сэтшӧмъяссӧ,
дерт, эг босьтлӧй. Локтігӧн налы кык-куим ёкыш-мык
сетлім, медым мамъясныс пуасны юква — и ставыс.

Быдыштім. Венякӧд вӧралігӧн сэтшӧм мича вадъяс
аддзывлім, но он на сәні ботьясь. Джуджыд. Колӧ пыж. А
сійӧ эз вӧв. Майшасьӧм, сёрни-басни. Веня и топӧдас

* Ш о д з ь я с — визув ю вомӧн вӧйтӧм ботан кылӧдӧмысь видзан
тшуклалӧм бедьяс.

дедсö. Дас нель ар нин сылы вöлі. Колö пö пыж. Опонь дед, ветлöм-мунöм мортыд, быдторсö вöчны кужліс. Сет-час. Кösйыяс отсыштны внукуслы.

Котөрөн воис ме дінö Веня. Дед пö сöвет вылö корис. Кывсö эг гөгөрво, но öдйö тай котöртим.

— Пыж, шуанныд, колö? — читкыртліс синъяссö Опонь дед.

Ми сöмын юръясөн сöглас довкнитим.

— Ыджыд уджыс... — доvkйöдлыштис дзор юрнас Опонь дед. — Увтöм коз пöвъяс колöны, а кытысь сійöс босьтан... Емва вылын, эськö, и пипуысь кодйöны, но ог нин, тыдалö, вермы. Пöда. Сэссия сы вылö, ой, кыз пипу колö бöрйыны... Корсьлöй сывтыръя пу — тöлк-ладсö петкöдла. Асьныд и вöчанныд. Кузьныръяс эмось, чер-пила лэчыдось... Но, вöv ни додь — ю дорысь қорсьöй, кöни кösъянныд кыйсыны, мед места вылас и вöчнысö позис...

Гожöмбыд, арбыд, тöлын корсим Венякöд туяна пипусö. Аддзим жö. Шожымка берег вылысь. Быдмöма тай, майбыр. Öтиөн он на и сывйышт. Висьталім Опонь дедлы местасö.

— Тулыснас, сідзкö, нуöдланныд, — кösйысис сійö.

Коли тöv, воис тулыс, но пыжöдз-ö? Гöра-кöдза кад. Гожöм пуксигас нин воим пипу дінö.

— Доб-ра-а! — кызöктыштис Опонь дед. — Сё саяс во, гашкö, туöма-быдмöма. Дерт, и тöщö, но нинöм. Кокниджык лöö пöрöднытö да кодйыны. Весиг набойки оз ков, сы кызта. Лун джынсö, тыдалö, ковмас жö кокавны-пöрöдны тiян, но öд ас вöля сертид. Асьныд асьнытö чуйдінныд, сідзкö, и уджыс мунас споринаджыка.

Тöлкуйтыштöм-сёрнитыштöм бöрын медводдзаөн черö босьтчис Веня. Мортис вына нин — быд куим-нельысь керыштöм бöрын ки пыдöс пасьта, чунь кызта чаг чечыштö. Ме орччөн сулала кык воропа пилаөн. «Пöрöда-а-ам!» — думайта.

Но мый тайö? Юр весьтын кутисны лёкысь тичкыны сизьяс. Кыкөн. Öтиыс гөрд юра-сорса, мөдыс — руд-джык. Пыраласны пипу горсйö, лэбалöны миян гөгөр, шызьöдiсны став матигөгөр вöрсö.

Видзöда, Опонь дед ичöтик зонка моз кутiс вашгьявны. Чатöртчис, синкым весьтас лэптiс ки пыдöссö.

— Вайлы, ноко, Веня пий, чертö,— мурган гөлöсөн чукöстiс сийö внуксö.

Веня нинöм гөгөрвотөг сетiс дедыслы кисыыс черсö да видзöдлiс жö вывлань.

— Мый нö, дедуш, сизьясыс таdzi шызисны?

— Шызьöдiм тай,— бара вашмунiс Опонь дед да дзе-бис черсö мешöкас.— Сёрмим.

— Черсö, черсö мыйла суйин мешöкад? — ноп вылы-сас шашаритчис Веня.

— Сёрмим, мися,— чорзыштöм гөлöсөн вочавидзис дедыс.— Овмöдöмаöсь пыж пунытö. Сизьяс, со аддзан, поздысьöмаöсь.

— Но и мый? — эз сетчы Веня.— Этша öмöй лылам, кор вöралiгөн аддзам — пищаль видлалам. Оз тай чинны-бырны.

— Сизь семья, мися, быдтысьöны! — скöрмис Опонь дед.— Тасма эськö тэныд. Эг тöдлыв...

Сизьястö, кöть эг тшöкыда, ми, збыльысь, вöралiгөн лыйлывлiм. Но та йылысь некодлы эг ошйысьлöй. Сизь-ыд öд абу пöтка, а сöмын ловъя лыян пас. Венялөн со висьтавсис. Ёна и скöрмис внукыс вылö Опонь дед. Кажялi, тшötш и ме вылö видзöдлiс кöдзыда.

Тайö пöрийö пипу сiдзи и коли сулалысьöн. Опонь дед эз кöсйы кывзыны некутшöм пыж йылысь. Волам пö гожöм помланьыс, кор позтырыс лэбас, сизьпиян петасны ас кöрым вылас.

Гортö воигөн нин Опонь дедлөн сёлöмыс бурмыштiс. Сийö висьталiс, мый сизьяс бурдöдöны пуяс, сёйöны висьысь пуяслөн кырсь улысь пучöйясöс. Пöрысь морт ёна

стрөжитіс, медым ми, челядь, некор эг лэптöй сизьяс, көкъяс да мукöд посни лэбачьяс вылö кинымöс. Ставыс найö пöльза вайысь бордья ловьяс.

Пöрысь пипуысь ми вöчим пыж аръявылыс нин. Уна и гыч кыйлім борд кодь кокни пыжөн. Сійö, дерт, важөн нин сисьмис. Уна дас во нин абу ловья и Опонь дед, но сылөн көритана кывьясыс öнöдз на вежöрынöсь.

Вотчигьясö унаысь аддзылі сизь позьястö. Кызджык пипуын и вöсньыдын. Öжын нырнас тай кылö горся путö тайö ичöt лэбачыс. Но некор эг вөрзёдлы налысь позьяссö. А таво гожом сизь семьяыд менсьым ещö öти удж торкис. Колö вöлі весавны сад йөр улö неыджыд места. Дас пу и кольöма вöлі пöрöдны вужнас, но öти горся кыз пипуын, казялі, овмöдчöма сизь. Дум вылö уси Опонь дедлөн внук вылас, да и ме вылö тшötш, скөр видзöдласыс, да эг и перйыв ноппысь черöс. Сизьяс быдтысисны, лэбисны. А тулыснас, быттьö лэбачьяслы кодкө висьталöма, мый пуыс меным мешайтчö, эз поздысь сэтчö некод. Овмöдтөм пипусö арнас пöрöді.

Вöралігөн уналаті прöйдитлі. Озыр на миян парманым и тшак-вотöсөн, и зверь-пötкаөн, но эмöсь нин сэтшөм пельöсьяс, көні он кывлы сизьлысь котшкөмсö, уркайяслысь көлөкөльчикьяс моз дзользөм шыяссö. Татшөм вöрас зэв гажтөм. Окота öдйöджык вуджны тайö овтөм местасö, а мöдысь, дерт, көкъяс сэтчö оз нин нуны. А вөр-ваыд гажа олысьясөн, ловья ловьясөн!

ШУД ВАЙЫСЬ ЛЭБАЧЬЯС



ойнабөрся тшыг воясö аспом градъяс да муяс вылын эз вошлы немтор. Арнас, картопель керигөн, мусö маллявлім-сарпавлім, медым эськö сэтчö эз коль сьöкыда быдтöм урожай. Сэсся и шепасьслывлім на кык-

куим пöрйö. Сю идралöм бöрын ветлöдлім муяс вывтi падъянъясөн, чукöртлім шепъяс. Но он тай вермы курьштны ставсö. Урожайыс кольывліс тшöтш жоньяслы, кеняслы да мукöд лэбачьяслы. Тайö муяс вылас жö, гумладор йöрын, вердчывлісны шоныд странаясö лэбысь турияс. Поздысянінас локтігөн найöс тані некод жö эз полошуйтлы.

Ми, зонпосни, праздникöс моз виччысим тайö кадсö. Турияслысь кельöб аддзöм бöрын эновтлім став уджъяс, ворсöмъяс да котöртлім гумладорлань. Кустъяс сайö дзевсьöмөн дыр видзöдiм лэбачьяс вылö, прöщайтчимчолöмасим накöд. Турияс ветлöдлöны му вывтi, быттö йирсьыны петöм руд ыжъяс, кокалöны шепъясысь гылалöм тусьяссö. Найö нимкодя кливксöны, гашкö, аслыс-ногөн аттьöалöны йöзöс, мый и налы гöлиник урожайысь бур войтыр кольыштöмаось пай.

Көнкö лунвывса муясын аистьясöс лыддöны шуд вайысь лэбачьясөн. Найö оз воливлыны миянö. Но и войвывса вөр-ва сійö кадас эз жö вöв гöльдзык. Зверь-пöтка парма тыр, а кыйны некодлы. Пöчьяслөн шуöм серти,

вөліны и шуд вайысь лэбачьяс. Тайö пö турияс. Збыль-ö сійö — эг вензылöй. Но томдырся шудыс мян вöлі курччöм кöлöб кодь. Война вылö грездысь квайт семьяысь ветлісны дас öти пöрнöй мужичöй, а бöрсö эз бергöдчыны некод. Турияс волевлісны мянö быд тулыс, а батыс сідз эз и воны.

Ми, зонпосни, туриясөн вайöм шудсö гөгөрволім ас ног. Öд лои олöма ещö öти кöдзыд да тшыг нисьö пöт кузьтöv. Гожöмын, майбыр, тшак-вотöс вөр тыр. Он кö дышöдчы, пызан вылад пыр лоö руалан тасьтi, медсясö, дерт, тшака шыд.

Мамъясным уджтö лунтыр кежлад кольлісны мянлы юр выв тыр. Ноксьылім град йöрын, заптiм скöтлы турун, корöсь. Но сюрліс прöст звук и пыр жö котöртлім сикт-дорса раскö тшак-вотöсла.

Грездын сійö кадас оліс ар сизимдас вита Опонь дед. Сійö нэмсö вöралöма да тöдіс чöдъя-пувья местаяс. Унаысь висьтавліс Ю-Яг йылысь. Сэні пö вотöсыд пев помгырся, тувччынытö некытчö, но мянöс, зонпосниöс, некор эз босьтыв сьöрсьыс. Ылын пö, он воій. Ми, дерт, дузгысьлім, но Опонь дед вылö эг вермöй скöравнысö. Ветлас кö вөрö — сьöла-тар-дозмөр вайö лаз тырыс. Ректас нопсö — быдöнлы морт öти сьöлаөн сетас.

Медся тшöкыда ме ветывлі вотчыны Веня другкöд, Опонь дедлөн внуккöд. Сійö меысь вöлі кык арöсөн ыджыдджык, тöдö ылыссаджык тшака-вотöса местаяс. Мортыс повтöм. Унаысь ветывлöма дедыскöд кыйны лэчьяссö да кужö пöльзуйтчыны компасөн. Но и Веняös дедыс абу на нуöдлöма Ю-Ягöдз. Быдмышт пö ещö во-мöд да, ловья кö лоа, ветлам сэки.

Öтчыд Веңякöд пöшти лунтыр вотчим картасайса вөрүн, но эг вермöй тыртны падъянъясöс.

— Эк, шутövтлыны эськö Ю-Ягö! — мунігмозыс гораа мövпаліс Веня.

— А код тöдас, кöні сійö Ю-Ягыс? Коді сэтчö лэдзас мянöс?

— Ме тōда. Лэч туй гōгортгōн петім сэтчō нуōдысь ордым вылō. Дедō шуō, этайō туйыс пō нуōдō Ю-Ягад,— висьтавліс Веня.— А юасьōмнад и збыльысь оз лэдзны. Колō мунны гусьōн. Ветлам?

Мем окота жō лои ветлыны пармалōн тайō озыр пель-ōсас, но падьялі.

— А ылалам кō? Вошам кō?

— Веськыда шу — пола,— скōрмис Веня.

ōта-мōд водзын ми медря ёна яндысим полōмысь.

— Ветлам,— сōгласитчи ме.— Асывнас лок миянō.

Аскинас вōр туй кузя мудзтōдз мунōм бōрын вуджим паськыдкодъ визирка.

— Татысянь заводитчō миян лэч туйным, а Ю-Ягад нуōдō этайō ордымыс,— индіс Веня.— Дедō шуліс: ещō пō верст вит.

Векньыдик ордым вайōдіс тōдтōм ягō.

— Тайō, колō лоны, и эм Ю-Ягыс,— эскōдана шуис Веня.— Пыралам веськыдвыв.

Ми сетчим веськыдвыв.

Пувйыс ягын быдмис зэв гырысь, но эз нин сэтшōм уна, кыдзи висьтавліс Опонь дед. Ми копыртчōмōн ветлōдлім вутшьяс дорті. Эг полōй вошōмысь. Шондіа. Венялōн пестерас куйліс ещō и компас. Ветлōдлыны ков-мис уна, но падьянъяс тырисны мича гырысь вотōсōн. Грезд дорын он аддзы татшōмтō.

Тōддытōг вежсис поводдяйд. Кымōръяс сайō вошис шонді. Тōвзысис. Кутіс войтасьны. Зэрмис. Кōтасьōмысь дзесим пашкыр коз пу улō. Шуим нурьясьыштны. Веня восьтіс пестерсō.

— Компас ни нянь! — повзьōмōн ойкнитіс сійō.— Тэр-масьōмнад ставыс кольōма залавка вылō.

Менсьым сōчōнъясōс сейим локтігōн на. Сідзкō, ков-мас терпительштны.

Регыд кобис.

— Петам туй вылō,— шуис Веня да кутіс восьлавны водзын.

Мунім вель дыр, но туй эз во.

— Мөдарө мунсьөма,— шыаси ме.

Сетчыштім боквыв, сэсся ещө кежим. Туйсө быттё гусялісны. Дзикөдз вошим.

Ме, ылі вөрад вольтөм мортыд, надейтчи сөмын Веня вылө. Сійө ыджыдджык, ветлывлөма дедыскөд кыйны лэчъяс, кутшөмакө төдө вөрсө, но компастөгид вөлөма синтөм морт кодь жө.

Дыр на келалім. Мудзим, көтасим лысванас, кынөмым сюмалө. Сьөктісны вотөс тыра падъянъяс. Кольны эськө найөс кутшөмкө пу улө. Сэки ветлөддыны лоө кокниджык, но жаль пувйыс.

— Эн пов,— сьөлөм сетө Веня, а ачыс, казяла, повзьөма жө. Абу шутка, ва паськөмөн кө ковмас узьмөдчыны вөрын.

Кытчө мунсьө, кодарлань, ми эг төдөй. Дерг, и кытшлавсьө. Кыкысь петалім кутшөмкө йөнөдө.

Дыр ветлөдлөм бөрын веськалім зэв вотөса местаө. Збыльысь тувчыны некытчө. Но миянлы өні вөлі веськодь.

— Эк, компас кө эськө,— майшасис Веня.

Вирдалісны-сюмалісны кынөмъяс, но пувнад тай он жө пөт. Веня чегис пелысь пуысь өти рос да кутіс нямлявны сійөс.

— Видлы,— шуис сійө.— Дедө висьтавліс, отсалө пө, содтө вын. Унаысь пө мездывлөма сійөс пелысьыс.

Роскыд меным эз во сьөлөм вылө — вывті нин курыд, весиг тасалө горшөс.

Вөрын лоис ещө на шуштөмджык. Бара кутіс войтасьны. Юрө кутісны пырны шуштөм мөвпъяс: «Локтас кө татчө ош?»

— Вень, а ошъяс збыльысь усъласьөны йөз вылө? — полөмөн юалі ме.

— Кытысь тэ сійөс кывлін? — дөзмөмпырысь лэптіс юрсө өртөй.

— Шожымысь Пельтём Ёгор пö том дырйиыс бура вöлөм кылö. Ошлөн уськöдчылöмыс сы выйöдзыс сийöс вайöдöма.

— Дед висьтавліс, ачыс пö мыжа. Син на син паны-дасьöмаöсь зверыскöд. Ёгорыд повзьöмвывсьыс косьöб-тöма-луйöма зверыдлы ур зарадөн-дрöбйөн. Сийö скөр-мöма да и кучкöма Ёгорыдлы пель дінас. Сэсянь и пельтём. Дедö нэмсö вöралö да абу на сулöма сийöс сэтшöм неминучаыс.

Дзикöдз жуялім. Медым ичөтика шойччöдыштны кокъяснымöс, пуксим пөрөм пу вылö.

— Биасьлыны колö,— шуи ме.

— Вöлі кө эськö истöгыс,— ас вылас скөралыштіс Веня.— Истöг, компас, нянь — ставыс коли залавка вылö.

Шувгысь парма шöрын куткырвидзам кык зонка. Отсöгсö виччысьны некодянь. Ме эськö раз-мöдысь горöдлі, но весьшөрö.

— Ланьт! — пыр и вомаліс Веня.— Горзытöгыс шуштём. Петас шонді — адзам туйсö.

«Кур-ли-и-и! Кур-ли-и-и! — чöv-лөнсьö друг орöдіс турилөн горöдöм. Сылы шыасис мöд, вöсньыдджык гөлöса.

Мем öні веськодьөн, весиг повзьöдчанаөн кажитчисны тайö нор шыясыс, а Веня чошкöдіс пельяссö. Лэбачьяс, тыдалö, пукалісны. Найö кливксісны öти местаын.

— Ту-ри-яс! Ту-ри-яс! — звирк чеччыштіс Веня да кутіс йöктыны, кекеначасьны.— Со көнöсь туй индалысьясным. Öні оз ков компас.

Нем гөгөрвотөг ме сулалі да шöйöвошöмөн видзöді друг вылö. А сийö радысла сывйыштіс менö да жбут шыбитіс нитш вылö. Ме уси падъян вылö. Сийö путкыльтчис.

— Турияс горзöны Дон нюрын,— киссьöм пув чукöртны отсалігмоз шуис Веня.— Ме лэч кыйигөн сэні вöлі куимысь. Дедö висьталіс, быд гожöм пö найö быдтысьöны сийö нюрас.

Регыд мысти ми сулалім нин Опонь дедлөн лэч туй вылын, а сёр рытын, пемыднас, воим гортö.

— Шог вöчысьяс ті, шог вöчысьяс,— синва сорөн видіс менö мам.

Мудзöмöйла ме эг вермы сёрнитны. Йöв кружка юöm бöрын воді шоныд, небыд эшкын улö да чорыда унмовси сійö жö здукас.

Колисны вояс. Ми быдмим. Мамъяс эз нин кутны ылі пармаö ветлöдлöмысь. Шойччан лунö, пемыд на, а Веня ми ордын нин.

— Пасьтась,— шуö,— ветлам ельдöгла либö пувла.

— Шойччыштінныд эськö, уннытö пальöдöм местаö,— жалитö садъмöдны менö мамöй.

— Ми, Любава тьötка, шойччыны и мунам,— гигзьö-сералö Веня.— Лöсьöд пельсатö, ваям уна тшак-вотöс.

Вотчöм бöрын ёрткöд унаысь кежавлім Дон нюр дорö, кодöс кутім шуны Тури нюрөн. Ми дыр пукавлім сэні, ылісянь нимкодясьлім туриясөн, а мунігөн öвтыштам киясөн да меліа бурсиам: «Видза колянныд, шуд вайысь лэбачьяс! Регыд ті петанныд кузь туйö и мед жö кок-нъыдөн, шудаөн, төв ньылыд лоö сійö тиян и челядьныдлы тшöтш. Бура, пötöса төвйöй шоныд муясас да тулыснас бөр локтöй чужан муаныд. Быдтысьöй, рöдмöй, турияс, миянын, войвылын! Кутам виччысьны локтан тулысö тиянös, шуд вайысь лэбачьясös.

«Кур-ли-и, кур-ли-и! Кли-ив, кли-ив!» — вель ылісянь аддзöны миянös, кылöны гөлöсьяснымös да воча шыалöны найö миянлы, быттьö аттьöалöны бур туй вöзйöмысь.

РУЧПИ



ёр арын, кор нин сиктгөгөр-
са расъясысь, Степ шор бо-
кысь, Йёнöd ковтысысь да
весиг Ванюк туй бокысь
сьолаяссö лоö мыйтакö кы-
йöма, а ёнджыкасö вöй-
сöдлöма, мян, челядльöн,
арся кыйсян пöра помассьö.

А мый сэсся вöчан? Полошитöм пöткаясыс сюсьмöны да
весиг медся мича гөлöса чипсан шы вылас оз локны.
Öтчыд чипöстчылас айыс либö эньыс: танi пö — и ланьтö.
Тöда, абу сэни сийö öтнас, дыр чипсая, но воча шыасьöм
сэсся оз и кывлы. Муна сэтчö, гöграла юр дикмытöдз, но
жбыр ни жбор — му вывтыыс, чöд коръяс увтi код тöдö
кытчö котöртöмаöсь. Овлö, дерт, и вылас веськала, но
сюсь пöтка, сэтшöмсö ми тöвйылöм сьöлаөн шуам, шпорк-
нитлас кутшöмкö вутш сайысь да пуяс косттi чукаялöмөн
ылö-ылö лэбас. И öд дэльöдчö; чипöстан — пыр и воча-
видзас, öтчыд жö. Ы-ылын. Öдва гөлöсыс кылö. Корсь
пö...

Кыйсыны-прöмышляйтны петöма, да кыз он корсь.
Муна шы вылас, тöда: пу вылын көнкö пукалö. Кань моз
восьлала, кок улын труч ни трач, дзөръяла öтарö-мöдарö,
но кужöмөн дзедьсьö, пöръялас. Ме сийöс пуясылöн улi
увьяс вылысь синмала-корся, а сийö пöшти пу йивсьыс
лэбас. Вылысь кö видзöда — сьöла морт судта вылнаысь
чепöсьяс. А бөр кö му вылö пуксьылöма, кöть лунтыр

корсь, оз сюр. Код төдас, кодарлань сетчис. Кутшөм нин вөралөм? Лунтыр ветлөдла да куш ноппөн, пусьөдтөг и лоо гортө локны. Сёр арнас гежөда йөй сьөла улө весь-кавла. Мудз локта гортө, унджыкысьсө брөд ва көтасьө-ма. Арнас өд луннас тай сизимысь поводдяыс вежсьылө: зэрыштас — дугдылө, бара зэрмылас. Көтасьөма, мудз, а кыйдөстөг гортө оз мунсьы.

— Тырмас нин сэсса, Пашө, вөравнытө, мудзсө да кын-малөмсө сөмын корсян,— жалитө мам.— Мый вердін — вердін-чөсмөддін пөтка яйнас, и олас. Найө өд ассьыныс сөйөны...

Татшөм велөдөм вылас немтор ог вочавидз, а юрө во-лывлө жө мөвп: «Збыль, тыдалө, ружьеос матичбокса көрт тув вылө ковмас өшөддыны тулысөдзыс, тар койт вылө петтөдз. Дугдас сюрны пөткаыс».

И көть збыль сідзи и вөч, но воас вөскресенньө, шко-лаын велөдтөм лун да кодкө быттө садьмөдө — водза-водз чечча, нурьясьышта йөла няньөн, сюя зептө патрон вит-квйт, накөсала юр сайті пельпом вомөн тулкаос да югдігас на и пета вөравны.

«Пажын кадөдз көть ветлөддышта, кытшовта матігөгөр пармасө»,— мөвпала.

Но кутшөм сэн пажын кад! Оз локсьы тыртөм киөн гортө — и пом. «Эсійө сикассө нөшта кытшовта и — гортө,— такөда ачымөс.— Колө лоны сэні сьөлаясыслы, колө... Пувья-чөдья местаяс өд, жыкруйтөны.

И збыль өд олөны, чөскыд вотөснас вердчөны, но абу менлы вылө чужлөмаөсь-быдмөмаөсь.

Сідзи лунтыр и гежмала пармасө ныр вылө усьтөдз, пемдытөдзыс. Гортө локта — камод вылын карасина лампа нин ломалө.

Өтчыд рытгорув Шожымка юбокса Гөгрөс яг вылө весь-калі. И вель ыджыд сьөла котыр вылө на тшуки. «Шпур-р-р! Шпор-р-р! Фы-р-р-р!» — сөмын кутіс кывны шуй-галадорын и водзын, веськыдвылысь пара кыпөдчис и.

Көть ылөкодъ лэбисны, разі-пели, эг аддзыв, коді кытчö пуксис-сайöдчис, но кыпті сьölөмөн: «Пусьöдтөг татысь мунысь ог ло! Сöмын оз ков тэрмасыны, оз ков полошитны-разöдны позтырсö,— мөвпала.— Видзöдтö, сёр ар нин, а котыр вылас некутшöм вöралысь на, тыдалö, абу весь-кавлöма, квайт-сизимөн, буди, кыпöдчисны, дзонь позтыр на. Татысь мыйкö быть лишалас. Мойвиас на, сідзкö, меным талун...»

Сетчышті бокö, быттö сьöлаясöдз меным некутшöм мог абу, ягсö сöмын кöсья вуджны. Но зэв видзчысьöмөн муна, мед оз повзыны пötкаясыс.

Ветымын кымын воськов вöчи яг шöрланьыс... И кытчö ме веськалі! Вöвлөм зэв важ керасын, гашкö, батыяс на войнаöдзыс сэтысь сортовка лэдзлöмаöсь либö кодкö керка вылö сись кодъ пожöмъяссö пөрлавлöма да нуöма. Нитш-сялөм, гөрд пызьöдз нин сисьмөм мыръяс вылас пувсö быттö кисьтöма. Пев пом гырся сьöдгөрд тусьяса гырысь розъяссьыс кустьясыс весиг куснясьöмаöсь. Нель-вит вутш вылысь, вотчыны кö, падьяныд тырö.

Шырзя медмича розъяссö, китырөн — вомö да вомö. Пувйыс шома-юмов. Ёна нин тшыгъявсьöма да сёя и сёя, пötөм ог тöд. И кымын унджык сёя, сымын нöшта на ёна вытьöй воссö. Вунöді и сьöлаяс йылысь. Кутшöм нин сьöлаяс, кор Парма-мамыс татшöм озыр пызан выв лөсьöдöма!

«Татшöм пувсö, таво көть и ёна лои вотчöма, гортö эг на вайлöй... Мамöс да чойясöс татчö быть вайöдла! Локтан вöскресенньö и волам,.. — радла-мөвпала.— Веняös чойясыскöд чукöстла и... Быдөнлы та мындасыс тырмас, ягыс со вель ыджыд!»

Вотча-сёя пувсö, ачым ог вөр, пыр öти сывтыръя вутш дїнын сулала. Киöй сöмын кустьяссянь да вомöдз вудж-расьö-ветлö.

«Шы-шы-шы-шур-шур! Кыш-кыш-кыш-кыш-кыш!» — пув росъясөн шарöдіс мелань мыйкö бианьöv сяма вуджөр

кодъ. Киос быттьо сотыштисны еджыд донөдз шонтөм көртөн либө шылаөн өдөбысь сатшкисны.

— О-о-ой, ой, ой, ой! — весьөпөрмөн горөдсис вөр тырнас. Веськөдчи-чатөртчи да гатшөн швачкыси яла нитш вылас.

Кытысь и пельклунөй! Мудзөма өд нин вөлі лунтыр вөртыс кытшлалөм-шлөнъялөмнас, но повзёмвылысь син лапнитігкості и звиркниті-сувті. Эг и төдды, кыдзи не-тшыштсьөма мыш сайысь накөсалөм ружьеос, лэптысьсьө-ма куроксө...

Кытчаныкө пу йывъяслань, енэжланьыс веськөдөм ствол пом съөлыштис би кывйөн, вөрсө шызьөдліс чорыда гып-нитөм шы.

«Эр-р-р! Эр-р-р! Ляв-ляв-ляв!» — кылі водзысь, не-ылысь эралыштөм да лявксьөм, быттьо сыркъялөмөн бөрддыліс кутшөмкө мыжысь ньөрйөн кучкөм кычан пон.

Видзөдлі сэтчань — гөрд ручпи ме дінысь чардби моз лыйыштис. Ичөтик на, еджыд тугъя пашкыр бөжнас весът кык кузьята кымын, буди, сөмын на и эм. Ручпиыс ме моз жө, тыдалө, прөмышляйтис, локтіс пожөма яг вылө да ёсь ныриснас кыліс пөтка дуксө. Налөн кок туйясыс и вайө-дісны ме вылө. Менө, том йөйыд, көнкө, мырйөн чайтіс, а өтарө-мөдарө ветлысь киясөс — съөлаөн. Көсийс ужнай-тыштны чөскыд яйөн.

Вежөрыс ичөтыдлөн чипанлы кокыштмөн на, но пинья-сыс зэв лэчыдөсь дай кокъясыс ок и тэрыбөсь! Куим-нөльысь чеччыштөмөн сійө саяліс понөльяс пиө.

Тайө пөрийө ручпины ни меным съөла эз сюр.

ДУДЫСЬ ВӨВ



едся кыв кутана да сьёкыд уджыс воліс миян пастукалан лунъясö. Ыджыд-ö котыр — вит мös да порсь эськö и эм, да вот тай... Давидлön Сюрукыс уйла кодь,

пыр шычкыртö-ветлö. Миян Сьöдпель да Веняслön Гördаныс нырсö кө виддзö тшукöдасны, көть лунтыр öти местаын йирсьöны. Öльöксанъяслön ведра ыжда вöраа Чернукыс да вуж кодь вösныд порсьыс жарсьыс да лöдзномсьыс зильöны дзевсьыны вөрö. Вот и видз разі-пели ветлысь скöтсö, быдön вösна тöждысь, мед эськö эз воштысь, да тшöтш и порсьпи вösна пов, мед кытчöкö эз сгинит. Орчча керкаысь ар джынъя порсьыс, кузь гöнащöтя, сьöд-еджыд сера, пудъя кымын польöпи энöвтчис овны ыжъяскöд да кöзаяскöд, тыдалö, град йöрын пакöститчигас унджык сюрліс мыш кузяыс ньöрйыс, либö мудзö вöтлысьнысö тэрыб кока пемöсьяс бöрся. Порсь велаліс мösъяс дінö, наысь воськов оз кольччы.

Кузьöн кажитчыліс пастучитан луныс, гажтöм öтнамлы, дас арöсаыдлы. Мукöд зонкаяс да нывкаяс öд колхозö вövъясön юр кыскавны мунöны, куртны да. Купайтчасны-гажöдчасны бурпöt.

Öтчыд вöтлі мösъясöс Нёмыд ю дорö. Берег вылыс зэв туруна, йирсьыны да йирсьыны эськö скöтлы, но оз тай. Лöдзьяс дöсадитчöмысь öтарö вөрö пырöны, он на биась да печенясь.

Коркө вель ыджыд нырдө воим. Вот сәні и киө босьті мөсьясөс. Быттьө йөрө йөрті. Оз нин, майбыр, пышйыны, көть жар, көть лөддза-номъя. Куимладорсянныс потшөс моз найөс видзө векныдик, но крут, пөшти сувтса берегыяса Нөмыд ю, а нырд помсянныс — ме. Песті вөр дорас бипур, пукала, шог ог төд: картупель пөжала, печеняся.

Мөсьяс йирсясны-йирсясны да вөрлань эськө нырйысьласны, но ме бөр нырд йывланьыс косөда. Пөтісны, куйлыштисны да бара йирсьоны.

Лун шөр бөрын мөсьяс дінө кыськө вөв воис. Төді ме сійөс, Саврас, уж. Төв ни гожөм оз уджав, со и лэдзө-маөсь вөля вылө, мед ачыс чөскыд вежөд вылас вердчө, турун оз ков сылы телегаөн ваявны.

Мен «уджйөза» вөлі тайө вөлыс, окота водзөс босьтны. Босьті кузь ньөр да көйи швичйөдлыштны пач кодь мыш кузяыс, вөтлыны ылөджык, но Саврас кыпөдіс юрсө, топөдіс пельяссө да скөрысь гөрөктыштіс: «Матыстчыв пө... Матыстчыв, нолтө...»

Повзи, чужьясьө и курчасьө да. Шыбиті ньөрйөс, пукси би дорө, а Саврас муніс мөсьяс дорө да на дінын мөдіс йирсьыны. Гажтөм жө, тыдалө, лун-лунтө өтнаслы шөйтны.

Гөрсьөм-көдзсьөм бөрын вөвьясөс луд вылө лэдзлөны турун пуктытөдз. И на дінө кө слөймас Саврас, кутавнысө пө веськыд мат: ачыс оз сюрөдчы и мукөдсө оз сет кутны. Пельпом саяс сермөдьяса верзьөма морт вылад пө көин моз услясьө, вөвсө нөйтө-курччалө.

— Яндысьтөм бугыль! — скөрала Саврас вылө, но сійө бөжнас оз өвтышт, төдө, некод сылы нинөм оз вөч.— Бур дядьө улө кө эськө веськавлан, велөдасны жө. Вузаласны кө вот чиганьяслы, вежан небось сэки өбичатө...

Ёна сійө менө кольөм төвнас өбидитіс, тшөтшьяяс водзын серам туйө лэдзис.

Колхозникъяслөн челядь, дас—дас кык арөсаясыд, гожөм-арнад ми ёна нин отсасьлім колхозлы: кыскалім вөлөн турун юрьяс, куртім, таялім зорөдьяс, вөла ма-

шина бөрын көртавлім кольтаяс, керим картупель да мукөд град выв пуктасъяс, агсасим — вөчим ставсө, мый вын серти.

Туруннад, няньнад, мый воліс трудодень вылө, миянөс эз жө кедзовтлыны.

Воліс төв, и миян йылысь быттё вунөдлісны. Гожөмнас кө бригадир миянкөд меліасис, төвнас ми сылы коп-расим. Немтор он вөч, могыд кө суас. Колө вайны турун, пес — ставсө даддьөн он берт. Матысьджыксө, дерт, сідзи и гурийөдлім школа бөрын, а ылыссыс — вөлөн.

Школаө лэччигөн, водзджык гортысь петам да, өта-мөдөс водзалөмөн зілям адзөдлыны бригадирөс. Урокъяс бөрын тэрмасям конюк дінө. Мукөддырийиыс өтчукөрө грездса пөшти став челядьыс веськавлам. Оз, дерт, миян сы мында вөлыс ков, быд семьяө — өти. Но Веняслөн, шуам, өти вөвсө кыкөн корөны, а Ольөксанъяслөн — кумиөн. Шудаөсь, коды мойвиас, а коды оз — петігас синваыс забеднөысла гөвкъялө. Мөдысь ковмас волыны. Вөлыс пө этша, быдөнлы өти лунө оз ло.

Өтчыд өтнам веськалі да, бригадир кыв эз шу, гижыштіс бумага. Көтөртөді конюк дөрө.

— Рытнас кежав, Серкоөс босьтлан,— көсийисис конюк.

Луныс төдлытөг-маитчытөг коли. Урокъяс бөрын ньөби лавкаысь нянь көрыш, муні конюшняө.

— Серко чотыштө, а мукөдсө сеталі,— нускыштіс Вань Вань.— Абу сэсся аски кежлас.

— Кы-ыдзи а-бу-у? — ырсмуні ме.— Бумага вайлі Илля Егоровичсянь. Вунөдін?

— Бумагаыд бумага на и эм,— ышловзис Вань Вань.— Абусө ог сет.— А сэсся содтіс:— Саврасөс босьтлы... Ачым көсийи аски песла кайлыны ягас, да инө мөдысь нин.

— Сав-ра-сө-өс? — падмышті ме.— Оз сійө менсьым кывзысь, асныра, шуөны.

— Эн невөлит, эн дөзмөд, да кывзысяс,— конюк пырис вөвла.— Петкөд сийөс-заводсө, мегыр, бөрийы додь.

Саврасос ме некор эг доддявлы. Йозлысь, Вань Вань-ысь кындзи, пес ли турун вайом сийон эг жö аддзыв. Коркочой паныд пес доддьон воча веськалісны. Быттьö тракторлы конюклон доддьсö сөвтöма, а Саврас ёна зэлöдчытöг и жмотіктö-кайö кыр вочасö, эз и сувтлы. Кывлі, Вань Вань пö радейтö тайö вöвсö. Песла каян рыгтьяс пö ныр улас кык таз зөр сетас, а асывнас ещö öтикöс, да висьта-лас:

«Сей, Савраско, сей. Сэсся песла ветлам, веськöдыштам кокъястö».

«Йöзыд мыйсö оз больгыны да, — такöді ачымöс, — вот босьтла дай кыскасям. Кос кражъястö гунньöдлас. Пач кодь со».

Ме петкöді доддясян кöлуй, сювъяс вылас пöрöді бокыньтöм ён доддь. Кöрт шына сювъя, пöв пыдöса, водзыс гезъя — турун кыскалан доддь.

— Ветлы зонмыслы пессö кыскавны, Савраско, — доддясигон меліасис конюк да тапöдіс шыльыд мышкас.

А вöв кывзö. Сийöсад юрсö ачыс суйис, доддь вож костад лючки пырис. Вань Вань шурк-шарк и доддясис.

— Петкöд мөздор-мөд турун да мөдöдчöй сэсся. — Но-о, Савраско, ветлöй, бур туй, — мелиа шуис Вань Вань.

Саврас вөрзис, петіс конюшня дорсьыс да мөдіс рöдтыны вöла туй кузя миян грездлань. Гуньгö-мунö, каттьö тшöкиа кокъяснас туй, öтарö-мөдарö павкнитчöм кузь бурысьыс шылькъялö сьылі вылас.

Вуджим сиктса медбөръя керкалысь öшинь увсö. Саврас ньöжмөдчис, мөдöдчис восьласон. Руйгö-мунö, кокъяссö öдва босьталö. Сё кымын воськов мунöм бöрын, видзöдліс мегыр пырыс, быттьö юаліс: «Кытчö менö вой улас нуöдан?»

Ме тöда: шоныд оланінсьыс некутшöм вöв окотапырысь оз мун, вöтлыны колö. Гортланьыс мөд делö — скачон кульöны, кутны колö, мед оз ньылöд да конюкыс оз вид, а тайö вывті нин... Шлочнитышті вöжжи бокнас вöв мыш-кö — Саврас тан сувтіс.

— Но-о, но-о, мый нө тэ! — летйышти вөжжиөн.

Вөв оз вөрззы, видзөдө мегыр пырыс ме вылө. Вөтла — оз мун. Дыр сулөдс. Лета вөжжиос — оз вөрззы. Дөзми, гаровти вөжжиос юр гөгөрпөв да кыз тай швичкөбти помнас вөвлы пач кодь задъяс. Саврас видзчысьтөмысла весиг чеччыштлис. Пыркнитис лёзь бурьсы юрнас да зэв чорыда камөбтис веськыд бөр кокнас додь синмө.

Ме, быттьө эг и вөвлы, повзёмла тёмбыльтчи додь вылысь лымйө: «Виис эськө, инмис кө кытчөкө!» Бур, мый доддьсө ёнпырысь вөчөмаось да эз жугов сьуйыс.

Коркө сайкалыштис полөмой, пукси доддьө да эг нин кучкы, а сөмын вөрзбөдышти вөжжиос да «но» шуи.

Воссис гажыс! Саврас бурпөт дзёдөдс додь сьовъяссө. Öти кокыс мудзас да мөднас камөдө. Оз тай дзенав кокыс. Көрт шынаа додь сьуйысь ли подковсьыс би сьаккйө. Чорыд лым шмоткиясыс пуляяс моз ме вылө шуркйөны. Кок увсьыс став лымсө резис-койис, тыртис менө.

Чеччи доддьысь — вөв дугдс чужъясьны. Петі водзас, көсий дом поводөдыс нуөдны — оз мун, пыксьө.

«Бергөдча! Вөвнас и ставнас!» — скөрала, но бара на мыйкө вылө надейтчысьсө. Но ог төд, мый вөчны. Вөжжиө кутчысьны ог лысьт. Бөрда доддьын, абу окота коснысө, а Саврас сулалө, кывзө менсьым ливзөмөс.

Час кык, төдөмысь, коли татшөм ноксьөмнас. Пемдс, а ми Шожым сикт помын на сулалам. Көсья нин вөли бергөдны Саврасөс гортланьыс, но сэки кылісны бөрладорсянь кок шыяс. Матыстчис миян грездын Столя тьөт ордын олысь, Тимофейөн шуөны, Шожым горулын сельполы склад тшупө. Меным нимкодь и сылы: меным сысь, мый лоис кутшөмкө надея катөдны тайө асныра вөвсө гортөдз, а Тимофейлы мудзвывсьыс оз ковмы нель верстсө мунны подөн.

— Виччан кодөскө? — юалис сійө.

— Вөв со сетисны... Оз мун дай пом, Тимофей Иванович.

— Висьмис ли мый?

— Висьмас тайӧ... Дыш! Ыръянитӧ...

— Нӧйтін либӧ?

— Ӧтчӧд кучки.

— Оз позь скӧтинасӧ нӧйтны. Вӧлыд ӧд ок тӧлка пемӧс, помнитӧ лӧксӧ и бурсӧ. Пуксыы додь бӧрас...

Тимофей лукйысьыштӧс нопъяс, перйис коляс пажын няньсӧ да ичӧтик торъясӧн дыркодь вердӧс Саврасӧс, сёрнитӧс сыкӧд, малалӧс юрӧдыс, гыжъялӧс бурысь увсӧ, а сӧсся пуксис додь нырӧ турун вылас.

— Дью, Савраско, дью-у! Мӧдӧдчылам,— босьтӧс вӧжжисӧ киясас, но эз кучки, эз весиг тракнитышт.

Вӧв вӧрзис места вывсьыс.

— Со нӧ, мӧдӧдчис... Оз радейт, кор сыкӧд скӧрысь либӧ вынӧн...

Тимофей нюжӧдӧс кутшӧмкӧ «И-и-халы ко-за-а-ки» нор сыланкыв. Ачыс сійӧ волӧма комиас Украинаысь, гортас уджалӧма конюкӧн, со и кывзӧ сылысь вӧлыд. Саврас весиг рӧдтыны-гӧнитны босьтчис.

Тӧддытӧг и воим грездӧдз. Тимофей пырис Столля баб ордӧ, а ме бара коли вӧвкӧд ӧтнам. Эг путьмы шуны, мед эськӧ куйм керка костсӧ кольӧдыштӧс. А гашкӧ, эг и кӧсйы мудз мортсӧ ӧтарӧ-мӧдарӧ новлӧдлыны.

Саврас крута бергӧдчис да вӧсьса дзиръяӧд пырис Столля баб йӧрӧ: воим пӧ, лӧдзав...

Ӧшинь улас бергӧдчынысӧ некыт. Скӧрми да горт дорӧ веськыда лымтӧыс веськӧдӧ. Джуджыд лымъяд эз сувт, вӧйӧмысь полӧ да йӧра моз кульӧ лымтӧыс. Доддӧ потшӧс заворас крукасьлӧс да муртса эз пӧр. Кыкнан киӧн ша-шаритчи додь подъяс. Столля баб дорын нянь тупӧсь доддын на вӧлӧ, а горт дорӧ вои да абу нин. Код тӧдас кытчӧ лым пиас гудрассис да коли.

— Вӧв вайӧдӧ,— висьталӧ гортсаяслы,— отсыштӧй лӧдзавны да йӧртны гидӧ.

Мам да ыджыдджык чой пасьтасисны да пыр и петӧсны отсасьны.

— Лымйось тай вöлыд, кыті нö локтін? — пыр и ка-
зяліс мам нелючкиторсö.

— Йёртыс келіс. Столля баб дорö кежодіс да... Кытчöкө
нянь көрыш воши и... Асныра вöv...

Лэдзалім вөлөс, гидö пыртöдам — оз пыр. Кутшöм
вövъяс сöмын сэні эз узылыны, а тайö оз пыр. Лясниас
пыртлі турун, гидсö югзьöда пöнарөн, оз пыр дай пом.
Дыр ноксим. Ме нин кынми, мудзи. Сэсса мый вынысь
тракниті дом поводöд. Вöv бырснитіс-пырис гидö.

Кыскасьöм вылө лосьöдчöма, да турунсö, майбыр, эг
жалит, лясни тырыс лэдзали. Мед сөйö, асылöдзыс бур-
мас этшыс.

Ачым сөйтөг и унмовси паччөрö.

Вөтөн став пессö, во гөгөр кежлө, кыскалім. Саврас
тэрыба ветлө, ректысьны отсасьö: песовтас додсьö бок-
выв — пескыс колана местаö ачыс киссьö.

Садьми да бур вөтысь чөскыда нюжөдчылі. Но юрö
воис төрытъя локтөмөй да өдйö көмаси-пасьтаси.

— Узыштін на мед... Дөнзяс на кузь луннад пестö
кыскавнытö,—жалитыштіс мам.

— Кутшöм узьöм, нянь көрышöс колö корсьлыны. Нянь
өд воши, нянь!

Посводзысь босьті көрт зыр, лампа да петі звөз помö.
Чöv-лөнъ вуджи карта сайясті Столля баб йөрö. Видзөдлі
кильчö дорьяссö, вöv додъ туйöд кодысьшышталігтыр
ньөжйөнник локта гортлань. Надеяö нин воши: «Кутшöмкө
понлы сюри», — маитча.

Но шудöй вөлöма на. Кодыышти, да нянь тупөсьыд
брынь мыччысис. Горт дорö матö усьöма, төкөтьö лымнас
и тыртыштöма. А зэв эськө жальөн коли, эз кө сюр. Сэки
өд, карточка вежөмсянь мөд воас, зэв на вөлі сьöкыда
сюрö лавкаса няныс: кузь өчередьяс ковмыліс сулавны
нянь тупөсь вылө.

И со нин чойкөд петім доддьясьны. Петкөда вөлөс
картаысь, но ляпкыдик өдзөсөдыд Саврас оз көсьы
воськовтны порог вомöныс. Тракий, тракий дом поводöдыс

да коркө и петіс жө. Мөді сийөсавны вөлөс, а сийө лэптис юрсө, ог судз.

— Петкөд сөчөнъяс,— шуа чойлы,— тэ верд, а ме сэк кості сийөсала.

Чой өдйө пыраліс керкаө, петкөдіс сөчөн да торйөн-торйөн ки пыдөс вывсьыс вердө Саврасөс. А ме сийөс и виччыси: шырк — и сийөсүд вөв сьылі вылын нин. Öдйө бергөді сийөс, мед копыртөм юрсьыс бөр эз шывгысь, лөсьөдышти бурьысьсө да боксяньыс, мед оз чужыы, мыш вылас павги шлиясь, а сэсся өдйө гаровті бөж улас. Додь вож костө Саврас бура пырис. Доддясим, но вомкөртавны эз сетчы. Көртсө оз босьт вомас. Лэптис юрсө да весиг сөчөнөн эз ылав. Öдва бөрсө и пысали клячсө сермөд кольчаас.

Мөдөдчим пєсла куимөн — мам да чой тшөтш. Саврас оз тэрмась вөрад, руйгө-мунө. Ме сийөс ог жө тэрмөдлы.

— Вөтлышт, кынтан туй вылас,— оз терпитсьы чойлы.

— Тише едешь пө, дальшө будешь,— рочалышти.— Пукав, а кынман кө, додь бөрас котөрт, өдйө шоналан.

Ён вөлыд бувс-бовс, йөра моз пырис чипас дорө, бергөдчис. Сувтөді Саврасөс, ныр улас сеті моздор турун, вөжжисө пысали джуджыдкодь важ мырьө. Кырсьыс усьөма, но видзөдлас серти лы кодь ён. Лөсьөдышти лым вылас додь, вөйтышти сюв вылас талышталөмөн, мед оз ло пөлөс, краж чукөрсө весалим лымйысь, да мөдім сөвтчыны. Мам да чой водзас, а ме өтнам — бөрас, йывсяньыс лэптала кражъяссө. Меным тыдалөджык, да командуита.

— Лэп-тім, өп-па-а!.. Этайө кызсө дорас... Тайөясөс шөрас тэчам... Этайө бара кыз, тайө дорас буретш лоө.

Додь синмөдзыс нин кражъяссө тэчим.

— Тырмас нин, буди? — юалис мам,— выль туйөн өд петнысө. Падмас.

— О-о, он төд тайө вөвсө, трактор кодь вына! — ошкышти Саврасөс.—Куим-нель краж ещө пуктам...

— Но сэсся и шань,— бара шуис мам.— Мыччы гезсө.

— Этійө өти кражсө... Медвылас, сигөртны,— босьтчи помас.

Краж помыс йылөдыс менам лыбис, а водзыс мам-
лөн — эз.

— Лэп-төй, өп-өп! Н-но, н-но! Босьтлөй! — горөді.

Эг и төдды, кызди тайө артмис. Додь швучкылө вөрзис. Краж пом дїзмуні-уси кок вылө, сотыштїс водз чуньсө. Чой тутөма лымьяс. Мам век на кутө кражсө помөдыс, а вөв бувскө-петө юж туй вылө. Видзөдлі — мырйыд бок вылас. Улітіыс сїсь вөлөма да чегөма.

— Вөтліс өд вөвтө, вөтліс! — чеччис да лөвтө-лыддьөдлө чой.— Горшасин? Вөтөд да бергөд өні вөвтө... Сїсь мырйө со и домыштлөмыд...

Вензыны вөлі некор. Ме уськөдчи вөв бөрся да өдва и суөді, юж вылас петігөн нин. Додьсьыс көртавтөгыд джын пескыс усялөма. Пукси доддьө, судзөді туй бокөд кыс-сьысь вөжжи пом.

— Тпру-у, тпру-у! — горза да мый вынсьыс зэлөда вөжжи.

Сувтөм пыдди вөв кутіс котөртны. Көртавтөм кражъяс гылалөны, туй кузялаыс көдзи. Öти кыз краж, сы вылын пукалі да, воис горт дорөдз.

Öшинь улын бара на песі вөлөс, көсийи кежөдны звөз дорө, но Саврас мөдарө бергөдіс юрсө, конюшнялань, да эз и ньөжмөдды воськовъяссө.

Быд туйвежын зіли бергөдны вөлөс, но весьшөрө: сійө ыззис да кыккокйив кутіс кульны гортланьыс, тэрмасьө вөсни гөлөса аслас чаньяс дінас, зөр сөйны да.

— Мыйкө нө Савраскоыс менам уджаліс эз? — конюшня дінө водз воөмөс аддзис да юаліс конюк.

Вирөй пузис тайө тешитчана юалөм вылас:

— Уджаліс тай! Смекайтчан сэні! Калбас вылө колө катөдны тэнсьыд вөвтө. Көиньяс мед косявласны ли! Грөш дон оз сулав татшөм вөлыд.

— Э-э-э! Оз на сійө кыскасьөм вылө зөрсө сөй, мөдтор вөсна на сійөс видзөны,— босьтчис ошкыны Савраскосө Вань Вань, но ме сійөс эг кывзы, өвтыштї киөн да лэ-дзавтөг и коли вөвсө.

Сійö лунсяньыс, думысь, нэм кежлö, синмөн мед от адды, сэтшöма лөгаси Саврас вылö, но со тай, локтис кыськö, йирсьö мöсьяскöд, а ме, быттö артмö, конюкала, тшöтш видза сійöс мöсьяскöд öтлаын.

Рытланьыс нырд помö петисны кык ыджыд руд пон. Эг кö эськö кывлы луннас налысь увтöмсö, чайтi кöинъясөн. Вöрас кодöскö ёна вузöдисны. Тыдалö, ыджыд, водзсасысь зверöс: сёйöмөн сёйöны, чепсасыöны. Сэсса вочасөн гөлöсьясыс ылысмисны да лөнисны. Воисны, кодкö быттö корис найöс. Повзи. Вувзьясысны кö, дорйысьны нинöмөн. Но понъяс ме вылö эз и видзöдлыны. Найö казьялöмаöсь порсьöс да уськöдчисны сы вылö. Порсь весьöпöрис, котралö мöсьяс гөгөр. Дзикöдз звермисны понъяс, вöйсöдлісны и мöсьясöс.

Давидлөн Сюрукыс чеччыштiс крут берег вывсянь Нёмыдö да вуджис мöдарас. Сы бöрся ваö чеччалісны и мукöд мöсьяс, а медбöрын — порсь.

— Ой-ёй-ой! Порсьсö вöйтисны, вöйтисны зверьясыд! — горöдi ме да беддöн уськöдчи понъяс вылö. Эз тай повзыны, вузöдисны и ме вылö. Вот-вот косявласны. Синъясныс виж биөн öзйöны, беддысь неуна польштöны да кытшлалöмөн усьласыöны. Кыкыдлы воча дыр он воют, а отсöг виччыны некысянь.

Мöд киö босьтi тшынасысь гөлöвня да дзик бипур дiнö мышкөн сувтi. Биыс мышсянь оз-ö видзышт, кöть нин веськыда уськöдчöмсыс.

Друг гораа гөрöктiс Саврас, тыдалö, ёна дөнзис татшöм зыксыс, кöть сы вылö понъяс и эз усьласыны. Сійö сувтліс бөр кокъяс вылас, пыркнитчис да кыккокйив зырöдiс понъяс вылö. Пиньяснас кöсйö курччыны, кокъяснас таялö-чужйö. Öти понйыслы, тыдалö, инмис. Сійö лэбовтiс ылö бокö да ляззiгтыр, быттö кульöны кучиксö, усйысис вөрö. Мöдыс, öтнас коли да, быттö эз и вöвлы, öдйö жö пышйис.

Мездми да котöртi берег вылö. Мöсьяс руза-разакылісны ю мöдар вöрын, а порсь, тыдалö, вöйис. Мöсьяс

крут берегтіыс кайомаось, а порсьыд сэтшөминтіыд оз кай. Сэссия дженьыд кокъяснас сійо, дерт, и вартчынысö оз сяммы.

Которта Нёмыд пөлөн горув. Нырда помөдзыс вои. Берегыс сэсянь ляпкалө водзланьыс. Порсь оз тыдав, ни шойыс оз кылав. Котортышти водзөджык и берег дорсьыс рукөстөм шы кыліс, а сэссия и кузь туруныс гывны пондіс, ылысмө месянь.

Өдйө вуджи юсө, видзөда — кок туй, лыа вылас порсьыд васьыс кайома да мөсьяслань котөртис: туруныс берег вылас кышакыліс-гыаліс. Котөрти кок туйөдыс да өдйө и мөсьясөс аддзи: вөрас ылокодъ нин пырөмаось, мунөны и мунөны, тшак корсялігмоз.

Вөтлі мөсьясөс вөрысь, вайөді лыаа лажмыд берег ылө да келөді юсө... Порсьлы эз эськө вөв окота ваас пырны, но өтнас коли да кытчө воштысяс. Буз чеччыштіс ваө, вөйліс, бөр кыпөдчис ю шөрас нин, чушнитіс, бара вөйтчыліс да торпеда моз пробка нырыс тшукис нин мөдар берегас. Ёна и повзылі, а зэв на и өдйө, аслысногөн вуджө порсьыд ватө.


Бөр вайөді мөсьясөс нырда йылө. Саврас абу на мунөма, йирсис важ местаас. Ме перйи сумкаысь пирөг да видзчысьөмөн куті матыстчыны вөв дінө.

— Н-на, н-на, Савраско, на-а, мездысьөй. Дорйин, да ставыс со лючки-бура помассис,— шуала мелі гөлөсөн, а ачым пыр матыстча сы дінө, пыр сибөдча.

Саврас кыліс менсьым гөлөсөс, лэптіс юрсө да ачыс мөдіс локны мелань. Сувті. Вөв надзмыд воськовъясөн матыстчис ме дінө, исыштіс ки пыдөс вылысь мөс выя пирөг тор, босьтіс небыд вом доръяснас, дыр няклясис. Посни торьясө пыригтөм пирөг дыр тырмис чөсмөдлыны вөлөс. Кор няныс быри, вөв исыштіс юрсийөс, пуктіс менам пельпом ылө юрсө да ыджыда, быттё став морөснас и рушкунас, ышловзис.

Мем кажитчис, быттё тадзи вөв мынтөдчис ме ылө коркөя лөгасълөмсьыс.

РОЗА



колаын велөдчигөн, көдзыд төвсә лунъяснас кольччывлі узьны Зось Миш Саш ордө. Өльөксаннас, тыр нимнас, сійөс велөдысьным, Нина Степановна сөмын шулывліс, а став челядьлы зонкаыс — Саш.

Нырнымөс вурун кепысь пиө дзевөмөн өдва и воөдчам Сашъясөдз. Маша чойыс, коді көрт туй вылын уджаліс, гортас локтас да менө оз нин лэдз аслам грездөдз.

— И думайтны эн лысьт. Ог лэдз шоныд керкаысь. Турдан кузь туяс (кузь туйыс куим верст и вөлі эськө). Счас, картупель пуа. Роч няньон, көза йөлөн — ок, чөскыд!

Мөс йөв дінө велалөм мортлөн медводдзаысьсө менам весиг юрөй дикмыліс, көза йөлыс дурмөдыштис быттьө. Өльөксанъясын и узим, а сэсся и мевъялі сэтчө. Көза йөлыс чөскыдөн кутіс кажитчыны. Мөс йөлыд рушкүтө, ловтө тыртө, а көзаыдлөн тшыгмөдө, но сөнтъясад вируд өддзалө, выттьөд воссьө. И тешкодь — көза йөвсьыс быттьө ывла көрнас өвтө.

Висьталі ме коркө та йылысь Сашалы, а сійө — чойыслы крапкис.

— Бур баля Валь Ольга сетліс. Карельскөй рөд. Ыстылөмаөсь сійөс татчө. Нывбабаыслөн озырлуныс — көзаыс сөмын и вөлөма... Бальөөн на моздорас вайөдлөма...

...Нелямын сайө во коли тайө кадсяньыс. Уна журналъяс лыддылі, көні ошкөма и карело-финскөй көзаясөс, и уна

йөла ангорскöй пөрөда. Паськыд Казахстан степьясын кымөр ыджа стадаясын юрнуөдысьяс пыддиыс видзөны көзаясөс. Найө и кок йывсьыд пөрөдысь шорьясөд медводзын вуджөны, и туруна местасө пө корсьоны. Но митян, Комиын, көзаясыд вөліны дивө пемөсьясөн. Война кадся тайө «мөсьяссө» сөмын мырдөн гортсьыс вөтлөм йөз и вөдитісны. Бур сьөлөма коми войтыр ас борд уланыс босьтісны татшөм йөзсө, а найө, мыйөн-кыз вермисны отсалісны и комияслы.

Со и Öльөксангьясын узьлігөн сьөлөм вылө воисны миянын дивө кодьөн на кажитчысь видзанторьяс.

Öльөксанлөн Маша чойыс и чуйдіс менө рөдмөдны тайө пемөсьяссө, ошкис быд ногыс: көрым пө — сөмын корөсь, а сэсся йөв и яй аслад.

Зось Миш Сашлөн көзаяс йылысь, дерт, сьөдмөді, тыдалө, мам-чойяслысь пельяссө. И йөвсө ошка, и пемөсьяссө. Рөдмөдам, шуа.

Ыджыдджык чойяс тасалөны менсьым көсьөмөс.

— Град йөр куштысьяссө нө нин мыйла? — синсө сувтөдіс Рая чойөй.

— Мед вайөдө. Аслыс и видзны ковмас град йөр куштысьсө. Майбыр, Модя-Веняыдлөн и мөдасны гөгравны паличьясыс көза юр вывтөйд, пырасны кө быдтасьясыд налөн град йөрө.

Мам миян вензьөмө некор эз пырөдчывлы, но кывзас-кывзас да ассьыс кывсө шуас жө: оз, оз пөперегөн, а чойяскостса сёрниысь шөр мөвпсө ошкыштас либө менамдор керыштас.

— Пашө пиө-ө... Валь Ольгаыскөд өд вөв бөрся вөв гөрлывлам, шердын на шердын көдзам... Гөститөдліс и көза йөвнас, кор керка мыш выв колхоз муяссө көдзлім-пуктылім. Вайөд инө Зось Миш Сашыслысь көзаписө... Быдтам...

Выль во водзвылын миян төвся жырыын тотшгьяліс нин көза бая... Но мыйлакө корөсьын кышөдчыштис сөмын

менам школаысь локтём бёрын, кор ме сы дінын бергала, мыш вивсё гыжъяла-мольода. Мам казялёма жё тайос да вежон мысти и вайөдіс Валь Ольга ордысь ай көзаписё. Розаос (тадзи нимтім Сашлысь кудриа плешка еджыд кымёса руд көзапиёс) быттьё вежисны. Лунтыр, тыдалё, лэчыдалоны. Локта школаысь — корёсьыс сёмын діныс кольёма, кровать вылысь эшкынтё лэдзёмаось, лабичё бөж увсьыс өрешкисё лэдыштёмаось, косьёма нин. Пакө-ститчыны и модісны, быттьё понпиян — эшкын пельёс сёйёмаось... А нөшта и көздөдіс... Лэччөдны, эськө, картаё, мөс дінё, но люкыштны, тальыштны да дойдны на өд вермас ичөтъястё. Ас оланінын, төвъян жырйын и видзам, көні и бергөдчынысё некөн, но пон ни кань, на пыдди — көзапиян...

Юрө воис Сашлөн мөвпъясыс: тренируйтны пё колё көзапиянөс. Люкасьны велөді... Чеччавны, мед град йёрын палич найос эз суөд. Рыгъясын. Лэпта кыкнаннысё кровать вылө, матыста дорланьыс дай йөткышта. «Бе-е-е!» — шуасны. Доймыштёны ли, геройствонас ошйысьёны ли... Сэсся пызан вивсянь, паччөр вивсянь моді чеччөдлыны. Быдымьштісны нин да. Сэк кості посводз ув лөсьөді, турунысь чом вөчи. Сэтчө и лэччөді көзапиянөс. Тренируйтны, паччөрсянь джоджө чеччөдлыны сёмын и катөдла керкаө. Гидас гоз бадь корёсь лун кежлас, а вой улас шоньд помөйөн юктала, чөстала на нөшта, вичмөдыштём нянь шамрала, йөвтор солькнита...

Тулыс кежлө менам көзапиян пидзёс кырылөдз быдмисны. Корёсьыс умисны — пипу вожъяс вая. Войбыд gryмгасны-йирасны кырсьсё.

Вөля вылө лэдзан кад воис. Петкөді Розаос да Тегурайос вольной свет вылас, көсья дзирья восьтны, а найө — скок, скок да юр выв судта потшөс вомөн сёмын и звиркнитісны, а сэсся котральштісны өшинь улын да котөртісны раскө.

«Но, Модя, школаысь локтігъясё менө лымын туплялөмсьыд менам көзаяс косөдасны тэныд водзөстө:

галанка ни сёркни он аддзыв, — радлыштї аслам быдтасъяс вылө видзөдїгтыр. — Куштасны градтө, а мун да кутав тайөясөс».

Важысянь грездын тадз вөлі: йөрө пырөм ыжөс, мөскөс босьтөны пленө, вайөдасны гортөдзис, а сэсся нин арнас мынтысян — галанкаөн ли, сю кольтаясөн ли: мый пөтравитасны.

Коли тулыс. Гожөмыс арлань кутїс катовтчыны, а көзаяс оз и думайтны косөдны Модялы водзөс, куштыны град йөрсө. Вөрас, раскас, видзөдтө, шыранькытшыс да том пипу-бадь вожъясыс налы чөскыдджык. И ыжъяслөн көзьяинъяс лоисны. Водзтї найө вөлі йирыштасны өшинь увъясысь турунсө, водасны гож сайө да лун-лун куйлөны-поиктөны, а көзаяскөд стадитчөм бөрын вөрорысь эз кутны петавлыны. Менам көзаяс налөн командиръясөн лоисны... Ыжъяс рытнас Тегурай да Роза веськөдлөм улын ставных локтөны Матвейлөн кильчөувса өдзөстөм гидас да сэни и узылөны.

Кынмалөм бөрын менам көзаяслөн синъясыс аддзөмаөсь жө Модялысь сёркни градсө... Пөръялөмөн ли мый, но Роза и сюрөдчөма сылы. Модя и босьтөма сійөс пленө, шлөндайтыштөма көнкө, а сэсся локтїс өшинь улө да горзө:

— Пашө-ө-ө! Ванька Паш кок пөлө-ө! Розаыдлысь юр донсө өни вештыны ковмас. Пленын сійө менам. Град йөрө пыралөма, став корсө йирөма, мездор сёркни нетшыштөмасө гортө пыртї..

Мунім гид дорас. Жаль меным Розаөй, но гидыс, видзөдам, тыртөм. Вөснъыдик өдзөсыс торпыригын, чагйө быгтьө кодкө лэдзөма... Тайө Тегурайө аслас ён сюръяснас мездөма тадзи ассъыс чойсө да найө сэсся өтлаын и мунөмаөсь Матвейлөн кильчө улө ыжъяс дорө.

Мөд луннас Модя, Веня да ме лунтыр выль өдзөс вөчим. А Роза Тегурайыскөд быдмисны. Роза чөскыд да уна йөла пемөсөн лои. Мөс джын, мам шуөм серти. Төвнас посводз

улын, көдзид гидын и олісны. Лун космысь пипу йывъяс дадь кузя кражъялөмөн вая — войбыд и лунтыр гримгöны-йирöны кырсьсö.

Мöд вонас көзаясöс кутіс видзны Модя, а сэсса и Веня. Во вит-квایتөн грездын пöшти быд семьяын лöсьöдісны көзаясöс. Йöв вылас, дерт, быдöнлөн мöсьяс тшöтш вöліны, но көзаяс дорын бура кутісны овны-рöдмыны ыжъяс. Грездса став олысьяс ас вурунысь кыём-гындөм кепысь-валегіөн ветлісны.

ЛЫСКО



р дас нёлыд вöлі нин меным, кор куті лыддыны ачымöс вöра-лысьөн. Пищальöс пельпом сайын куим тулыс-ар нин вöдиті: койть-яс выlö ветлывлі, ур выlö петав-лі Шариккöд — пöрыськодь нин понкöд.

Кор менам эз на вöв пищальöй, Шарик видзис шышгь-ясысь керка-карта, а ружье ньöбöм бöрын сылөн содіс ещö öти, вöралан удж.

Лым усьтöдз, кытчöдз урыс эз на кепысясь, Шариккöд урöс удитам кыйны, а мыйöн кöдздöдас, гөнсялас сылөн кок пыдöсьясыс — Шариклөн кыйсьöмлы воö пом. «Урыс кепысясис, — шуасны пöрысь прöмыслöвикьяс, — öні сійö понтö бöрйыны кутас. Кодлөн понйыс бур, сійö джуджыд лымйöдз кисьмöм-воöм небыд зарнисö пармаысь лаз тыр-нас кутас вотны, а кодлөн бöбджык да ныристöмджык, сылы пищальсö матич бокас ковмас öшöдны».

Менам пöрысьславывнас нин велöдöм понйöй лым усьöм бöрын кызвыннас ройö жö увтіс, но ме эг дышöдчы, эг öшöд пищальöс стенö. Шарикöс «отпускö» эг лэдз. Быд шойччан лунö вöрöд шöйті-бовъялі, грездгөгöрса пар-малөн медаыс пельöсас, мудзöм-кötасьöм выlö видзöдтөг, келалі. Шуласны тай: «Ветлысь пötкаыдлөн кок пыдöсыс куш, но кынöмыс пöt». Уна кыйдöсөн эг воывлы, но съöла-тарөн мамöс да чойясöс тшöкыда чöсмöдлі, а корсюрö и дозмөр на вайлывлі. Шарик жö, дерт, увтіс.

Радлуныд вöлі сэки: понйöс кутла и окала, пажынысь медся чöскыдторсö сылы, вердысьлы да эмбур видзысьлы, сета. Шариклы, дерт, нимкодъ жö татшöм здукъясас, быттьö нюмгъявны мöдлас и ошйысьыштö: со пö, увтöдi.

Понтöм вöралысь ногö ме, дерт, унаысь шудаджык вöвлi, но бур ёртөн Шарикöс ог жö шу: полысь. Сэтшöмөн чужлöма, либö вөр-ваыскöд, сэтчöс олысьясыскöд сёрөн тöдмасис и та вöсна морöс кудъяс смеллунсö да збойлунсö этша нин удитiс чöжны, но пармаöд ветлöддiгөн син улысь шоча саймовтчылис.

Öтчыд йöраöс аддзыли. Сöмын на сийö чушнитiс, чапыштiс нитшсö воддза кокнас, а Шарик сэтшöма повзис, мый лунтыр сэсся коклябөрöс таялис. А ош улысь кö менö ковмас мездыны, сэки мый? Гортöдз лявксигтырйи пышъяс, а ошкыс менöс сёяс? Вöрад öд быдсямаыс вермас лоны. Сiдзкö, колö лöсьöдны бур пон, кодi эськö и ныриса вöли, кужис корсьны кепыся уръясöс да тулангъясöс и, ковмис кö, вермис сетны кöзяиныслы отсöг. Но кытысь босьтан сэтшöм кычансö?

Орчча сиктын ош кыйысь Никöнор олис. Бур вöралысь, куим понйöс видзис, сибирса лайкаяс пö, ош вылö увтöны, но сы дiнö эг шыöдчыв: кывсьылис, некодлы пö оз сет кычангъяссö.

Öтчыд, рыгъядор, паныдаси Никöноркöд вöрын. Сёрниö воим вöралöм йылысь, а меным ошйысьны нинöмөн — тыртöм лазйöс öд ог петкöдлы.

— Аддза, зонмö, весьшөрö келаланныд, — жалитыштiс Никöнор. — Воштöма понйыд ныриссö. Выльöс колö быдтыны, а тайö дасьсö сёйысь нин сöмын.

— Кысь öд сийöс, бурсö, босьтан, а лагъя пеляыд мем оз ков.

— Волы аски ме ордö... Бусколысь кычансö сета. Синма и пеля нин, керкаö пырысь вылö лявксö, посводзсянь кылö... Кöсийи эськö аслым быдтыны, но гöтыр оз нин тшöкты нельöдсö лöсьöдны... Мöдлы кö эськö эг сет, а

тэныд, видзёда да — колё... Батъыдкөд бур другъяс вёлим и... Волю инё аски, кытчөдз мөвпөс эг веж. Мамыслань кө мунас, бур пон лоё. Буско со урсё медуна увтё и ош вылө медводзын вузөдө.

Никёнон сэсся немтор эз шу, чеччис мыр вылысь да бөрас видзөддытөг мөдөдчис аслас туйөдыс.

Менам тайё луннас сэсся вөравсис жё, веськөдчи горт-лань.

«Со өд, ачыс вөзйис, а кори кө, төдөмысь, эз сет. А сылөн кодъ понйыс меным эськө ёна колё, ок, ёна колё. Öтнамөн вөралігөн бур төварыш эськө лоё».

Локтігчөж кычан йылысь мөвпалі... «Мый на ещө өд мам шуас мөд понтө лөсьөдөмысь?»

Гортын өдзөс восьтігмоз на и юалі мамлысь:

— Ма-ам, Никёнон кычан көсйө сетны... Лайка... сибирскөй рөдысь пө сылөн понъясыс, ур и дозмөр, и ош вылө увтөны... Босьтам, а-а-а?

Лов шыөс кутөмөн виччыся воча кывсө: «Тшөктас оз, тшөктас оз?...» — нөйтчө көсича сөнын вирыс.

— А Шарикыд нө оз нин туй? Неважөн на ошкин-а... Кор кык уртө да дозмөртө вайин.

— Ша-а-арик, — нюркниті воча. — Пөрысьмө нин сійө. Лун шөр бөрын и мөдас коклябөрөс таявны. Көнкө кө тур-тармунлө, сөмын сэки и чепөсйылас. Ныристом нин. Босьтам, а-а? Ма-а-ам?

Шарикөс ошкылі ме сөмын сэки, кор эг дзик тыртөт волю вөрысь да кор и сійө кыйдөсас тшөтш пуктывліс кутшөмкө пай, а унаысь и норасылі: «Талун кыті сөмын эг ветлөддөй, а вомсө эз восьтылы». Либө мөдарө, скөралі: «Витысь өд пөръяліс, витысь!» Та вөсна мам важөн төдіс, кутшөма петө менам вежөй бур пон вылас, да сетчис:

— Босьт инө да быдты. Шарикыд синма-пеля на да сы дінын өдйөджык велалас и. Вайөд.

Нимкодөйла сывйыштлі мамөс да котөрөн мөдөдчи өдзөслань:

— Талун и вайёда. Мед оз жё кодкё водзав.

— Йёюк, аски вайёдан! Кытчё нё вой улас мёддочан? Он кё вот пёрччы ва паськёмьястё, кай паччөрё да шонтысь! Кынмёдчан-келалан. Ассыныс на зверь-пёткаыс сёйёны.

Кызкё тай коли жё войыс. Вётаси весиг кычансё. Ичөтик, вутш юр вомён на оз вермы чеччыштны, а ошкёс со кутіс увтны. Гөлөсыс кыз, дзик Шариклөн кодь... Садьми — өшиныын лөз югыд нин. Кильчё вывсянь, кыла, Шарик увтё. Сылысь гөлөссё и кывлі унйивті.

Школаё мунігөн мам сетіс дас шайт. Көть пё и оз кутны босьтны — сет, мед нин овмёдчас да бур пон лоё.

Сійё луннас школаё, дерт, эг ветлы. Кутшөм нин велөдчөм пырас юрө татшөм шуд дырйи. Кычаныд сюри да пыр и бергөдчи гортё. Мед оз кынмы, питшөгын вайёді. Гортын пөттөдзыс верді пөжөм йөлөн, чом лөсьөді, Лыско ним сеті — лунтыр сыкөд нокси.

Быдыштіс Лыско да быд лун сійёс куті вөрөд новлөдыны. Радейтіс вөртө: сөмын и котралё, сөмын и исасьё. А төлысь куимён пыстаясөс да мукөд посни лэбачьясөс нин кутіс увтны. Да сэтшөм яра, коставлытөг сэтшөма кисьтё-увтё — став вөрсё шызьөдө. Ещө быдыштіс дагырысьджык лэбачьясөс кутіс вермыны корсьны, кеняясөс увтё. А кеняыд оз радейт увтөмтё, «ке-е, ке-е, ке-е», — киргыштас мисьтөм гөлөснас да ылёкодь лэбас. Но Лыско оз кольччы — здук мысти мөдлаын нин увтё. Сэтчөдз лэбачтё дөзмөдас, мый кенялы мөд вөрөдз ковмас лэбзыны. Сэки нин Лысколы быть ме дінө лок, оз кё кодөскө мөд увтанторйёс аддзы.

Коркө, тшак вотігөн, гөрд урөс кок улысь повзьөді. «Цоп, цоп, цоп», — видчыштіс ур да каттысис сой кызта ляпкыдик пипу вылө. Чуксали Лыскоёс, петкөдлі урсө. Ок и мый жё кутіс вөчны понйөй, кор чужйышті пипуас да пашкыр бөжа зверыд клысьмуні-чеччыштіс орчча кыддзё. «Ляв, ляв, ляв! Ляв, ляв, ляв!» — быттё бөрдны мөдіс понйөй, а ачыс вылө-вылө чеччыштлас, пуас мөдлас кайны.

Пуо кайны да кырсьо сарпавны, дерт, ог лэдз, кывлі, тшыксьо сыысь понйыс, а чеччаломсьыд, верстяммас да, ачыс овсяс.

Бурпөт сеті Лысколы увтнысö, а сэсса окота лои сюсь-лунсö тöдмавны. Корси кызкодъ бедъ да кучки кыддзö. Урыд — коймöд пуö. Повзьöдi бара. Сэки урыд мöдöдчис палöдны бианьöв моз, быттьö лэбö. А Лыско и збыльысь думайтiс, мый урыд кеня моз жö лэбис, да чепöсйис водзö. Воштiс, дерт, уртö, дикъялö öтарö-мöдарö. Öдва и верми чуксавны да бөр индыны вошлöм урсö. Тадзи некымынысь вöчлi, но быд пöрйö, кор урыс кутас пуавны, уськöдчö водзö да пыр и воштö зверсö. Урыс кык-куим пу вуджас, а Лыско öдöбтас да ветымын воськов водзö котöртö.

— Тшыкöдi ме сийöс кеняснад,— скöрала ас вылö.— Кеняыд лэбалö, а том йöй понйыд чайтö, мый и урыд сiдз жö лэбалö.

Мыйкö жö мучитчи-нокси понкöд. Гожöмбыд. Уръястö, сийö онас волiсны да, луннад дасöс кыпöддас, но сöмын на зверыд кутас палöдны, пыр и воштас. Мый сэсса вöчан, сэтшöм нин пöсь сьölöма понйыс да. Шариклы аттьö, лабутнöй пöрысь понйыд кызкö-мыйкö велöдiс жö синйыны аддзöм зверсö. Лыскоöс вöралан понйöдз ар кежлас вöчис: сизим тöлысьөн пармаö вöравны нин петiм. Куимөн ветлöддам. Лыско уртö пыр и аддзас, а Шарик, пöрысь понйыд, аддзöматö оз жö вошты. Водас пу улас бокöджык, кысянь туган йывсьыс быд ув тыдалö, и увтышталö öтчыд-öтчыд: «Тан! Тан! Тан!» Сöмын сэки бырлö терпенньöыс, да öддзылö увтнысö, кор чургöда ружье стволöс вывлань. Тöдö, вот-вот гымöбтас лыйöм шы да пу йывсьыс яй тор усяс, кодöс пыр сылы öтнаслы сетöны.

Кор кутим куимөн ветлыны, ур яйтö, дерт, кык вылö мöдi юкны, но Шарик эз вöв горш понйөн да оз и видзöдлы, кодарö шыбитöны ур тушалысь мöд джынсö.

Терпенньö Лыскоöс велöдiгөн, дерт, ковмылiс ыджыд, но тöлкыс сыысь лоис арöс тыртöдзыс на. Пармаö петöм

бöрын тöлысь мысти сійö ачыс нин корсис да увтöдлiс дозмöрöс. Вийöр на, дерт, но век жö — абу сьöла.

Öтчыд, тайö вöли ноябрь шöрын кымын, понъясөн ме вöралi Нöвина шор дорын, гортсянь километр вит сайын. Войнас усьöма ки вомлöс судта пушыд лым. Асъядорсö, мунигөн на, нимкодяси, мися, зверь-пöткаыдлөн татшöм луннад кок туйыс книгаын шыпасьяс моз кутасны тыдавны. Но водз тай радлыссьöма. Оз вöлöм радейтны поводьяыдлысь крута вежсьöмсö пармаын олысьяс. Лун шөрöдз гежмалi, но ур ни сьöла кок туй лым вылысь эг аддзыв, кöть тайö местаяссьыс и сьöла котыръяс кыпöдлi, и понъяс ур увтлiсны. Но выль лым вылö некод абу лэччылöма. Сьöла, тöдöмысь, кыз пу гар клотшкö-кокалö, а ур шоныд позьяс куткыртчöма.

Уна егыр вуджим, ягьяс кытшлалiм, а некөн жбыр ни жбор эз кывлы. Пармаыс быттьö унмовсьöма. Понъяс вомаыс ва босьтöмаöсь — оз увтны.

Пажнайтыштим. Понъяс ассьыныс пайсö тшувк-тшавк нбылыштісны да водзлань котöртісны, а ме пукала пöрöм конда вылын да госөн мавтöм нянь мутшка-сёя.

Друг Шарик льякнитіс да бокö чеччыштіс, быттьö сійöс кок увсянныс кодкö мачыштіс. Видзöдiс-видзöдiс да бöжсö лэдзöмөн ме дiнö котöртіс, а Лыско кöлач бöжсö лётйöдлöмөн, исасигтыр муно водзö. Öдйö чукöрті ноппiс, коляс няньöс суйи зептö да локті сійö местаас, кöні повзис Шарик. Видзöда, кодкö ме водзын гын сапöга мунома. Гырысь воськовьяса. «Ме водзын кутшöмкö вöралысь нин мунома. Сiдзкö, мöдарлань колö сетчыны,— мöвпышті да суйи киöс гач зептö компасла.— Сiдз нин нинöм эг аддзыв, а мыйкö кö паныдасяс, тайö дядьöыс лыяс либö повзьöдас. Öд вöралiгад йöз кок туйті ветлöдлöмыд дуб шыд панялöм кодь жö... Энлы, а мыйла нö Шарик тадзи повзис? Этшаысь-ö йöзсö вöрын аддзывлö?»

Видзöдлi кок улö... Шапка улын сувтлiс юрсийöй, мыш кузя кодзувкотьяс котöртісны, синьяс пемдылісны. Дядьö-

ыдлөн гынкөм нырас быттьө кыз көрт тувъяс сатшйөд-
лөма. Чунь кызта. Абу гынкөма дядьө. Ош мунөма...

Повзи. Паръясөй косъмисны. Пышйыны? Понъясөс
чуксала, мед нин куимнаннымлы, ковмас кө, смертьсө
өтлаын примитны, но гөлөсөй вошөма: «Лы-ыс-со, Лыс-
со, Ша-ик, Ша-ик»,— сөмын и шөпкөда.

Кылісны жө, тыдалө, воисны понъяс. Малышти найөс
гөн ньылыдсө.

«Мунамө тась өдйөджык,— шөпкөда да киөн бөрлань
петкөдла.— Сөяс ошкыс...» Шарик дась: эралыштіс,
сувтөдіс щөтьсө да ме сайө котөртіс. А Лысколы весь-
кодь: исасыштіс, никөстіс да бара мөдөдчис ош кок туй
кузя. Эз и бергөдчыв, саяліс вөрас.

Вөчны нинөм, понтө он эновт. Дрөбъя патрон вежи ош
пуля вылө да, мый лоаныс — ло, мөдөдчи Лыско бөрся
ош кок туй кузя. Пицальөс кута киын, быд здук дась
камөбтыны зверлы плешас. «Усь, Шарик, усь»,— шөп-
көдөмөн ызыөді понйөс да лэдзи водзө. Шариклы ян-
дзим жө лои том понсьыд, вөтчис Лыско бөрся. Менам
сьөлөм вылын кокньөдыштіс. «Өні куимнад, суөдам кө
ошсө, кызкө-мыйкө нин,— мөвпала.— Понъяс өд оз өмөй
жө дорйыштны. Увтөдасны кө, ошкыс на вылө зырөдас.
Сөмын эн узь. А пуляыс чорыд, подшипникысь. Аддза кө
ошсө — дзенга плешас».

Дыр вөтчим ош бөрся. Лыско пыр медводзын исасьө-
мунө да кольча бөжнас өвтчө, менө збодермөдө: өдйөджык
пө лок, тэрмасьышт.

«Збыльысь оз пов либө эз на аддзыв да оз төд, кутшөм
вына страшнөй зверөс туялө? — ог гөгөрво Лыскоөс.—
Код төдас, кутшөм мөвп кутө сійө аслас кычан юрас. Ар-
өсыс на эз тыр да ыджыд надеяыс сы вылө абу. Повзяс
кө, кор ошкыс равөстас, да Лыско менам кок улө котөр-
тас? Сэки дөзмөдөмсыйс ошкыс менсьым водзөс бось-
тас»...

Но пон туяліс зверөс повтөг, муніс юрсө бөрлань бер-
гөддытөг ылын водзын. Сы бөрся вөтчис Шарик.

Лысколөн смеллуныс вуджис и меным — сайкалі. Сэсса и гөгөрвои — ошкыс матын абу. Сійөс на колө суодны. Өддзөді воськовъясөс.

«Лун джынйыс нин со коли. Суодам-ө вот? — өні нин юрын бергаліс колөм и көсйөм.— Да-а, эськө этайөс кө удайтчас кыйны. Вот сёрниыд кыптылас. Ош яйла, ош госла став грездыс волас. Та ыджада зверыд быдөнөс мөгмөдас. Аслыным төвбыд кежлө кольө и, пу көть жарит. Эк, мойвиас кө, пуксыылас жө яя, пөт олөм. А вольыс керка стенин — смеллунон нэмөвөйся пас. Никөнорлы моз ош кыйысь ним на вермасны пуктыны. Мед эськө көть регыджык жө кытчөкө водөдчис. Вот сэжитө — майбыр. Гуас, төдөмысь, пидзөсьяс вылас лэдзчысьөмөн пырө. Сідзи и петнысө мөдас. А сэк кості, ковмас кө, кыкысь лыйны удита.

Но ош воднысө эз тэрмась. Чуклялөма-ветлөдлөма, а сэсса ёль паныдасьөма да ватыыс мунөма. Лыско воштис кок туй дуксө, но кор инді, никөстис да сы бөрся водзө котөртис: ог эновтчы да гөгөрвоис — колана-туяна зверөс корсьө.

Ок и мудеритөма варгыль кокаыд: ёльсыыс некымынысь кайлөма да векныыдик берег вылас быдмысь төзь да эжөр турун пөвстті мунөма, бөр шорас лэччөма. Оз көсйы, медым гуыс йөз син улө веськаліс.

Воис зэв пөрөма места. Ыджыд бушков коркө мунлөма. Сывтыръя козьяс да нывьяс крест-накрест вольсалөма. Ёлыыс пөрөмас пырө, и ошкыс ватыыс сэтчө жө мунөма. Кивыв сылы пөрөмыс. Пөрөмас пыралі и ме, но пуяс вомөныс вуджалігөн, увтыыс пидзөсчанясьөмөн кысьясигөн регыд и петі эбөсысь да быть ковмис сетчыны веськыдывы, кайи ягас.

«Ошкыс оз жө шорас либө тодас төвйынысө вод,— такөда ачымөс.— Быть ковмас петны, корсьны кос места».

Дыр муні пөрөм боктыыс. Сійө, кажитчө, кытшовтө. Поньяс оз тыдавыни ни увтыштөм шы эг кивлы. «Бур, бур, оз эновтчыны выль кок туйсьыд»,—мөвпөн ошка

найӧс. Восьлала яг дортӱс, кыйкъяла. Ыджыд лача кута — ошкыс менамладор берегас петас, сійӧ джуджыд-джык, кос, мича яг, а мӧдарыс увтаса места, тшем козъя вӧр, и дерт, сэнӱ васӧдджык.

Медъёна ме полӱ пемдӧмысь да поводдя торксьӧмысь. А мыйысь полӱ, сійӧ и лоис. Енэжыс гудыртчис. Кутӱс усьны лым. Пемдыны нин кӧсйӧ. Ош вылӧ надея кутӱс бырны. Сьӧлӧм вылын эз ло лӧсьыд. Чужис полӧм. Ош бӧрся вӧтлысигӧн ме ни ӧтчӱд эг видзӧдлы компас вылӧ.

«Код тӧдас, кытчӧ сійӧ менӧ вайӧдӱс? Понъяс оз тыдавны ни, — гажтӧм лои. — Воши ӧд вӧрас, ог тӧд кодарын и гортӧй, ылӧ-ӧ мунсис? Истӧг эськӧ и чер эм, но восьса енэж улын вӧрын ӧтнам эг на некор узьмӧдчыв. А пескыс, пескыс войбыд кежлас мыйта ковмас! Би кӧ бырӧ, менӧ и понъясӧс сёясны. Кӧть войбыд, а ковмас мунны. Ягыс кытчӧкӧ да петкӧдас — прӧсек вылӧ ли, туй вылӧ. Ошсӧ эськӧ оз нин удайтчы кыйны, да и гортӧдз на кыдзи воӧдча, — полӧмпырысь мӧвпала ме. — Мед эськӧ кӧть дырджык на эз пемды вот. Ошнас дай... Понъясӧс колӧ чукӧстны да ӧдйӧджык петны тайӧ тӧдтӧм местасьыс...»

Кӧсий нин вежны стволысь ош пуля дрӧбъя патронӧн да косьӧбтны рӧмдысь гудыр енэжас, но сэки ӧдва кывмӧн былнаын шыасис Лыско да вӧсни гӧлӧснас кутӱс коставлытӧг косявны-увтны кӧнкӧ водзын, яг бокас. Котӧрӧн уськӧдчи сылань. Гӧлӧсыс матысмис. Эз ур вылӧ ни пӧтка вылӧ увт Лыско, а скӧрысь, быттӧ усьласьӧмӧн, нетшысьӧмӧн: «Ав-ав! Ав-ав! Ав-ав!» Татшӧм увтӧмсӧ ме сылысь эг на кывлы.

«Суӧдӱс ӧд, суӧдӱс ошсӧ! — нимкодясьышти ме. — Со тай, со тай кодӱ вӧлӧм оз пов ошсьыд! Ай да пон, ай да пон! Эн видзӧд, мый том, а кутчысьысь, петкӧдлӧ нин асьсӧ. Том-том, а эз ӧд энотчы!»

Увтӧм кутӱс кывны матын нин, воськов сё сайын. Сувтӱ, шойчышти, лӧньӧдышти ыззьӧм лов шыӧс да кань моз, дзебсясьӧмӧн мӧдӱ матыстчыны водзӧ. А Лыско вузӧдӧ-

увтö кoстaвлытöг. «Бур, бур, тaдзтö кö динöдзыс сибaлa, — шöпкöдa. — Мoлoдeч жö, мeнaм быдтaсöй. Тaдзи и кoлö вeлöдчынy увтны — гoрaа, кoстaвлытöг...»

Вoсьтлi пищaльöс, кыскылi патрон дa видзöдлi, эз-ö усь пуляыс. Пуля вöли мeстaас. Шытöг бöр пöдлaли тoмaнсö, лэдзчыси пидзöсьяс вылö дa вoдзö кутi сибöдчынy бaуөн. Дoзмöр динö тaдз мaтыстчa, a тaйö öд oш — сюсь и скöр.

Кыськö вoлис Шарик, сувтлiс мe динö, нюлыштiс чужöмöс, дa быттö немтoр aбу и лoм, вeськöдчис яг вывлaньыс.

«Бoсьт, бoсьт», — шöпкöдa, нo бöжнaс эз лeгнитлы.

Вöчны немтoр, зык oн лэпты тaйö здукaс. Вöрaлöмöй тoрксяс. Oз мун пöрысь пoнйöй oш вылö и — пoм. Скöр звeрлы пaныд öни ми кoлим кыкөн Лыскoкöд. Мeнaм нaдeяыс сы вылö, a пoнлөн — мeнaм пищaль вылö. Этш-сьяс скöрыслa пeтö, гaмгö-увтö. Дaрöм тoм, a oз бöрынътчы, пыр öти мeстaын кутчысьö. Бур и пoн сeтiс мeным Никöнoр, бур и пoн, aтьö сылы!

Пöсяли. Бaуөн кыссигөн вoдзö видзöдöмьсь висьмис юр. «Кoлö öдйöджык мeздыны Лыскoöс, кытчöдз звeрь пиньгыж улaс эз нa вeськaв, — бeргaлö юрын öти мöвл. — Этaтшöмa увтиг-скöрaлигaс мeд эськö вoт эз жö пoт тoм сьöлöмыс. Вывтi жö нин пöсь...»

Уль лым вывтi кыссигөн брöд вa кöтaси. Co тыдoвтчис нин Лыскoлөн мышкыс. Шoшaсьяс гöныс лыбöмa. Бöжсö муaс лэдзöмa — пoлö жö стрaшнöй звeрсьяд.

Кoк улын вöр тырнaс крaтшнитiс ув. Мe тöкөтö эг вeсьöпöр. «Кыйсьыссис тaй, кaзaлыс oшкыс мeнö. Öни көнкö гыжъяснaс нитшсö кoк увсьяс шaмрaлö, вынсö чукöртö дa скöрмö, ыззьöдö aсьсö кoсь вылö, бöрийö бурджык здук. Кoлö лoны дaсьөн, тöдöмысь, мe вылö мeдвoдз уськöдчaс», — вирдыштiс мöвл.

Лэптi курoк, виччыся, нo немтoр эз лo, a пoн сöмын бeргöдчылис мeлaнь, вылöджык кыпöдiс дзик кoк улaс лэдзöм бöжсö, чeччыштiс вoдзлaнь дa eщö нa ярджыкa кутiс кoсявны-увтны. Кыйöдчa вöрзьöдчытöг.

Друг видзёдласой сувтіс коз понольяс сайын сулалысь ыджыд съод мыгөрö. Мыш выlö быттьö кöдзыд ва көш койыштисны. «Со нин ошкыс сулалö!»

Ньöжйöник лэпти пищальöс, мушкаыс ветлöдлö съод мыгөр кузяыс öтарö-мöдарö. «А кытчö и лыя, көні юрыс? Не месту кö веськала, вöлись сёяс!» Бөр лэдзи пищальöс.

«Колö кытшовтыштны, медым ошкыслөн тыдовтчис юрыс...»

Ньöжйöник сетча боквыв.

«Этайö мыр динöдзыс кысся и коз пуыс дугдас сайöдны зверсö,— бергöдла юрын öти мöвп.— Куим-нель воськов, куим-нель воськов, и став вийсьöм-майшасьöмлы воас пом...»

«Ф-фур-р-р-р!» — друг гораа корснитіс зверь да пыркнитчис. Мыш вылас сиделкаыс зия-зёля кылыштис — соравны позьтöм шы.

Ме весьöпөрлі, ружье уси кийсь.

— Тпру! Сулав,— кыліс дядьöлөн гөлöс.— Понсö ли мый эн аддзыв. Шыть тэ, йöй трасича, мый вöвсö увтöдан!

Öдйö чеччышти кокъяс выlö, кватиті пищальöс, лэдзи куроксö, шыбиті пельпом вомөн. Сэсся пуяс сайті вöчи неыджыд кытш да матыстчи вöла дядьö дөрö.

Никöнор вөлөм Нöвина бокысь керка кер чукöртö. Бур, мый уджыс да понйöй ылöдісны морттö да эз аддзыв, кыдзи ме вöралісылөн вöв выlö. Серам выв эськö лэптис, аддзыліс кö менсьым бауөн кысъясьöмöс. Бур, мый абу аддзылöма, но пон вылын век жö сералыштис.

— Ме тай тэныд шулі,— вашъялігмоз индіс Лыско выlö Никöнор,— бур пон, мися, таысь лоö. Видзöдтö, эг сорсьы. Арöсыс на тыртöм, а мый ыжда зверöс нин туяліс да увтöдіс. Кутшöм на том, а некутшöм öд полөм, кульöувтö, синъяссьыс турунвиж би сьякйö. Көть мый, а ош вылад тайö кутас мунны! А тэ эськö мый шуан?

— Серав, серав кычан пон вылас, Никöнор Иванович,— көть и чорыда кокорнитіс менö Лыской, но эз во сьölөм

вылө том пон вылын вашъялөмыс.— Шожымад лэччан да быдөнлы на висьтавлы, кызди менам понйө тэнсьыд вөвтө увтөдіс... Асланыд Катывпомса пөшти став понъясыд — лягөй Бускоясныд, вөлөн кө кодкө өшинь увтіныс мунө, туй оз сетны, Оньө му шөрөдз увтөмөн колльөдөны. А Митерасас, вөвъяс абуось да, быттө унаысь аддзывліс Серко-Каркояссө!

— Но-о! Мый тэ, Паша, ассым пон рөд ог жө кут янөдны! — пыр и воши Никөнорлөн чужөм вывсьыс нюмыс, а сэсся и юаліс жө: — Урсө коть аддзө оз на?

— Сі-идз, вом көрсө коркөяс вежыштлывлө нин,— эг жө кут ошйысьны.

— Нинөм... Том на, велалас... Тавосө, дерт, сідз-тадз на, а мөд ар кежлө вөралысь нин лоө...

Сідзи и артмис. Ошъяс, йөраяс Лыскокөд эг кыйлөй, а уръяссө, дозмөръяссө да весиг и туланъясөс унаөс кыйлывлім. И мый өд бурыс — ройө некор эз увтлы. Гөлөссө кө сетіс — падъявтөг муна — аддзөма кыйдөссө. И ур вылө, и дозмөр вылө, и тулан вылө — быдөн вылө аслыс-нога гөлөс: лөня кө да тэрмасьтөг — ур вылө, ливкйөдлөмөн, зэв радпырысь — туланөс аддзис, сьөлөмсяныс кисьтө-увтө, быттө дэльөдчө либө ордйысьө увтөмнас кодкөдкө — дозмөрөс кыпөдіс.

Бура кутім гөгөрвоны өта-мөднымөс. Вөтлыся, шуам, сьөла бөрся, а понйөй увтчис ур вылө — ог эновт сьөлаөс, удайтчас кө, лыя. Но пон оз уськөдчы ме дінө, увтө, ассьыс уджсө вөчө, төдө — локта коркө. Эз вөв горш. А мен кө колө понйөс корны, лөсышта кырсьсө кызкодь пуысь, черөн клөн-клөн вөча — здук мысти Лыско ме дінын нин. Весиг коть урөс вөлі увтө — эновтас. Томысянь таө велавліс. Уна пон видзлі, но Лыско кодь сэсся эз веськавлы.

ЮКТӨМ КЫЙДӨС



ор пөткаяслөн пияныс кыпөд-
чисны бордъяс выланыс, вот-
чыны ветлөдлігъясө аскөд кути
пармаө новлөддыны Лыскоөс.
Төлка пон менам лоө — арнас
өтнас нин мөдіс корсыны да

увтөдны уръясөс да весиг и дозмөрөс.

Өтчүд, тайө вөлі ноябрь праздникъяс дырйи, Модякөд понъясөн вөравны мунім. Уръяс тайө кадас пасьнысө ве-
жөмаөсь нин төвся вылө, да медясө на вылө надеяөн и
петім, а сэсса өд — мый шедыштас: сьөла көть тар, а
мойвиас кө и — дозмөр.

Шожымкалань нырвизь кутам, Никөнорлөн вөр кер-
каас, мися, узям да мөд лунсө дорвыв на вөралам. Вель-
кыдасө сэтчөдз матын, сизим километр сөмын, да та вөсна
кытшөла туй бөрйим — Мелөв видзьяс пыр. Сэти пөшти
куим пөв ылынджык, вөралөм сорөн лунтыр тырмас мун-
ны.

Оз тшөкыда, но өтилаын-мөдлаын понъяс и увтчалө-
ны, кыпөдлөны урсө пу йылө.

— Шарик со менам увтыштіс, Шарик! — пон гөлөс
кылас да пыр и шуас Модя.

— Шарикыд тай и эм, но мыйлакө зэв ёна вөснялөма
гөлөсыс, дзык Лысколөн кодьөдз, — вашгъяла тадзи, төда
Лысколысь увтчөмсө да.

Здук кольө, кор сэсса и збыльысь Шарикыс кыз гөлөссө
сетас.

— Вот, öнi и Шарикыд тшöтш увтö. Кылан бувгöмсö. Воис жö кыскö... Дась вылас...

Но татшöм сёрнисö ог вензьöм понда нуöдöй. Кыкнан-нымлы окота ассъыным понъяснымöс ошкыштны. А кыйдöссö, сiдзсö, öта-мöд вылö вежавтöг шöриön пыр юкам. Öтчыд Модя лыйö, мöдысь ме. Мелёв баракъяс дiнöдз воим да кыкнаннымлön нопйын пара урön нин вöли, а Модялön — нöшта и сьöла. Сьöлаыс, сюрö кö, дерт, нимкодъджык, но и урыс колö: кучик вылас «Заготжив-сырьё» складысь дрöб-порок сетöны.

Мелёв баракъяс дiнö лун шөр гөгөр воим. Кык ыджыд стрöйба, зэв нин важöсь, öшинь-öдзöстöмöсь да весиг вевтыс и йиркыс некоднанас абуöсь — варкалöмаöсь-кис-сьöмаöсь пытшкöсас. А коркö, войнаöдыс, тövнас сэнi овлöмаöсь йöз, тшöтш и батьяс: колхозсянь сортовка кер лэдзлöмаöсь орчча гулыд ягсьыс.

Бергалыштiм баракъяс дорас, пытшкас пыралiм, а сэс-ся и яг вылас кыскасян туй кузяыс кайим. Керас местаас вöрыс гежöд, пуяссö бöрйöмön пöрöдлöмаöсь да. Яг вы-лас пев пом гырся гырысь туся пув воöма, веж петкöдлö.

Пöттöдз сёйим шома-юмов сьöдгöрд пувсö. Китырön-китырön розъяссьыс нетшкам. Уна пувйыс, но эг öд вот-чыны локтöй, а вöравны.

— Мунам нин, — чуксала Модяös, — дзыкöдз тай ылалiн пувъяс.

— Часлы, часлы, — шуö, — ещö неуна сёйыштам... Зэв нин чöскыд.

Вотöсыс дугдiс нин ковны, нем вöчöмысь, Модяös вич-чысигмоз, матыстчи сывтыръя кос пожöм дiнö, чатöрт-чыли йывланьыс — шапкаöй уси!

— Пескыс, майбыр, Модя! Кык додь конда пес сюрö, но он на босьт, гортсянь ылын зэв.

— Ы-ы, — видзöддiс жö пу вылö Модя. — Быдмылöма тай со...

— Но, лок нин, мунам! — сапöга кокөн бөрвыв чужъя-
лыштi кондаас.— Модя, Модя, видзöд, видзöд, ур, ур! —
шмонита.

Пуас лыс ни кырсь, чужъяла, вывлань ог и видзöдды,
ог и чатöртлы юрöс йывланыс.

— А ме тайöс лыя,— шуис Модя, нетшыштiс пельпом
сайсьыс пищальсö, октiс куроксö дай гымöбтiс конда
йылас.

Аминьöй! Öти ув вылын, помланыс, тулан вöлөм пукалö.
Лыйöмысь сийö песовтчылис да шнёпкысис-уси менам кок
улö. Эг и гөгөрвопы, а кондаыс гыркса вöлөма. Сэни и
узьö, вöлөм, туланыс. Кор кутi чужъявны пуас, сийö
петöма, а воштысьнысö некытчö: пуйсöдзыс ылын,
чеччыштны мөд пуöдз оз вермы и лэччынысö, ме улиас
сулала да, оз лысьт. Йөрмис да со и веськалис лыйöм улö
миян пармаын тайö меддона куа мича зверыс.

Урлөн куысь, медвылын сорта кө, сизим шайт вöли се-
тöны сийö кадас, а туланысь — сё сизимдас! Меддона не-
быд зарнийөн шуöны кучиксö. А кыйны тайö зверсö абу
кокни. Оз миянлөн кодь, а зэв ныриса пон колö. Сюсь пö
зэв туланыс. Опонь дедлөн и Шожымысь Никöнорлөн
сёрниясысь кывлывлi: лунтыр пö парматi кытшлöддас,
поньясöс унаысь ылöддас, а оз на быд пöрийö и сюр. А
миян со дуригмоз веськалис.

Модя котөрөн локтiс усьöм зверь дорö, кватитiс сийöс
да син лапнитлигкостi и дзумгис мешöкас. Бура сёрнийөн
прöмыс юкөм пыдди нопсьыс босьтöма öти урöс да шы-
битiс менам кок улö.

— Бура увтан, Пашö! Босьт урсö, тайö тэныд премия,
и водзö тадзи увт, индав зверьяссö, а ме лыйла. Этайöя-
сысь, видзöда да, абу уна төлкыс! — гогнитiс юрнас Ша-
риккланыс.

Тадзи делöыс бергöдчис, да менам кыв-ворöй весиг
вошлi. Кымынысь öтлаын вöравлим да кыйдöсөн пыр шöри
юксьылим, а со, вöлөм, суседöй кутшöм! Сьöла-урнад

юксьö, а зэв дона куа зверыд шеді, да пыр и асаліс. А меным кө унджык коркө сюрлывліс прöмысыс, ме юксьывлі, пыр öтмындаöдз вайöдча, тар, шуам, сюри — кык сьöла мында нин сійö артавсьö... А со, вöлөм...

Менсьым мыйкө быттьö гусялісны. Немтор эг вермы шуны, шутёвті понлы да мөдöдчи гортлань.

Вывті любöысла либö полö öтнас, Никöнорлөн вөр керкаас узынысö, метөг Модя абу жö кайöма. Сійö рытнас и адзылі: юкмöсысь ведраөн гортас ва пыртіс.

Тайö лунсяныыс Модякөд, непöштö вöравны, школаö öтлаын ветлöмысь вель дыр кезлö дугöдчылі. Лөгасьнысö кө немторйысь, мөдысьсö пу вылас öд вермим некоднан-ным не видзöдлыны, мый сэтысь, конда йывсьыс, кыйöд-нысö? А вот тадзи артмис, да и думайтсьыны кутіс: «Асланьыс куралысь, горш мортыд кутшөм нин сійö ёрт? Мөдысь мыйкө вермас и збыль гусявны, а коймөдысь, аслыс кө сыысь ыджыд буртор чуктас, вермас на кок-ныыда и вузавны».

Миян костті быттьö сьöд кань котöртіс, ёртасьöмысь көдзöдіс. Сёрнитны, дерт, сёрнитім, ичöt грездын олігөн, да нöшта и суседкөд, кыдзи он сёрнит, а мед ёртасьны? Эг ёртасьöй.

ГОРШАСЬОМЫСЬ ЛЕКАРСТВО



алёв Вечё, Шожым сик-
тысь мекöд жö тшöтшъя
зонка, вежон-мöд нин
дзайгысис, корис босьты-
ны сийöс вöравны. Öти
классын велöдчим да сёр-
ниясысь кывлöма, мый
вöрö ветлигөн ме пöшти некор эг воывлы гортö куш
нопйөн — пыр нин сьöла-мöдтö кыя, а мойвиас кö, и тар
либö дозмөр на. Со и вöзйысьö.

Тöдтöм морткöд вöралöм — муртавтöм, кокö суйлытöм
сапöг кузь туй вылö петигөн көмалöм кодь жö, он тöд,
лучки-ö сийö лöсялö тэныд. Та вöсна и ывсöдча, горттö-
гöрса уджъяс вылö ыстыся. Но и Вечё оз лэдзчысь.

— Ветлам, инö, ветлам локтан шойччан лунö, — көсйы-
си. Уджыс эськö гортын уна, да овлас на, сідзкö.

Парма шöрö пуксьöм ичöтик грездса зонкаяс — көть
ме, көть Модя, көть Веня — пыр öткөн арнас вöралам.
Оз нин некод торкась, оз тэрмöдлы. Ветлöдла вöрöд
вöляысь, тэрмасьтöг, кань моз кыйкъяла. Кыпöдi, шуам,
сьöла котыр, на бöрся вöтлыся, кытчöдз котырыс оз
воштысь либö ог кый сэтысь öти пöтка, а тар-дозмөр кö
кытыськö аддзи, сэки нин көть мый дыра, водöмөн сы
дiнö кыся. Кыйи — менам шуд, а лэбис пöткаыс матö
сибöдтöг, сідзкö, велöдчыны, водзö вылö сюсьджыкөн лоны
колö. Вöралан сямыс мортыдлөн тадзи и чукöрмö — ставыс
ас саяд. Öтнамсö, артмö, кань моз кыйся... Эг и радейт
вöтлысьысьяссö...

Субöтаö, урокъяс бöрын, пыралім Вечöяс ордö. Сійö котöртліс Семö дядьыс дінö пищальла, мыш нопъяс дзумгис шöрöм куим нянь, паччöр вывсьыс лэччöдіс некымын лук да мешöкас жö дзумгис, а сэсся сёйыштіс да ми и мöдöдчим миян грездö, Митерасö.

Ме гортын регыдөн жö нопись чукöрти. Босьті ывла би вылын ёна нин саöссём литрөн-джынійона пöрт — узьöмөн вöравны ветлывлігөн медся коланатор, — ичöтик көшельö пукті кык содз шöна, босьті сов, мös выйтор, нянь тупöсь.

— Бытгö вожон кежлö дасьтысян, — вашмуніс Вечö, быдса тупöсь няньсö нопись суйöмös аддзыліс да.

— Сёяныд, миян Опонь дед шулывлö, пельпомъястö оз личкы. Мунан кө лун кежлö, няньтö босьт вожон кежлö...

— Но, сідзтö кө, инöсь, этша на и босьтім. Та йылысь коліс миянын на висьтавыны. Ме эськö...

— Немто-ор, тырмас мияны.

Нурьясьыштöм бöрын матич бокусь судзöді пищаль, рузумөн чышкышті ствол вывсьыс мавтассö, весалі стволсö. Компас да сёла чипсанъяскöд тшöтш зептö суйи зарада вит патрон.

— Компасыд вöрын — добра-а, ог нин вошöй, а вот боеприпассö тай нö зев этша босьтін. Менам со, видзöд, кызь нель патрон. Вескыдладорсянныс патронташын — пуляя нель патрон. Ош вылö, Семö дядь шуö; шуйгаладор помсянныс — сы мында жö картеча патронъяс — көин вылö. Быдөнлы — торъя дрöб, гырся сертиыс: сёлалы — посни, дозмöрлы — гырысь.

— Да-а, Семö дядьыд тэнад прамöй вöралысь... Но, инö, кыскав, көть эськö ми ог көин вылö ни ог ош вылö мöдöдчöй. А вит патроныс мен тырмас, луннас кык-куимös и лыйывла...

— Меды-ы-ым, надейнöджык. Семö дядь шуö, веськыд стволын пö менам пыр пуляя патрон, а шуйгаас дрöбья.

— А менам өти ствола пищальёй да сы вöсна и пуля патронсö ог новлöдды. И ошкыскöд, вöралігөн, эг на паныдасьлы... Но мöдiм. Пемдытöдзыс колö Никöнор пывсянöдз воöдчыны. Туй вылын, вермас лоны, и сьöляяс на манитыштасны.

— Никöнорыслөн ылын пывсяныс?

— Абу, сьöлыштан да воас,— серöкті,— сизим километр сöмын и эм сэтчöдз...

— Си-и-зим! Абу, шуö, ылын. Аски позис и грезд гөгöрад кыйсьыштны.

— Уна тай тані сьöла! Пöшти тöлысь нин камöдчöны да... Ставсö лыйлісны.

Грезд гөгöрын, дерт, сьöляяс олісны, но ни Модя, ни Веня, ни ме Вечö кодь гөсть-вöралысьясыскöд матігөгöрын некор эг кыйсьылöй. Код тöдас: мöдысь найö Шожымса став зон чукöрнас тöдмалём местаас локтасны да став пötкаяссö лыйласны, рöдмём вылас оз кольны. Бокөвöйыдды нö мый, медтыкө кыйдöсыс сюри... А ми öд кыдзи кыйсям? Первой тöдмалам, кымын пötка позтырас, и кыям, мыйта позьö, мед и локтан во вылö рöдмынысö кольö. Ас костын висьтасям школаö ветлігөн, кодi кытысь уна-ö-мый кыйис, позьö-ö на сэтчö ветлыны. И Опонь дед пыр стрöжитö-өлöдö, медым ми позтырсö ставнас эг кыйö-бырöдö. А ми öд тайöс гөгөрвоам жö — катша-рака позйын сьöла-тар оз рöдмывны. Колян тулыс кежлö пötка гоз, а арнас сэні бара быдса позтыр. И сідзи воысь воö.

Джын туяс нин тыдовтчис: Вечö вöрса туйяс вывтi жебиник ветлысь. Норасьны кутіс, коклябөрöс пö веськыд сапөг пöлöй зыртö. Шойччыштны пуксьылім. Ме матысса козйысь кос рой вайышті, тшöкті пуктыны гөрдöдём коклябөрас да вылысь бура нямöдасьны.

— Öнi лючки! — мöдöдчим водзö да нимкодясьыштіс Вечö.

— Миян Опонь дед висьталö: ройыс пö зыртчöминад зэв лöсялö. Кучикыс кө кульыштчас, бурдöдö öдйö и.

Сомын кадысь кадö вежлавны ройсö колö, небыдöс, свежойöс.

Сьöлаясöс кыклаысь кымын сомын и кыпöдлим да Никöнорлөн пывсянöдз югыдөн на воим. Ломтим важ заптым песнас из горья пачсö: пусыны öд ковмас и керкасö узыны шонтыны, а асьным, пила-чер йирк вывсьыс лэччöдi да, пöрöдiм-увйим кызкодь кос коз, пилитiм чуркаяссö, поткöдлим, мыйта вөр керкапытшкöсса пötөлök бердö вöчöм сёр вылас төрö, а коляс чуркаяссö стен бердас, ывлаас тэчим.

— А запассö мыйта вöчим,— дöжныштитiс Вечö.— Джынйыс мында кö, и шань эськö вöли. Со пачыс кыз öгырö уси, водзджык нин колö вöли пöрттö пуктыны би вылас.

— Нöшта на лöдсыштам. Арся рытыс-войыс кузь, кöдзыд лöö узынысö. Öдзöсыс косьмалöма, да кыскас ывлаас шоныдсö. А пес запасыс пыр колö вөр керкаын. Локтас кодкö пемыдын, мудз, кötасьöма... Мый нö, сылы пес дасьтан удж на медым сюрис? Опонь дед шуö: вөр керка пö пестöг энöвтöм — гусясьöмкöд öткодь.

— Но, но! Ме öд сiдз тай шуи,— веськöдыштитiс асьыс водзынджык шуöм кывъяссö Вечö.— Абу нин ичöt, гөгөрвоа, правильнö шулöма дедыс.

А благодать жö нин парма шöрын вöралан керкаын узыны. Шоныдыс дзик быттö пывсянын. Ужнайтöм бöрын трусик-майкаöдз пöрччысим, водiм джоджас чöскыд дука турун вылö да вой шөр бөрöдз узим. Небыд турун вылын, шоныдiнын мича вötьяс ме вötали: зверь-пötкаыс вöрас быттö, зэв уна и вотöсыс кок улын — тальыштны некытчö.

Вочасөн изьясысь тэчöм горйыс кöдзалöма. Жырйын сайкыд лоис, да садьмылим. Сэсся дөрöм-гачьяснымöс пасьталiм да бара водзö нистiм-узим, садьмывтöг, югыдöдз нин.

— Вечö, чеччы, Вечö! Мича югыдöдз öд узьсис,— чуксала вöралысь выль ёртöс, а сэссия, оз чеччы да, тöрмöшитышти на.

— Но, инö, но! Мый нö весьöпöртмөн горзан? Ог öд поезд вылö сёрмöй,— нюжöдчылис да ньöжйöник кыпöдчис Вечö.— Югдiс и бур, кöть эськö, зэв лöсьыд танi вөлöм узьнысö да, мед кöть эз на и югды.

— Бипур öдйöджык пестыны колö, шорö колö вала котöртлыны, пусыны, сёйны да петны туйö. Водз асывнас сьöлаясыс чипсан вылö шыасьöндыжык, локтöны и...

— Но-о-о? Сидзтö кö и збыль тэрмасьыштны колö. Ме котöртла ваысла, а тэ öзты горсö.

— Ог керкаын пусьöй, ывла вылын асывнас пусьывлам. Öгыра горсö кö колям, мыйыс öд оз вермы лоны. Ватö гумовттöдз пöртсö мыськы шор дор лыанас.

— Няйт пöртьяс, дерт, васö ог кат, велöдан...

Регыд мысти яра ломтысьысь бипур весьтын жваркйис-пуис шöнаа рок. И колö жö, вөр керкасянь дзик матын шыасис сьöла. Ме воча кути чипсасьны. Сьöла пыр и вочавидзö. Ме сийöс ас динö кора, но сьöла вөр керка дiнын олö, адзывлöма нин йöзтö, сюсьмöма да оз лок, ас дiнас жö корö. Дыр сидзи чуксасим-шыалiм, но весьшөрö. Оз лок чипсан шы вылö и пом.

«А тайö öд миян бипурным сийöс повзьöдлö,— воис юрö.— Тэ, Вечö, видзöд, мед рокыс пыдöссияныс оз сотчы, гудралыштöмөн пу, а ме ветла сьöла дорас.— Выйыс со пывсян пельöсас банкаын и солыс сэнi жö, рузумторйö гөрддзалöма».

— Мун, мун, ставсö спутю вöча,— кöсийысис Вечö.

Вөр керка дорын вөлöм вöйсöдлöм сьöла нин олö, да кыйны сийöс эг вермы. Локти ваймöм бипур дорö. Вечөлөн рокыс пусьöма, вөр пывсянысь босьтöм Никöнорлөн чайникын руалiс сэтөр росьясөн заваритöм чöскыд кöра чай.

— Эз сюр, вывти сюсь вөлöма сьöлаыс,— пищальöс пывсян пельöсö сувтöдiгмоз висьтася Вечöлы вöралöмöс.—

Тані сійос быд узьысь, тыдало, вöйсöдлö, да профессор кодь лоöма. Ё-ылісянь öд и лэбас, оз матöст. Асьсö эг и аддзыв, борд шыыс сöмын кывлас.

— Тэныд сьöлаыс эз сюр, а менам пусьöмöй эз артмы...

— Но, роктö пуны ыджыд сям оз на ков...

— Оз эськö, но дуб вот лоис... Сольс киссис... Кöсий кöть пань пом мында чукöртыштны, но нитш пöвстсьыс куравсьöма тай...

Кызмырдөн дуб рок панялім, юим чай и мöдöдчим Шожымка бокöд писькöдöм прöсек кузя гортлань, виджадөн моз нырөн. Ми тані Веня другкöд куимысь нин вöравлім, да местаяссö тöда. Векныдык прöseкыс километр куим ылнаын Шожымкасö вуджö, а миянлы колö кежны веськыдыв, километр кык компас кузя мöд визирöдз мунны. Нöшта километр вит мысти, компас кузя жö — вуджны коймöдö да сійö миянöс Митерас грездö нин петкöдас. Нюръяс, лосьяс, кадья местаяс паныдась-лöны, но абу кулитана угоддьöясыс — зэв чöдья-пувья ягьясö волан, кöні пöткаыс олö. И бур нöшта сійö — туйыс стöч лунтыр, тэрмасьтöг, вöралігтыр кö мунны, тырмö.

Визиркаяс кузя мунігөн сьöлалысь уна позтыр кыпöдлім. Сёрнитчам, кодлы кутшöм пöтка бöрся вöтчыны, мед öта-мöдлы эг торкасьöй, разöдчам. Но кольö сöмын минут дас — дас вит, а Вечö бөр нин визир вылö петöма да, кыла, горзö нин, корö менö:

— Па-а-а-шö-ö-ö! Лок нин öдйöджы-ы-ык! Па-а-а-шö-ö-ö!

Кутшöм нин тадзтö вöралöм артмас, кор тэрмöдлöны. Бытгьö гач бөрöд гезйөн домалöмөн вöрала. Эновтчыны ковмö пöтка бöрся вöтлысьöмсьыс да петны горзöм вылас.

— Гежöдіник кыддза-козья, мича вöрыс. Эн кö горзы да нöшта кö вöтлысьышти, вермис и сюрны пöткаыс,— кöрита Вечöс.

— А ме օтчыд шпоркнитօмсօ и кывлі, пыр и воштысис. Со и петі бօр визир вылас... Мый нօ, тані сэсса лунтыр дізьвидзны-пукавны кута ли мый? Ог горзы, а вошан кօ вօрас? Сэки и меным сгинитны татчօ ковмас...

— Воша, воша! Сідзи и воши тай! Визирыс, со видзօд компас стрелкасօ,— веськыда вомօнтօ. Рытыв-асывлань писькօдлօмны. Этатчօ мунан — Нёмыд ю вылօ, кօрт туй вылօ петан, пос дінас. Вывлань кօ сэт километр джын кайыштан — вօла туй вылօ, кыті тօрыт Митерасօ кайим, петан, а горув кօ кօрт туй кузяыс мунан — Шожым улад, горт весьтад воан... Гօгօрвоин, кыдзи колօ муннытօ, кыдзи он прօпадит, ме кօ, кыдз тэ шуан, воша?.. Компасօн татшօм паськыд прօсек дінын некыдз вошнысօ... Видзօда, да тэн дыш вօртыыс ветлօддыны... Мун инօ...

— օтнам нօ сьօд вօр шօртыыс, тօдтօм местаясօдыс туяс мօдօдча?

— А мый? Кык ствола пищальнад да эсы мында пулякартеча патронъяснад! — сералышті Вечօ вылын, кор нин сійօ ёна дօсадитчыны кутіс.— Сօмын на мышкօй саялас, а горзан нин. Эн горзы. Тадзнад нօ кутшօм вօралօм артмас? Полан ли мый вօрас? Эн пов, ош ни кօин татчօ оз локны. Найօ օд полօны жօ... Видзօд, кутшօм օбօрօна мыш саяд новлօдлан! — серала Вечօ вылын.

— Повны ме некодысь ог пов, но тэнօ виччынысօ, збыльысь, терпеньнօ оз тырмы... Вичча, вичча — кадыс оз коль некыдз...

օтилаын сьօла бօрсяыс дыркօдь кытшлалі: повзяс да зэв ылօ лэбօ, но бօръяпомас аддзи жօ — пукалօ кыдз пу чаль вылын, гарсօ кокалօ. Кань моз матыстчи надейнօ усьօм ылнаօдз, окті курок, топօді пельпомօ ружье прикладօс... «Бу-у-ув!» — дзик матын бытгьօ бомба поті: Вечօ тайօ дас кыкօд калибра ружьесыыс лօсыштіс. Менам сьօла, дерт, «тюр-р-р!» код тօдօ кытчօ лэбис. «Но,— думайта,— Вечօлы, волօм вылас, кօть օти сьօла шеді жօ!

Мед, лэбис кӧ менам ныр улысь сьӧлаыс. Ӧд лыйи кӧ водздзык — сылысь эськӧ повзьӧдӧ. Танӧ коднымлыкӧ ӧтинымлы шудыс вӧлӧ вичмӧ. И, дерт, веськыда кӧ, — колӧ, мед кыйдӧсыс сюри Вечӧлы. Вӧравны катӧдӧ, а мортыс немтор на со эз и кый».

Петӧ прӧсек вылӧ, матыстчи Вечӧ дӧнӧ.

— Но, бур кӧть нин тэныд мойвиис, молодец! — ошка Вечӧӧс.

— Мойвиис, мойвиис! — индӧс Вечӧ кеня шой вылӧ.

— Тыпу! — ыджыда сьӧвзьыссис менам. — Парма варыш тэ, Вечӧ, сэсса некыдз ыджӧддыны ог куж. Камӧбтӧн тай пушкасьыд, мушка улысь сьӧлаӧс повзьӧдӧн.

Та бӧрын пӧшти сӧрниттӧг кутӧм мунны. Дӧзмӧдӧс ӧд. Мыйкӧ кӧ Вечӧ юалас, ме сӧмын «но» либӧ «ы-ы» вочавидза да тшӧкыдджыка чипса, быттӧ некор меным сьӧд сӧрнитнысӧ.

Рытъявылыс Митерас грездӧ петкӧдысь визир вылӧ вуджим. Сэни местаясыс сьӧлааджык вӧлӧмаӧсь: куим позтыр, ӧти бӧрся мӧдӧс, прӧсек боксьыс повзьӧдӧм. Вечӧ вӧрас дугдӧс нин пыравлыны. Ме кежа визир вылысь, а сийӧ пуксяс мыр либӧ пӧрӧм пу вылӧ да виччысьӧ менсьым бӧр локтӧмӧс. А вӧрсяныыс бара кыла: «Шков! Шков! Шков!» — нем вӧчӧмсьыс Вечӧ сынӧдас гымӧдӧ.

— Но, Семӧ дядьыд тэныд петкӧдлас пуж! — кӧрита Вечӧӧс.

— Немтор сийӧ оз шу. Дрӧб-порокыд сылы мыйта колӧ сюрӧ. Сӧмын пӧ «Жакан» пуляяссӧ эн лыйлы. Оз вид, кӧть кызынан патронсӧ лыя!

— Но, сӧдзкӧ, этша на и босьтӧмыд патронъястӧ. Колӧс нин патрон нелямынсӧ кӧть корны...

И збыль ӧд, кызынансӧ и лыйис ышмӧм мортыд. Тешитчӧ ме вылын быттӧ.

Ӧтилаын ме дыркодь сьӧла бӧрсяыс вӧтлыси и лыйи весиг, но эг инмы — пӧткӧлӧн ни ӧти гӧнтор эз усь. Веськӧдчи бӧр прӧсеклань, Вечӧ дӧнӧ пета, видзӧда: мыр

дорын, веж нитш вылас, ыджыдкодь съод ёкмыль шыльк-видзё. Матыстчи — кило куима съод дозмөр ныр вылас сунгысьома. Босьті киё, видлала, исышти весиг,— абу на зэв важся, гашкё, вежон сайын кодкё лыйёма, но пётка-ыслён вына бордьясыс со мездёмаось вөралысылён киё веськаломьсь, абу сылы сюрөдчёма. Удитёма со кыйсьы-сьысь, но смертыс коньөр пёткаос век жё суёма.

«Дыш, но наян Вечё вылын öнi ачым тешитчышта!» — мөвпышти тадзи да суйи дозмөрсё мыш нопись.— Көвъя-сис вөралан ёрт пыдди, а кыйсьыны оз сет, быд ногыс торкасьо».

— О-о! Мыйкё ыджыдос лыйёмыд? — Гөгрөсмөм-польдчөм нопись аддзис Вечё.— Мый нё эськё? Петкөд-лы!

— Лыйи тай со! — бытгё зэв нимкодь аслым, вашъяла.

— Па-а-аш! Петкөдлы но?

— Да, кута тай ноп көвъяс разявны да петкөдчыны-ошйысьны йöй моз! — эг көсийи да эг и петкөдлы, а Вечё оз-оз дай малыштас-лэптылас нопись ки пөвнас.

— О-о! Йöрыша да нöшта и съöкыд на мыйкё? Мый?

— Дозмөр но, дозмөр! Аддзылiн сэтшөм пёткасё?

— А кыдзи нö! Семö дядь коръяскö вайлывлö... Шыд-нас вердлiс и... Ок и чöскыд шыдыс!.. А тэ шуда вөлöмыд! Бура талун вөралыштим! Дозмөр, со!.. Куим съöла дай! Куим öд? — варовмис Вечё.

— Куим, куим... Стöч сiдзи, дозмөр дай куим съöла...

— А меным нинöм он сет? Тöварыш вылад ветлöдлöм пыддиыс нин көть?

— Этатшöма гажöдiн, да кыдзи нö нин ог сет! Сета, дерт, эта мында прöмысь! Кык съöласö сета...

— Кык съöла? А тайö дозмöрыс эськö кымын съöлакöд воча?

— Код нö сийöс тöдас? Веситтöгыс? Но, сизим... көкъя-мыскöд воча, шуам...

— Көкъя-мыс-кө-өд? Но-но-но-но! Вот шудыд!
Вечё сэссия туй чөж дозмөр йылысь и сёрнитис-дөжна-
сис.

Вежөрттөг эг ов — ёна, вывти ёна сылы колө дозмө-
рыс...

Горт дорын пөрччи пельпомъяс сайысь ноппёс, рази
көртөдсө, перйи кык съёла да мычча Вечёлы...

— Этійө... Кык съёла сөмын, шуан?.. А аслыд нө...
дозмөр и съёла босьтан, а меным кык съёла сетан?.. Этійө...
Меным эськө өтиыс тырмис...

— Дозмөрыс? — көрлі плешөс.

— Сійө, сійө, дозмөрыс!..

Дзик пырсө немтор эг вочавидз, мөвпала быттё ёна.

— А босьт инө, мый сэссия тэкөд вөчан... Лов вылө
өшөдчин со...


Лун-мөд мысти Вечё матыстчис ме дінө, гыжъялыштіс
балабөжсө да шуө:

— А ылөдін тэ сэки менө... Лыйин, шуан, дозмөртө, а
сійө вөлөм важ нин, кывтчөма. Семө дядьлөн Буян пон-
йыслы ковмис сетны...

— Ме тэнө эг ылөдды... Кык съёла вөлі сета — эн босьт...
Мырдөн дозмөрсө ачыд дзайгин... Понлы со вердөмыд, а
бур лекарство өд сійө тэныд...

— Но-о-о! Мыйысь нө?

— Горшасьёмсьыд...



ас өти арөсөн Шожым сикт-
са зонпосникөд гождом за-
водитчөмсяныс, кызд вер-
ми, пөшти быд лун отсаси
колхозса скөтлы дасьтыны
көрым. Пидзөсөдз быдмис
туруныс да верстьö йөз петисны ытшкыны борьяс, му
помьяс, джынвийö вөрөн тырөм ичөтик видзьяс. Нывка-
яс куртöны уль, веж турунсö, а ми, зонкаяс, телегаяс вы-
лын вөлөн новлам сийөс силос гуясö. Сэссия, июль заво-
дитчигас, и Няшаö, кузь да паськыд видз вылө вуджим —
турун юрьяс зорөдьяс дорö вөлөн кыскалам. Öта-мөдкөд
ордйисям, кодi медся уна юр кыскас. Öд сө юрысь быдса
трудодень пуктöны. Пелькджыка кө уджалан, шуам, сө
ветымын юр лунтырнас ваян, бадь ньөрьясла, зорөд
пиньясла, йөз шойччигкостыс, ветлан — овлö — кык тру-
доденьöдз луннас наждөвитан — верстьö морт, чөвтысь
мында.

Купайтчөмысь, дерт, асьнымөс эг удзөдлөй, но дона-
джык уджьяс вöснаыс мырддысим.

Öтчыд, удж помалөм бöрын, ме динö матыстчис кол-
хозса бригадир Василий Петрович.

— Лун-мөд мысти Митерас грезд пырыд Шожымкаö
ытшкыны мөдөдчам. Тэныд сэтчө туйыс төдса, видзөдды,
ёна-ö ва Туй выв йөнөдыс да Прөсек выв нюрыс,
позьö-ö прөйдитны сэтi телегаяса вөвьясөн? Кык вежон
кежлө сөян, көлуй ковмас катөдны.

— А оз и ков видзоддынысö, Василий Петрович. Ми сэтчö мырпомла нин ветлім... Прöйдитасны вöлаясыс... Сöмын туй вомöныс уналаын пуяс пöрласьöмаöсь, ков-мас увйыны, чинтавны пуяссö да сідз весавны туйсö...

— Но, инö, бур тай! — нимкодъмис бригадир.— Гашкö нö, кайланныд кодъяскö, челядь, да весаланныд туйсö? Öти сайысь и Шожымка вомöныс пода пос лöсьöданныд? Вöсныдик слегаясысь? Слега вит-квайт кок ув пос вылас да перилö... Ю мöдарберегса нырдъяс да бечевникъяс вылас мед позис пода мортлы вуджавны ытшкынысö? Верманныд-ö эськö тайöс ті, челядь, вöчнысö? Верстьö мужикъясыс со чöвтысьяс сöмын... Найö и тані оз тырмыны... Ю вомöныс, медся векниинтыс и вомöнтöй потшъяссö... Тувйыштöй, кöртыштöй, перилö сямäс, ки ув мыджöд, тшöтш вöчыштöй...

— Вермам, вермам, Василий Петрович! — радлышти.— Татшöм вуджаланінсö Митерасса зонкаяс — Модя, Веня да ме, быд во Нёмыд ю вомөн вöчлывлам, медем школаö ветлігөн кöрт туйті эз ков гöгравны. Вермам и сяммам!

— Но, инö, ветлöй... Сöмын эн доймöй да эн вöйöй... А ме ог öбидит... Кык лунсьыс вит трудоденьөн морт вылö гижä...

— Пöрласьöм пуяс чинталігөн доймынысö некыдзи, Василий Петрович... А Ванюк нырд горулöдыс Шожымкаыс векныд дай ляпкыд... Коскöдз сöмын öні, гожöмнад, ваыс... Кольöм во Никöнор да Як Вась кыті вöчлісны, сэті жö и вомöнтам юсö, нырд йылöдыс. Сэки öд Шожымкасыс зорöдъяссö ме нин талялі-сигöрталі.

— Бур, сідзкö, бур! Ветлöй, инö... Кодъяс нö эськö мунанныд?

— Вот сійöс колö думыштлыны... Соседöй, Веня, Ксе-нофонт вокыс ордö Урдомаö муніс... Вежонсö, чайта, гөститас... Модя мамыскöд кöрт туй вылын гожöмсö уджалö... Колöны эськö сэтшöм ёртъяс, кодъяс чер-пилаөн вöдитчыны кужöны... Мишка Вань Öльöксанöс, инö, босьтлä...

— Пельк зонкаыс, пöслукман,.. — ошкыштіс бригадир. — Нöшта эськö кодöскö? Слега-потшгьяссö кö ылысьджык ковмас ваявны, сьöкыд лоö, дырджык и... Но кодкö, гашкö, ачыс вöзйыяс, сёрнитлам школаса ёртгьясыдкöд. Öд вöла машинаöн ытшкысьöс ни куртысьöс ог жö вермы мöдöдны — кодöскö челядьöс жö...

Бригада миян регыдөн и чукөрмис: Мишка Вань Öльöксанысь кындзи, вит трудодень гижöмтö кыліс да, Егор Вась Гень вöзйысис. Сёрнитчим ас костаным: водз асывнас Öльöксан да Гень ме ордöдз, Митерасö, каясны, а ме найöс, дасьөн нин, кута виччысьны гортын.

Висьталі, мися, Шожымкаыс зэв чериа, кыснангьяс да, абу кö дыш, и шатингьяс на тшöкті босьтны, и быдөнлы, дерт, чер да кык лун кежлö сёян. Пиласö ме ачым көсйыси босьтны — Шожымсянь öд, мися, он кыскöй. Гортö кайигөн — вöлөн Митерасöдз ветлім — юр кыскалан гез конюклысь кори. Слегаяссö ю вомöныс сытöг нö кызди вуджöдлам. А гезнас — гөррдзав потш помсö, ю мöдарсянныс дёрнит — помыс ачыс кок улöдзыд шлывкмуновоас. Лэптыштан сійöс берег вылас — местаын, майбыр... Сэсся — мöдöс. Сідз ми Нёмыд вомөн посйысьлім...

Мед вöсньыдик слегаясыс кок улын эз вангьявны-катласьны, увладорсянныс кык-куим вомöна тасөн найöс дорлім öта-мöд дінас небыд сутугаөн гартлöмөн-көртавлöмөн. Пос, сідзсö, дась, көть йöктігтырйи мун. Но нывбабаяслөн, пöрысь йöзлөн визув вылас видзöдöмысь юрныс бергöдчö да найö татшöм постыс нинöмысь на оз вуджны. Налы колö, медем и кок улас вöлі зумыд, и кинас, тöддытöг друг шатовтöмысь, мед вöлі кытчö кутчысьны. Перилö на, сідзкö, быть колö.

Но сійö, позьö шуны, медкокныд удж нин. Пос помгьясас, öтар-мöдар береггьясас, весътөн бокöджык, тувгьялам ён, кыз майöггьяс. Морöс весётöд кымын, бура мурталöмөн, чинтам пилаөн кыкнан майöгсö рөвнöя, öтсудтаö. Найö и лоöны перилö сюръяяснас. Сэсся тайö майöг

помъяс вылас лэптам шыльыда вольём, увладор помъяс-
өдыс, сюръяс весътөдыс рөвнөя жө лөсышталём,
берегысь берегө судзысь потш. Сөмын и звигнит-тувъяв
сюръяс вылас бура куйлысь потш помъяссө кузь, кыз,
ён көрт тувъясөн, мирөвөй класса пода пос — дзик дась.
Көть кутшөм пөрысь морт, повтөг вуджалөны сэти,
төдмаласны коді вөчис поссө да вочасигъясө аттьөалөны
мианөс.

Татшөм посъяссө Нөмыд ю вомөн Венялы, Модялы да
меным быд тулыс вөлі ковмылө вөчны. Арөдзыс, йи
поскөдз, сэти йөзыс ветласны. А мөд, локтан тулысө миян
поскө йисө поромитас-поромитас да ытваыс и нуас сійөс
Шожымка юө, сэсянь — Эжваө, а Эжвасяньыс, гашкө, и
мореөдз кылөдас. Но ми ог шогсьөй. Усьө ытваыс, Нөмыд
пырас берегъясас да, медем оз ков кытшолөн ветлыны
көрт туй кузя, выль пос вөчам. Сямаөн нин лои татшөм
стройкаяс вылас.

Сідзкө, и тайө пөрийө, Ольөксан да Геня дінын, ог кө
туй инженер пыдди, то бригадир пыддиыс век нин шог-
ма. Сямөс, дерт, ачымөс кыпөдтөг, уна төдысьө пук-
сьытөг, уджын ковмас петкөдлыны, Ольөксанлы да Ге-
нялы, кыдзи-мый колө вөчны, чүньөн индавтөг, өтүв
төлкуйтөмөн, сөгласөн бергөдны делөсө. Но, мый бур пода
пос миян артмас, таысь эг майшась.

Өкмыс часыс эз на вөв, Ольөксан да Геня ме ордө нин
пырисны. Вөлөк вуджысьясөс юкталі мырпома-сэтөра
чайөн, да петім ывлаө. Ноп йөрышъяс, видзөда, кыкнан-
ныслөн өткодьрукаось. Менам ёна ыджыдджык. Гезыйс
уна места босьтіс да мешөкөй парашют ноп ыджа, но
абу сьөкыд.

Ольөксанлөн вугыр зібсө босьтөма, а Генялөн абу. Ме
босьті жө метр нель кузьта пипу шатин.

— Мый нө, вадорсьыс ньөрийыс оз сюр? — сералө миян
вылын Геня. — Дас верст ылнаө, да нөшта и вөрө, нуан-
ныд шатинъяс. Ой! Ой! Серам петкөдлысьяс! Но, чери

кыйысыяс дай сөмын... Паськыд дора идзас шляпаяс юр выланыд оз тырмыны вот, кутшөмөн тай чери кыйысысö картина вылө рисуйтөма... Ха-ха-ха!

Генялөн вот шатинсö абу босьтөма, а пельпом саяс кильчö вылын ружье мөвкнитис. Кильчö вылысь лэччим, да съод-еджыд сера ыджыд пон на сы динö матыстчылис, бөжнас өвтчö.

— А тэ со вöралысь кодь дзик... Нопъя, пищала... прöмышленник дай сөмын... Уръясос кыйны, арся прöмыс вылө быттö петöмыд,— кöритышті Геняөс.— Оз öд позь гожом шöрын тадзсö вöрас ветлыны. Понийд борд вылө кыпöдчыгөм пöткаясос мөдас кутавны, кöчпиянөс. Мый морла понтö, пищальтö босьтин, а?

— Э-э, понтөг да пищальтөг вöрын кöч люкалас, ош парсалас! — вашмунис Геня.— Пищальыс öбөрöна вылө, а понийыс төварыш пыдди лоö... Съод вөр шөрö öд мөдöдчим. А пышъялысь, шыш кö вөр керкааным воас? — эз сетчы Геня.— Пон кö вөтчö, чайтан, став вöрсö нин и куштис-рöзöритис?

— Ме Генялы Шожымын на шулі, косöд, мися, понтö, егерь улö веськалан, штрапуйтас,— суйсис сёрниö Öльöксан.— Оз пö нин öни кос, чомъяс эг йöрт да, кöть пö кызди эн вид да эн повзьöдды. Весьшөрö, сідзкö, и вензянныд, мөдимöй... Кымын öдйö уджсö бергöдам-керам, сымын дырджык кыснасьыштны сюрлö... Чериа, шуан, юыс, Пашö?

— Эмышт... Весът кык кузьята, тувья-тувийөн-джынийöна сирьясыс Шожымка йылас уна... Кольом во Венякөд тайö кадас ветлим войколөн да лов дас витөн морт вылө, пöшти таз джын чериён гортö вайим...

— Уна тай и эм! Кык луннад,..— серöктис Геня.— Ми батькөд Ёвтыысь таз черисö кулөмөн рытпомөн кый-лывлім.

— Унаыс да этшаыс öд кодлы кызди! — серöктис Öльöксан.

...Прөсек выв нюрөдз, туй джынсө, юр весьтын шондїон на воим. Паныдасяс туй вомөн пөрөм пу, чөвтам нопъяснымос да ме увйысьны зїля босьтча, а Ольөксан да Геня пилитчөны. Увъяссө туй вывсьыс идрала да куимөн зімїөдлам-тэчам туй бокас кражъяссө чукөрө и бара водзө, туй вомөн мөд пөрөм пуөдз тэрмасьөмөн мунам.

Нюр вылас чөсмасьыштім кисьмөм мырпомөн, пажнайтыштім, шойччыштім вуджөр сайын. Шондїыс вылын, да весиг и вөрас жарсьыс спасенньө абу. Ньылөмсьыс вазисны дөрөмъяс. Номъясыс кымөр мында гартчөны мян гөгөр, сатшїөдлөны ем кодь ёсь ныръяснысө сьыліө, чужөмө, киясө. Көтасьөм мыш, пельпомъяс зөлитөны ноп улын. Ном курччалөмсьыс синъяс, пельяс пыктїсны. Веськыд мат дай сөмын жар лунө номъя вөрын, но ми өд ог ас окотаысь номъясыслы вердчөй, а уджалам. Быть терпит, пилаа киөн өд номъяссьыс ог өвтчы. Шатиныс на мешайтчө и. Со и сөйөны номъясыс, быд кушинө пуксьөны корөсьөн өвтчытөгьд.

— Шыбитөй шатиннытө! — некымынысь шуліс Геня.— Ю дорас выль зіб керыштаннıд... Дзикөдз номъясыс вильөдасны...

Генялөн киясыс прөстөсь да сылы кокньыдджык, корөсьөн номъяссьыс өвтчө.

— Көть эськө и збыль шыбит, но татшөм шатиныс сэтысь оз сюр,— терпитө ном курччалөмсө Ольөксан.— Тайө шатиныс кос, борд кодь кокньыд, нюдз, веськыд, кузь — лун джын коркө тулыснас вөрын бөрийыси... Ог бара шыбит...

— Ме ог жө шыбит. Турунсө пуктыны кайлам жө өд, гөдитчас на и сэки... Талун-аски кыйсям да дзеблам Шожымка видз бокас кытчөкө... Дасьыд — век нин дась. Турунсө пуктыны өд волам жө,— шуа.

— Волам, дерт, юрсө-нөсиласө кыскавны, и ме аски ог жө бөр лэччөд шатинөс,— шуис Ольөксан.— Чериыс кө шедө, уна рыт-асыв кыснасьны удайтчылас.

— Тiян делö, тiян делö...

Жарысла, кажитчö, жунялöмаoсь весиг козъяс. Найö чургöдöмаoсь векныдик вöла туйлань кузь увъяснысö, малыштасны юрöд, пельпомöд, быттьö корöны юктöдны, норасьöны кос поводдя вылас.

Туй вомöн, бöжсö вылö чургöдöмöн, котöртис гöрд ур. Сийö аддзис миянöс, сувтыштлис, ас ногыс «цоп-цоп-цоп» чиргыштитис-видчыштитис повзьöдöмсьыс, чеччыштитис медматысса пу вылас, бианьöв моз визьнититис-кайис пу джынйöдзыс да сэни бара на кутитис видчыны.

Генялөн Шарикыс кылитис урсö, уськöдчис пу дiнас да сöмын и кутитис кисьтны-увтны. Сылөн бувган гөлöсыс шызьöдiс став пармасö. Пон чеччалö пу улын, чегъялö пиньяснас пу дiнмысь кос увъяссö да весиг пуас кавшасьны босьтчылас. Тадзи вöчöны вывтi горш да терпенньötöм, сiдз-тадз велöдöм понъяс.

— Шойччыштамöй, инö,— сувтовкерис Геня да пöрчис нопсö.

Кузякодь нин нюрсянныс мунiм да Öльöксанкöд пöрччим жö нопгьяснымöс, лажынътчим неуна кöдзыдов небыд ош нитш вылö. Разялим дöрöм кизьяс, чегъялыштитим кыз росьяс, швачкöдчам, повзьöдлам чужöм гөгöр зыньгöмөн лэбалысь номгьясöс.

— А вывтi жö нин ёна, Шаричокöй, яйыс тэныд колö. Увт, увт. Час, видзöдла, кытчö дзевсис урыс,— пон дiнас шыасис Геня.

Сийö чеччис, перйис тасма костсьыс черсö, матыстчис коз пу дiнö, лöсыштитис кырсьсö да мый вынсьыс «клён-клён-клён» куимысь кучкис лöсас весьтас чер тышнас. Матигөгöр вöрыс шызьылитис таысь.

Ур öдöбөн чеччыштитис орччөн сулалысь ыджыд кыз йылö, каттысис пöшти дзик йылöдзыс да ланьтöдчис. Водзö палöднысö* сылы вöли некытчö. Пуясыс öта-мöдсьыс

* П а л ö д н ы — пуысь пуö чеччалöмөн понйысь пышйыны.

сулалісны ылын, а повнысö урыслы сэсса немторйысь жö вöлі — вывтi ылын пукаліс, он на сэтысь сійöс судзöд.

Понйыслы быттö тальчисны бöж вылас: «И-и-и!.. Ув! Ув! Ув!» — сöмын и кисьтö-увтö.

Геня матыстчис ноп дорас, пуктіс черсö, перйис зепсьыс патрон, босьтіс пищальсö.

— Лыя, инö, лыя Шаричоклы, медым арöдзыс вир дуксö он вунöд, — кöсйö зарадитны пищальсö.

Жаль меным лоис ки пйдöс ылын моз, восьсаинын пукалысь ичöтик гöрд урыс. И дорйысьнысö сылы некыдз, и пышйынысö некытчö. Лыясны — веськалас горш понлы пиньяс улас. «Мездыны колö урсö Шарик вомысь, — пыр и чужис юрын мöвп. — Арын тайö урыс — прöмыс, небыд зарни, шулöны, а öнi дзик нинöм вылö оз шогмы. Оз позь гожся урсö лыйны!»

— Öбөрöна вылö, шуан, босьтін пищальтö? — юала Генялысь. — Ноко, он кö öвсьы! Висьтала егерлы да ружьетö батыдысь мырддяс... Мый эськö сэки вöчны ку-тан?

— Мый нин лоин, пос вöчысь? Лöдз курччис? — серöктіс Геня. — Öти урнас кушмис вöрыс ли мый? Понсö öд пыр колö нырис ылын видзны... Öтиöс сöмын...

— Он, мися, лысьт! Лыян — висьтала егерлы... Мырддяс пищальтö да штрапуйтас на батытö! — повзöдла Геняöс.

— Но, но! Пыр и «висьтала»... Дурьштнысö нин оз позь? Ог лый, ог, öвсьы! Арнас, гашкö, Шариклы на и сюрас...

— Арнас и лыйöй, а öнi он лысьт!..

Та бöрын дырсö сэсса эз и пукавсьы. Геня медводз и нопьясис да мöдöдчис, а сы бöрысь пыр жö чеччим и ми. Но горш Шарик эз кöсйы энотны вом чöскöдсö, кольччис увтны. Мунам, пыр водзö, бара куим пу туй ылысь идралім, ылыстчим сэтчöдз, понлөн гөлöсыс öдва и кылö, а век на увтö, оз öвсьы.

— Оз өд энөвт,— ошкөмөн либө шензьөмөн шуис
Өльөксан.

— Шарик аддзөмторсө оз энөвт! — збыль ошйысьөмөн
нин вочавидзис Геня.— Өтчөд тулан кыйигөн батьө пем-
дөма, узьмөдчөма вөрас ноддя би дорын, а Шарик сы дінө
сідзи абу и локтөма. Кузь войбыд пө увтіс. Асывнас и
лыйөма батьөй тулансө. Конда пу горсийө вөлөм зверсө
вөтлөма понным и пышйынысө дзик пө некытчө — гөгөр
эрд.

— Понъя-көзяина, шулөны, өткодьөсь! — серөктыштис
Өльөксан.

Ме гигзышти-сералышти жө:

— Не кө ми, тэ эськө урыслысь ловсө босьтин на, Геня.
А пицальтө мырддьөмысь вот полан...

Водзө, Шожымкалань, муним сёрниттөг. Вөрыс коръя
пуяса, крепөд вужьяса водзөсө лоис, туй вылө пуяс абу
пөрласьөмаөсь да и сёрнитнысө быттьө немтор йылысь
лой.

Геня, дерт, гөгөрвотөг эз ов, мый сылы паныд ми өтвыв
Өльөксанкөд сувтім, дивитам пөльза вылө мунтөм гоҗся
кучика ичөтик вөрса зверь вылө ковтөг ружьесө лэпты-
ны көсйылөмысь, да оз жө сёрнит. Ыджыд сюсьлун ни
понлөн бур нырис оз ков, мед аддзыны гоҗся урөс, кор
сийө лунтырьясөн му вывті котралө да, аддзас кө кодөскө,
быть шыасьлас ас ногыс. Ур яйыс — горш понлы вомас,
а кучиксө — коз пу лап вылө? Тайө нин вөр-ваыслы сөмын
рөзөр вылө. Мед видлө Геня тайө зверсө сёр арын кый-
ны, кор сийө пырджык пу йылын пукалө чөв-чөлөн, а лэч-
чылас кө му вылө көмасьөм* урыс, оз на быд понлы ны-
рис улас веськав, бур пон сөмын на и туялас сийөс.

Шожымка ю дорө воим вылынкодь шондїөн на. Никө-
норлөн вөралан керкаө колялім ноҗьяс, черьяс, пила.

* К ө м а с ь ө м у р — сёр арын урьяслөн кок пыдөсыс гөнсялө, да
котралігас оз коль му вылө дукуыс.

Вөр керка сёр вылын узьмөн-пусьымөн пескыс вөлі, да пырсө сійос дасьтыны коланлуныс эз и вөв. Аски уди-там и водзөса пес дасьтыны и ветки-пос ю вомён нюждо-ны. Луннас. А талун рытсө да, поводяыс кө оз лёкмы, аски луннас да нөшта и рыгтя кыа вылас өтсөгласён шуим кыснасьыштны жө, гортсаяслы гөснеч пыдди свежой че-риис.

Геня тайө мөвпсө медводдзаён висьталіс:

— Талун, вель нин ёна уджалім да, ог жө нин пөрөдчөй? Рыгтя кыа вылас кыснасьыштам. Мыйкө кө шедө, пуам юква и — шойччыны. Сідз, чайта, вөчам?

— А кыдзи нө, рыгтя кыа вылас өд и курччө чериис... Кыснасьышта-а-ам! — ноппысь кыснангяс перьялігмоз нин шуи.— Телепит нин... Квайт-сизим потшсө, аски лу-ныс кузь, пөрөдам, кыскам да ю вылас час-мөд-коймөдөн и вомөналам куимнад да поссө вөчам... Кыснасьыштам бурпөт, воим кө нин чериа ю дорас... Пыр и лэччылам...

Өльөксанлөн да менам шатингяс киынөсь. Көрталім көвгяс, ме ва кылач лөп вывті вуджи Шожымкалөн мөдар берегас, и мөдөдчим Ольөксанкөд ю паныд, отар-мөдар береггясөдыс, ота-мөдысь кыр йывлань-горувлань воськов комынөн костасьөмөн, мед черисө орччөн мунигөн не пов-зөддыны. А Генялы вель дыр ковмис коланакодь ша-тинсө корсьны, вольны кырсьсө. Сэк кості ме лэпти нин тув кыка сирөс. Ольөксанлы кутчысис жө тувйөн-джын-йөна кымын сирпи да весьт ногөн кузьджык, паськыд съөд мышка ёкыш. Неуна муныштөм бөрын менсьым кыснан вугырөс мөд сирпи, тувгя кымын, курччис. Сөмын сэки, видзөдам, и Геня кутіс кыснасьны.

Өльөксанкөд ми ю паныдыс восьлалам, да Генялы быть ковмис горув мөдөдчыны. Кыйөминсьыс өд мөд пөв оз кыснав, быть ковмис ю горувлань лэччыны, көть визув ньылыдсө кыснаныд и омөля ворсө, озджык колана ногөн кый.

Шонді лэччигас Ӧльӧксанлы и меным бара на мойви-
ис — кыкнанным тувйӧн-джынйӧна кымына сирӧн морт
вылӧ на берег вылӧ кыпӧдӧм.

— А-а, чӧр-ту-у! Немтор эз сюр! Номъяс сӧмын ви-
льӧдӧсны,— ме весьтӧ, видчигтырйи, локтӧс Геня.— Тӧян,
тыдалӧ, кыснанъясныд бурджыкӧсь. Курччӧ кӧ, кый-
сьыштӧй на, а ме муна, керкасьыс горсӧ ломтыла да пуся...
Мый нӧ пуам? Шӧнаа рок? — юасьӧ Геня.

— Мыйла нӧ шӧнаа рок? Пусьӧдӧс нин со да! Юква пу!
Чӧскыдӧс! Лук шырышт, картупель... На, кутав! — шы-
битӧ ӧти бӧрся мӧдӧс ю вомӧныс кыкнан ичӧтджык сирсӧ.

Черияс шнӧпкысисны Генялӧн кок улас, джуджыд ту-
рун пӧвстӧ.

— И этайӧс кӧр вылас тшӧтш пу,— сетӧс сьӧд мышка
ыджыд ёкышсӧ Ӧльӧксан.

Геня мунӧс пусьыны, а ми, колим кыкӧн да, вель на
вылӧдз Шожымка кузяыс кайлӧм. Но шонді лэччӧм бӧрас
черияслысь вомсӧ быттьӧ вурыштӧсны: некоднаннымлы
сэсся ни ӧти лов эз шед...

Рӧкыд вылӧ, бӧръяпомыс, кыснанӧй на кытчӧкӧ кру-
касис да вель дыр ковмис зӧбйӧн ӧтарӧ-мӧдарӧ шенась-
ны-сюрӧдчыны. Муртса и мынтӧдӧ якӧрсӧ. Сэсся лӧп
чукӧр вывтӧ вуджи Ӧльӧксан дорӧ да и мӧдӧдчим сьӧд
Никӧнорлӧн вӧралан керкаас, думсьыным пӧсь чӧскыд
юква пӧрт дӧнӧ. Ӧд Генялӧн, тӧдӧмысь, терпеньӧыс нин
быри миянӧс виччысьны. Тэрмасыам...

Но Геня понсӧ сывъялӧмӧн шкоргис-узис джоджӧ воль-
салӧм кос турун вылын.

— Локтӧма ӧд понйыс, оз тай энотт кӧзяинсӧ. Пет
мун ывлаӧ, абу тэ пывсянын узылысь! — вӧтлӧс Шарикӧс
ывлаӧ Ӧльӧксан.— Вод коз улӧ небыд нитш вылас, кара-
улитчы...

Юква пӧрт удитӧма нин кӧдзавны. Гурснитӧ паньӧн —
юръяс да бӧжъяс мыгчысьлысны. Сӧйӧ и кольӧма сӧмын
кык сирсьыс да ёкышсьыс. Нӧшта гурснитӧ — чериыс
пӧртйын абу, пачдорса джаджйын пу тасьтӧын абу жӧ...

— А, пөттөм горш жө эськө вөлөма,— норасышті
Öльөксаны.— Куим лов пулөма да ставсө өтнас и вильө-
дөма!

— Збыль али мый? — шензыштіс Öльөксан.

— Сөйөма став черисө. Картупель пөвстас чаль чунь
пом ыджада тор-мөд бергалөны да юръясыс-бөжъясыс со
мыччысьлөны.

— А збыль тай, ад горш и вөлөма Геняыс, понйыс кодь
жө, кызд өнтай шулін... Гашкө, и понсө на чөсмөдліс.

— Öдвакө, ачыс ставсө глөтйис, понйыслы лыяссө, дерт,
сетіс жө, а чигсө ачыс жөритіс тшыгйылысь да окота-
сьыс...

Вөчны немтор. Гурскыштім-панялыштім көдзалөм нин
юквасө. Пөтім, но сьөлөм эз и бурмыв көвтөм-гудрасьөм
юквасө сөйөмысь. Сідзи и лои водны чери видлытөг.

Асывнас садьми водз. Кольөм юквасө кисьті чуманө,
сеті коз улын узысь понлы, биаси ывлаө да куті пуны
проса рок. Ывла би вылын пуөм проса рокыс, мөс вый-
ыштан да, неуна тшын дука, өна на и чөскыд.

Садьмисны и Öльөксан да Геня, кор нин рокыс вөлі
жваркйө-пуө: «рок-рок-рок»,— сукмөма нин, выявны
тшөктө, паньяс дасьтыны.

— Төрыт дыр эн воёй, да унмовссьөма мудзвылысь,—
бурөн пырөдчө сёрниө Геня.— Эг и кывлы, кор локтін-
ныд...

— Чөскыд сөян бөрад, пөт кынөм вылад узьсьөджык,
дерт,— чиктыліс Öльөксан.

— Пось свежөй юквасыс чөскыд и эм! — ошкыштіс
сөянсө Геня.

— Шуа тай, чөскыд... Став черисө вугралөмыд-кысна-
лөмыд, дугөдчынысө быртөдзыс абу вермөмыд.

— Дыр эн воёй, да дырджык и би вылас видзсис,—
став черыыс нырсис, юкваас гудрассис.

— Сылі, шу нөшта, юкваас, сов моз, чайын сакар моз,—
читкыртліс мелань синъяссө Öльөксан.

— Сылі-ө, эз-ө, дыр пуи да ставыс рабзис, пань выло бурджык тор и меным эз веськавлы... А талун од бара юква? — кыпөдліс пөртлысь вевтсө.— Но-о, проса ро-о-ок... Сёйсис тай, сідзкө, чөскыд юкваыс... Ро-о-ок! Чайта, лов дасөн кыйинныд на! Петкөдлөй?

— Кыйим, кыйим, Ёгор Вась пи, кыйим... Но петкөдлынысө өні ог вермөй, шорас, ва гуранө колим, мед шоныдінас оз тшык,— зэвтчыштөм гөлөсөн вочаалис Геняөс Öльөксан.— Гортө лэччөдам черисө, а тани, ывла би вылас пуөмөн, и проса рокыс со зэв чөскыд көра кылө...

Рок и сёйим. Но Геня, көть и дузгөдчыліс, пөртыйысь роксө аддзис да, миысь эз жө этшаджыкысь паньышт. Чөскыд да, бөрас на, тайкө дозмуксө писькөдас, гурскис пөртсө моздорас босьтөмөн, кор нин ми сэтөра чай кутім юны.

Бура сёйөм-юөм бөрын лэччим Шожымка берег вылө. Матысь и аддзим колана вөрсө, воськов нелямын ылнаын ягыс, гым биысь ли, кодлөнкө мыж вөсна ли, сотчылөма. Пуясыс, кыз и вөсни, енэжсө пыкөны, видзөдлан — шапкаыд усьө, но пөшти став вөрыс косьмөма, кырсьыс усьөма. Пөрөдім вөсныдык квайт кос пожөм да өтиөс, нөшта на вөсныдджыкөс — перилө вылө. Сэсса гезйөн мерайтім юыслысь пасьтасө, чинталім вөрсө колана мында кузьтаө да юрөн-бөжөн — дін на йыв — лэччөдлім слегаыссө ю берег вылө.

— Ме ю мөдар берегсянныс гезнас кута кыскавны слегаыссө, а ті тайө берегсянныс меладор кер помьяыссө көрталанныд да мөдар помөдыс йөткөмөн отсалөй меным кыскыны. И веськөдлы, Пашө, мед лючки-бура, стөч ме вылө, баланыс исковтіс,— Геня шыркнитіс өти гез помсө тасма вөняс, босьтіс пищальсө, шутөвтіс понйыслы, лөп чукөр вывті вуджис юсө да лэччыштіс визув нылыд берег вылын куйлысь потшьяс весьтөдз.

— Сейчас көртала, дай кыскы,— шуа Генялы.— Ме слега водзөдыс мөда весьтассө кутны-видзөдны, а тэ,

Ольоксан, йоткы... Но-о, давай! Босьтім, босьтім отвыв! Кыскы, Геня, йоткы, Ольоксан! Выныштчыламоёй отвыв! — командуйта.

Бокиянь видзодны, Геня быттьо сюродыс домалом козаос асланьыс кыскө, ме сійос сьыліодыс бокө кежөмысь кута, а Ольоксан бөрөдыс, быттьо пыксьыс пемөсөс, йоткө.

Слега бузмунлі-сунліс вао да звук мысти сьлөн помыс люкачис нин модар берегас. Но Геня отнасөн эз вермы колана вылао лэптыны сылань дінма слегасө да меным ковмис лөп чукөр вывті вуджалөмөн ветлыны сы дінө отсасьны.

Мөд да коймөд слегасө, йывладорнас кыским да, шывкмуномөн кокньыда вуджөдİM ю вомоныс да водтөдİM колана местаө. Нельөдсө нин сэссия ота-мөд бердас бура топөдөм слегаяс вывтіыс вао лэдзылөтөг кокньыда кыским-йотким, быттьо майтөгалөм жөлөб кузя исковтис, нюйтальшті кык слега костсө да.

— Добра лоө посным! — ставыс лючки-бура артмө да, лэптышті вывлань веськыд кысь певсө.

Друг юр весьтті герчкөмөн лэбис энъ горда да матын тыдалысь бадьяспөвстса ты вылө кытчөкө и пуксис.

«Ляв-ляв-ляв!» — вөсни гөлөсөн, пөтка вылө моз и увтыштіс вөралан пон да сы бөрся утыштіс.

Геня шыбитіс гез помсө, кватитіс ружьесө да сэтчань жө чепөсйис.

— Тыпу, поз выв уткасө тай нө лыйны көсйө! — сьөвзис Ольоксан.—Лыяс өд, лыяс! Мырддям ружьесө! Кымын уткапи прөпадитасны мамтөгныс.

Ольоксан видзчысьөмөн вуджис эштөдтөм на пос вывті да уськөдчис котөртны Геня бөрся. Ме вуджи жө сы бөрысь, налань жө котөрта, кустьясланьыс.

Эг во кустьясөдзыс, видзөда, Ольоксан да Геня бертчөны нин. Сэссия, видзөда, Ольоксан мырддис Генялысь пицальсө, камөбтіс-луйис вывлань да бузкылө шыбитіс сійос вөрса тыө.

Утка, гораа герчкигырйи, кыпöдчис ты вылысь, вöчис кытш да лэбис кытчöкö ылö. Абу, тыдалö, позйыс сэни вöлöма. Öд бөр эськö пуксис пиян дорас, кöть лыйöм шыыс и ёна повзöдiс.

— Корсь öни пищальтö, сунлась пöттöдзид, Ёгор Вась пи, джыдж кольк сёйысь.

Геня эськö уськöдчылис косьö кок увсьыс сюрöм беддён, но Öльöксанлы отсöг ылö ме нин вои — мырди бедсö да ваас жö шыбитi.

Кыклы паныд он на водзсась, кöть кыдзи эн скöрав.

— Ба-атьö öд менö таысь ви-иас! — лöвтис Геня.— Пи-иш-ша-лыыс öд...

— Ачыд мыжаыс! — дорйышти Öльöксанöс.— Батьсьыд кö полан, сунлась да корсь, колöкö... Мунам лок, Öльöксан, помыштам поссö да кыснасьыштам на тэ-меа,— нарошнö гораа, мед Геня кывлас, кора Öльöксанöс.

— Аттö öд, йöй жö ме! Эз ков ружьесö ваас шыбитны, оз сюр öни ружьеыс пыжтöг-кошкатöг,— кутiс майшасьны Öльöксан.— Зарадьяссö кö мырдим и, олис эськö... Ружьеыс öд абу мыжа. Пöсьйывсьыс со мортыслы кутшöм ыджыд пакöсть вöчи...

— Эн майшась, судзöдас... Ляпкыд тыыс. Август помланьыс весиг дзикöдз косьмылö... Судзöдас... Кылан со, керасьны кутiс, увъя пома кузь зiбйөн регыд на и судзöдас. Пищальтöг гортас оз лэччы. Аслыс кö оз сюр, миян дорö локтас, кевмысьны кутас, медым отсалiм корсьнысö... Вот адзылан! Эн маитчы, судзöдас... Вай öни ме гезнас слегайссö кыскала, а тэ, кыдзи и водзтi, йöткöмөн отсав. Энлы, нюйталыштам кер костьяссö, мед гылыд лöö ворга туйыс...

Тайö лунö Геня сэсся миян дiнö эз нин матыстчыв. Дерт, кыйис сiйö асьыс пищальсö, чукöстiс понсö, вуджис Шожымка юсö миянсянь кырйивтiджык, лöп чукөр вывтi, да лэччис гортас.

Рытнас, Никöнорлөн вöралан керкаас пыралiм нопъясла да, Генялөн нопйыс сэни эз вöv...

Поснымос Ёльоксанкөд зэв на и туянаос вөчим. Бөрын-нас и кыснасыштим на. Уна чери эз шед, но кыкысь-куимысь пумон, морт выло, гортө сир-ёкышсө лэччөдим.

— А мыйла тэ Генясө джыдж кольк сёйысьнас ним-тин? — юалі Ёльоксанлысь гортө лэччигон. — Тадзсө сійос өд некод оз нимты, эг на кывлы ни?

— Вөлі делө кольом во... Отчыд Пронь Вань Миколкөд, мекөд жө тшөтшгья, сосед менам, ветлим Няша выло вотны пөк*. Крут Няша ю берег дорөдзыс ветлим. Купайтчыштам, мися. Видзөдам, неылын кодкө бужөд дорйылас веглясьө... Муним сэтчө, бөрсяныыс гусьон матыстчим, шыасим. Ёгор Вась Гень вөлөма... Шапка джыныйс джыдж кольк чукөртөма... Мыйла, юалам, лэбач позьяссө рөзөри-тан?

— Зэв чөскыд джыдж колькыйс... Локтөй тшөтш кыйсьөй, берегыс кузь...

— Пуан колькьяссө? — юалі.

— Ог... Со, видзөдлөй,— Гень ки пыдос тырыс босьтис шапкасыс колькьяссө, өвкнитис семечкиос моз вомас, тяпкөдчыштис да вомсыс сөмын кышсө сьөлыштис.— Ок и чөскы-ыд! Видлөй...

— Вайлы, инө,— босьтис Геня кыысь шапкасө Микол, нырис колькьяссө да мичаа и ниртис лякөссөм шапканас Генялысь рожасө. Джыдж колькьясыд өд абу галя из, бөр он сюяв жугөдөм-пазйөм позьясас...

Ёна стрөжитим Геньос, а сійө, дугдис бөрднысө да, корис: некодлы пө эн висьталөй, ог кут сэсса пакөститчыны, а со, абу вежсьөма обичаыс.

Тайө кадөдзыс Мишка Вань Ёльоксанкөд пөшти төдтөмөсь вөлим, а сэсса ёртасыны кутим. Кор быдмыштим, унаысь ветлывлім ськөд вотчыны, вөравны.

Матыстис миянос ота-мөд динө Шожымка ю вомон нюжөдөм пода пос, чужтис-йитис вок сяма ёртасыөм сідзи жө, кыдзи ми йитим векныдык вөрса юлысь берегыяссө.

НИМА ДАДЬ



ыз му улын куйлө миян грездса зон-
каяслөн быдторйö бурас велöдысь-
ыс, Венялөн дедыс — Опонь дед.
Кадысь вывті-вывті водз муніс шон-
діа югöра вöльнöй светсьыс и вну-
кыс — Веня ёртöй. Электрикъяс-
лысь училище помалöм бöрын мортыд, армияöдыс на,
«Комистрой» трестын бригадирöдз волöма. Уна судта
керкаясö югыд би пыртöдалöмаöсь. Сэсянь и армияс
муніс. Колльöдімсö, дерт, гортсянныс, Митерас грездсянь...
Княжпогостас öд, мый Сыктывкарысь, мый Вöркутаысь
и, весиг Коми мулөн медпыді пельöсьясысь, Летка —
Ужгаысь, öтлаö чукöртöны. Со и лэдзöмаöсь гортас.

Öти воö мунім армияс. Веня — кык тöлысьөн меысь
водзджык. Германияын служитліс, а ме бöрря квайт
тöлысьсö — Польшаын. Том вöралысьясыд збойöсь вöлім.
1961 воын быдсяма сьöд империалистическöй вынъяс-
сьыс видзим демократическöй муяс. Веня танкнас Бран-
денбург дзирья видзöма, а ме Польшаын кутш сяма
ыджыд бомбардировщикъяс улö, эг öтнам, дерт, — нель-
өн — öкмыс пудья бомбаяс öшлім. Эз эськö найöс не-
кытчö шыблавлыны: повзьöдісны кöнкö йöз му вылö гор-
шасьысьяссö да тшöтш и найöс, кодлы войнаыс колö,
кыдзи понлы бедь. Асьныс, миян лётчикъяс, эз жö, тöда,
ас окотасьыс журьявны-шывьявны йöз му сынöдтыс.
Шлёмсö пöрччасны, да шапка пель увсьыс ньылöмныс
виялö...

Веняос армиясыыс январь помын лэдзёмаось. Менө — февраль шөрүн. Москваын воча чой ордын вежон гөсти-ти — төлысь помас гортө зым-зурк вой шөр войын вои. Салдат мешока, ичотик чемодана.

...Мый сэкі вөлі! Мамлөн, Рая чойлөн радлуныс! Мам пырысь-пыр көрт пач ломтіс, пөжасьны-пражитчыны кутіс, а Рая кытчөкө уличө котөртис.

— Кытчө нө вой улас чойой лэбзис? — юала мамлысь.

— Веня ордад... Гортын өд сійө... Тшөтш и грездсө ставна-нас шызьодас... Виччысь дона гөстьясөс,— такөдіс нюмъялысь мам.— Личөдчы...

И збыль, эз на коль и час джын, пырөны нин Рая, Веня, а сыкөд и бокөвөй, яндысьысь нывка.

Кутчысьлім, челядь моз, ныр на ныр, окасим Венякөд.

— Сөрмин, другө, а ме нин со гөтраси,— ошйысьыштіс Веня.— Төдмась...

— Оксана,— ыджыд кимөдза веськыд кисө небыда пуктыліс менам ки пыдөс вылө ныв.— «Комистройын» крановщица... Веняос, шойччыштас да, мастерө сэтчө жө босьтөны...

— А мамыд нө? — юалөмөн синмөс сувтөді өрт вылө.

— Хы! Гожөмнас — тані, а төвнас — карын... Нинөм на тэ он төд. Аслыд на, Пашө, ковмас пышйыны татысь... Грездад өд Столя гозъя олөны, менам мам да ті нин сөмын... Би ни радио тані... Гажтөм...

Квайт керкаа грездын карасина лампаөн нэмсө и овлім. Сійө войнас мам стеклөа кык лампа өзтыліс. Дас — дас кык морт, пызан гөгөр, йөзыс, көть и кусны нин мөдөм грездысь, чукөрмылісны жө...

Бура пасйим локтөмөс. Веня, пызан сайын на, «Даймон» немецкөй пөнарик мен козьналіс да авторучка кодь индикатор. Проводысь электрическөй ток петкөдлө — электрикы, ме өд электрик жө, вывті ёна коланатор.

Комын во коли, а век на вьлькодь казътыланторйыс. Синмөс моз видза да...

А вот Веня кувсьыліс...

Сыктывкарын, Микуньё поездсё виччысигмоз, Веня исласьё вёлём вокзалдорса туй бокёдыс велосипедён. Арён-джынійона Галя нывсё гартыштём пёдушка вылын руль дінас, велосипед рама вылас, пуксьёдёма... Вот сэки и тангас найёс самосвалнас код юра шофёр. Кежнысё некытчё лоёма. Веня вына кинас чөвтас Галя нывсё джуджыд канава бокас. Нывкаыслы немтор, а ачыс машина улас веськалө.

Дзевим ёртёс, а сідз нин нёрпалысь мамыс дзыкөдз эбёснас уси. Отнасёнсё гортас повны кутіс узылынысё. Миянын, паччөр вылын, войсё колявліс. Вийсьёмысла рөдимеч — пыркөдана висьём на кыськө көласис. Та вёсна и поліс, буди, отнас гортас узылынысё. Кватитас висьёмыс — менам мам кымёс вылас көдзыд ваён көтөдём ки чышкөд пуктас, топыда шамырталас кыкнан кысьыс нимтём чуныяссё да мортыд пыр и лёньё. Сэсса, коньөр мортыд, лун шөрөдз шкоргёмён узяс...

— Вузали керкаёс,— отчыд шуис Венялөн мамыс.— Урдёмаё овнысё, Син пи ордё, муна. Аски, Пашё, ветлам мянө, чукөртыштам, мый меным нунысё...

Морт кө корё, кызди нө он мун...

Лунтыр пузыйысим овтёмөн нин кажитчысь, но быдсяма көлуйнас тыр олана на керкаас. Месё, дерт, ог лукйысь. Венялөн мамыс — мый колё аслыс, мый туянаыс Син пиыслы да сылөн врач гөтырыслы, аслыс и,— чукөртышталө. Ме мешөкьясё, кудьясё тэча да көртася сөмын...

— Кремнёвкаыс оз ков? — юалө Лидия, Венялөн мамыс, да пач колассыс перйө сой кызта пищаль ствол.

Видзөда, салдатө ветлём мортыд, да гөгөрвоа, абу эськө «кремнёвка» — шомполка нин. Стволсянныс гарйёны зарадитчөны вёлём, но өнія кадө абу нин и лыйсянтор.

— Вайлы, вайлы, видзөдла,— кори.

«Приклад ни курук...» — виддала-мөвпала.

— Опонь дедлөн, буди, томдырся вөралан угоддьоыс,— доньялі,— шыбита гөбөчад, мед нин... Музейо нин оз туй.

— Шыбит... Муысь чужис, муо воас,— тыдало, верос батыслөн, Опонь дедлөн, кывъясон кывберитис Лидия.

Кык жыръя керкасыс ме аслым выло бөрийи некымын книга.

Керка бөрас жөбйим кум и йирк выв. Доза колана кламыс чукормис. Олом од корко овлөма. Сы мында чукормис, коть менам ерт Венялысь ветымын вит арөса висысь мамсо модысь верос сайо сет — приданнойыс со!..

Опонь дедлөн мастерскойо Лидия здук кежло и нырсо суйлис.

— А татысь меным нинөм оз ков,— нурбыльтис,— мед пузьясны.

— Кы-ыдзи-и-и! — чуйми ме.— Да тани жө... Тани жө Опонь дедлөн став озырлуныс!..

Стружъяс, гогынъяс, стамеска-өжынъяс, пилаяс,— столяр-плотниклы став коланторйыс — ставыс джаджъясын. Бусоссьомаось, дерт, кыз черань везйон тырөмаось, но кыз пуктылома козяиныс, сидзи некод, тыдало, абу и вөрзөдлома.

— Инструментъяссө, ставсо тайос, Ксенофонтыды и нуан,— шуа.

— Чөв нин Син помысь, Пашо... Оні од сийо Урдомаас каменной көрөминаын оло... Жыръясыс сөстөмсыс-сөстөмөсь... Тяпион тапъялоны... Ме вот валедиа да, кок кымло да... кыз-мый понда... Керкаыс жар эсько да, но тиян кодь паччорыс абу... Медкось, велала од... А Син помысь... Сылон кутшөмкө гараж эм. Лун-лун кутшөмкө пиня гөгыльясон ноксьо, моточиклас луасьо... Стружъяс-гогынъясыд тай сылы... Веня, шоньяной, небыд му сылы, дед кок туяс эз тувчы ни,— бөрддзис Лидия.— Босыт аслюд... Дады баласо тшөтш и... Армияөдзыд, Опонасейлөн кувсьом бөрын нин, помнитан од көнкө, быд төв рен-

дуйтлін тайö баласö... Калымитлін на,— серöктіс Лидия.

Тайö пенничайтöмыс меным эз кажитчы.

— Стружъяснад дай...— шуа.— Ковмас кө — ньöба.

— Босьт, босьт,— Лидия тшöктö.— Опонь дедыкдö
öд ті... Сапöг гоз кодьöсь вöлінныд...— бара серöктіс.

Эз, Лидия эз вийсьы öні эмбур вöснаыс. Кöсийс сöмын,
мед сяма мортлөн вöчасян көлуйыс көзяин киö жö и весь-
каліс.

...Опонь дед дінын, помнита, ичötсянь бергалі. Сійö
дадь либö додь вöчö, а ме сылы отсая... ёнджыкасö, дерт,
мешайтча, падмöда уджсьыс, но оз скөрмы мортыд. Каллян
пыдди вомас — струж улысь вöснисьыс-вöсни чаг ням-
лялö. Мен сійö «мöсьясöс» пись чальöбсьыс вöчалö —
серöдöмөн, нимтöмөн, а ме синъя — велöдча сылысь.

Коркö-некоркö стамескаөн-стружйөн велöдіс уджав-
ны, а ачыс куритчöм пыдди пыр нямлялö кырсь-чаг.

— Чагйыс кампет, Опонь дедö? — юала.

— Мый көра пуыс — сійö, көсьян кө,— сыысь и арт-
мас... Пуыслысь көрсö быть колö тöдны... вом пытшкöс-
над пуыслысь көрсö колö кывны... Сэк, сöмын сэк пу-
сьыс мыйкö путной артмас, йöзлы коланатор...

Ме нямляся жö, но медсясö сы вöсна, медым Опонь
дедды пыдди уськöдчыны. А сійö тайöс быттьö оз гөгөрво:
велöдö, велöдö, а сэсса и стружсö киö ётшкыштас.

— Ноко, шарсйы,— шуыштас. И пыр велöдö.— По-
мöдзыс чагсö ну, эн орьöдды.

Тадз жö и Веня внуксö велöдіс. Но Венялы тайö уджыс
эз вöв кивыв — пыр и дышöдас. Шыбитас сэсса стружсö
да Модя друг дінас котöртас, а ме Опонь дед дінысь сёр
рытöдз ог вешйыв.

Кадыс мунö. Коркö и ачым дадь сюв вылö мича кыз
бöрийи. Пöрöді, чинті, поткөді, лöсали, пилитали, кыті колö,
дадь сювсö — кусыньтанінодыс, дадь ныр вылас. Опонь
деддысь дадь сюв кусыньтан баласö гортö вайи. Öдъя
пывсянын дадь сюв пусö ёна и пöжи ключ пузьöм ванас,

но немтор эз артмы... Пидзöсалис дадь суюйöй. Кыткö мичаа, балаыс моз кусыньтчис, а уддорыс гырдаза моз пидзöсалис.

Эз артмы дадь суюйöй, а сэтшöм окота вöли мам водзын ошйысьыштны: «Видзöд, мамö,— ачым нин тэд турун ваялан дадьтö вöчи...» — шуи эськö. Эз удайтчы ошйысьнысö.

— Аски жö пачад ломты тайöс. Кыддыс, буди, лёк,— пу вылас скöрми.

— Энлы, пиö... Петкöдды ассьыд медводда izdelьötö Опонь дедыдды... Сийö и донъялас...

— Донъялас, дерт! Донъяли нин со ачым... Медтыкö аддыласны татшöм дадьсö — мир смек!

— А тэ век жö петкöдды... Юав, кыз-мый, а пескад тайö век воас... Сартас пыдди на... Ломзöдчан вылö туяс...

Кывзыси мамлысь да и нуи дадь сую пöлöс Опонь деды, кор, дерт, Веняыс гортас эз вöв — исласисны Модякöд Лун бок кырийн. Опонь дед видзöдлис менсьым уджöс, зумыштчылис.

— Ножовкатö нö батыд на тöчитлис? — юалис.

— Мам нин, буди,— аддывлі мамлысь ныж напилökön пила гольскöдöмсö да, висьтала.

— Ныж ножовкаыд, ныж... Этати со гөрöмыд пусö, а пытшкöсланьыс прöпилыс абу и пыралöма. Со и пидзöсалис увтысджык, кöни тэ суюсö тökötтьö абу орöдöмыд... Додь кöть дадь сую бура кусыньтчас, сямман кö öткодь коластьясөн, öтджудждаö, прöпильяссö вöчны,— петкöдлис ассьыс уджсö.— Тадзи...

— Хы-ы...

— Аддылин? Нулы менсьым ножовкаöс... Аски бөр вай. И ассьыд тшötш вайлы. Лэчтыштам...

Мöд луннас ножовкасö, дерт, бөр вайи. Опонь дед и менсьым на струментөн вöчис, велöдис кызди колö лэчтасьны и...

А дадьтö ме вöчи... Эз, дерт, чача кодь кокныд да гылыд ло, кöть абу жö и пур кодь, но мам да чойяс сийөн

сюв бырмёныс кыскасисны... Мусмёма налы менам мед-воддза даддьёй. Дыр кыскасьюмсьыс сювйыс волялёма, лоёма гылыд, а дыр каднад, гожёмбыдьясён косьмигас, кокняммома борд кодьёдз.

Армияё мунтёдз, Опонь деدلён кувсьём бёрын нин, сылысь дадь баласё ме гортын, позьё шуны, куим төв видзи. Ассьыным рёдвужёс даддьёді да нёшта көрт туй дистанцияс Рая чой — сійё путеецён вёлі — быд бригадаё дадьясёс вузавліс — төвьясын менам кутшёмкё компаниятём фирма лоис.

Прөст кадё пыр вёлі дадьяс вёчала. Со тай и шуис Лидия: калымитлің пё. Калымиті-ё, эг-ё, но нянь-сакар выло пыр најёвитлі.

Опонь деدلён мастерскёйысь петём бёрын йирк вылас на лукйысьыштім. Кык дадь сэні вёліны. Крепыдось на. Сюв вылас, дадь нырланьыс сотёмён вёчём гижёд: «Аф. Маслов».

— Оз нин вош, нима дадьясыс! — серөкті да петкөдла Лидиялы.

— Быд даддьё и доддьё вёлі пасйысьё,— вочавидзис Лидия.— Медым пё төдісны, коді вёчис... А мый, яндысьнысё мортыслы нинёмысь вёлі. Изделльёясыс мичаось, ёнось, кокныдось. Памилльё-ним вылас букваыссё кузнечлы на дорёдлёма...

Коли уна во. Ачым со карё жё овмөдчи. Неважён гортё лэччылі. Рыгнас пывсим, пызан сайын пукыштім, а асыв-нас босьті чер, сутуга да кайлі Митерасөдз, вёвлём чужанін грездөдз, пипуа-кыддза раскё. Дыр бөрйысьём бёрын и пөрөді куим томиник кыздз. Кыксё чинті сыв кузяё: аслым өти дадь — дачаё, мөдөс — чойлы, а коймөдсё, сой кызтаёс, кок нырсянь морөсөдз чинті — челядьлы исласьны дадьсё вёча.

Эн дивит менё, коми парма. Вунөдны нин со кутім Опонь дед кодь сяма йёзыслысь мастерствосё, а оз өд позь. Вёвлём бур вөралысь босьтліс сэтысь сөмын сы мында, мыйта йёзыслы коліс.

АСЛАД ЧЕЛЯДЬЫД ЖАЛЬӖСЬ



ойкӖд сёрнитчӖм серти пӖшти вежон вылӖ отпускӖ петан кадыс менам нюжаліс. Кывлі: Рая чой ытшкыны нин петӖма. Сэсса эськӖ сизимӖн жӖ, гырысь и посни, лэччим карысь, но сёрмӖмӖн.

А ытшканыс — вӖвлӖм усадьба Митерас грездын, эновтӖмин, кӖні туруныс пуритӖ-быдмӖ — ой-ой-ой! КартупельлӖн, идлӖн ёна куйӖдалӖм, но важӖн нин эновтӖм муяс вылын коса вороп чегмӖн быдмис бобӖнянь, шыранькытш, шобді кодъ заа шепта турун. И туй вылыс грездас, миян юкӖныс, зэв жӖ туруна.

Абу на удитӖма чойлӖн ставсӖ уськӖдны. ЛоктӖмсянь мӖд асывнас, челядь котыр узьӖны на, кайим МитерасӖ, ытшким лун сьӖвмӖсӖдзыс. Но жар луннас сьӖкыд ытшкынысӖ.

— А ме Ӗд карас кык вежон нин эг пывсьыв. Лэччин эськӖ, чойӖ, пывсян ломтін,— шуа пажын дырйи Раялы, а ачым синмала видзсӖ: «менам нин тайӖ уркӖвӖй...» — мӖвпала.

— ЭтійӖ ытшкышт и — шабаш. Локтігкежлад пывсян лоӖ дась,— нбылыд лэдзис чойӖй да пыр и лэччис гортас, ШожымӖ.

Жар луннад, кӖть и лэчыд косаӖй, он на ӖдйӖтӖ ытшкы. Митерасын, кӖні ме чужлі, кызь вит арӖсӖдз быдми — менам гортӖй. Пыри керкаӖ: воді паччӖрӖ да нистіузи Ӗкмыс час рытӖдз. Садьми, бура ужнайті да петі

ытшкыны лысва вылас. Вылынкодъ нин вöлі шондыс асыв-
нас — став видзсö пөрöді. Лысва вылад кокни ытшкыны
да эг и мудз весиг. Туйсö уськөді да весиг гумла дорö на
кайлі. Кутшöм йöй нö лун шөрнас ытшкө? Войнас ворсöм
кодъ ытшкынысö.

Аскинас тай воисны: Раялөн менсьым став «армия-
öс» — ув и чаль — вайöдöма, весиг квайт арöса Сашаöс.
Папöос пö, навернö, ошгъяс косявлісны... Войбыд май-
шасьöмны.

— Колö кодлыкö тэнад папöыд,— серала.

Унанад важ ытшкөмсö ставсö куртім-юралім да зорö-
далім. Войя ытшкөмсö на бергөдлім и.

Мирөн-ладөн лэччисны сэсса ватагаыс, а ме бара кольч-
чи батълөн керкаö... Саша кольчис жö. Сёян-вөлөгасö,
бытгьö ми мосьяс, вежон кезлö тырмас, колисны...

— Па-а-ап? — нюрöстіс Саша.— А вай петкөдлы мен
ошгъяссö...

— Ошгъясыд öд сюсьöсь, пиö, кытысь найöс аддзы-
лан,— малышті юрöдыс быдтасöс.

— А тэ коркө найöс аддзылін? — юалис Саша.

— М-м-м... Кыкысь на удайтчыліс...

— Стяшнöйöсь? — Сашалы, кызди и меным, «р»-ыс
школаö пыригөн сюри.

— Абу стяшнöйöсь. Полöны мортсьыд...

Эз ков меным тайöс шунысö. Бöрынджык төкөтгьö не-
минуча эз ло...

Кыз сямми, юасьö да, пилы висьтавлі ошгъяс йывсьыс,
дерт, эг повзгьöдлы ичöt мортсö.

— Петкөдлы, петкөдлы меным ошсö,— кутіс нöйзыны
Саша пийö.

— Петкөдлы тэныд,— серала ме,— нэм джынйö вои, а
шуа тай, кыкысь сöмын аддзылі... Оз көсйыны найö йöз
син водзас ветлөдчынысö... Йöзыс ошкысь полöны, а ош-
кыс мортсьыс — нöшта на ёнджыка полö,— такöда пиöс.

— А ме вот и ог пов,— кыв көрталіс Саша.

— Эн и пов! Мужик өд тэ менам...

Гожся рытыд вывтi кузь. Аспом турунсö, мед небыд-
бурнас, сöкнас сюрö, пуктывлiм Иван лун бöрын пыр
жö. А сэки вой шөр войын лыддысьны позьö. Войбыд
оз пемдыв.

Дзоля пикöд ошгъяс йылысь сёрнисö ме нин вунöдi. Оз
вотыштны сийöс нуöдi. Термосын — пöсь йöв эм. Мися,
озгъя йöлөн кагасö чöсмöдла бөрти. Мунiм Пронь нöвина
дорö оз вотны. Сэни сийö гырысь быдмö.

Местаяс корся, сэсся и Сашаöс чукöста. А сийö ризъ-
ялö вёртыс. Волас, бөр вошлас пуяс сайö.

— Ылö эн мун,— шуышта сöмын, мед оз вош вöрас, а
сiдзсö сэсся чöv вотчам, шыавтöг-горзытöг.

Кружка менам важөн нин тыр, но он тай озсьыд ум:
колö и колö чöскыд юмолыс. Вомö нин вота. Саша оз жö
нуöдчы ни...

— Па-а-а-пö! Волы татчö, волы! Ичöt мишкаяс! —
весьöпöртiс Саша пийö.

«Но морö, збыль кö? — югнитiс юрын,— Мишкаяс?
Сiдзкö, пьяна ош! Пьяна ош, кодöс ачым на нэмöс эг
аддзыв, но кывлi: зэв пö сийö скөр. Пиянсö дорйигөн пö
пазйö-разьö, парсалö-вурсалö ставсö, кодi кöть чуньяс-
нас вөрзьöдас быдтасъяссö. А менам өд сэни пийö жö.
Ныв котырын дзик на öти пи... Менö вежысьыс... Мен-
сьым рöдвужсö паськöдысьыс... Со, эстöни, кызь воськов
сайын, горöдiс», — ставыс тайö гым би моз югнитiс юрын...

Шы сеттöг, руч моз гусьөн, ыджыда чеччалöмөн стöча
и петсис менам Саша вылö, Пронь нöвина кушин вылö.

Войнаöдзыс батьяс ректылöмаöсь тайö шорсайса мыльк
йывсö, қöдзлöмаöсь öти во зөр, а сэсся, куйöдтöгыд —
шорыс сувтса берегьяса вывтi крут да — эновтчöмаöсь
мусьыс, шорас вövъяссö весь песöмсьыс. Татшöм кушинъ-
ясас гожöм шөрнас быдмис пев пом кодь тусьяса оз, а
арнас ягсерсö — кöть зырийөн зырт. Вотöсыс эрд гөгöрыс,
вöрас — пув, чöд! Мый нö ошгьясыслы сэни не овнысö!

Олісны... Мёслы водздзык «сьёкыд кадас» турун ытшкывлім татшөм эрд-нөвинаяс вывсьыс, гусьён, войын. Ошъясыс гусьён жё, войын жё, тулыснас водз-водз, став видз вывсё пач чышкан лыс кодь лапаяснас гарйёны: муса пияныслы муртса ловзьём вужъяссё восьтёны, номыръясёс да.

Ышка-пошка петі Пронь нөвина вылө. Сашаөдз — воськов кызь. Сысянь уна вылө воськов комын ылнаын стройын моз, бөр кокъяс выланыс, сулалёны куим ошпи. Кык дорсаыс, тёдчө, Машкаяс, Сашалы, буди, пельпомөдзыс оз на лоны, а Мишкаыс чойяссёс весьтөн джуджыдзык. Ошпияныслы, коньөръяслы, ар джынйыс эм-ө, абу-ө. Ичөт пөрөдаа пон кодьёсь на ёкмыльяс. Но мамыс өд абу коньөр! Повзи...

— Ми-и-ишкаяс! Ми-и-ишкаяс! — горөдіс Саша да воськов бөрся воськов мөдөдчис ошпиянланыс.

Шуйгаладорас сулалысь Машаыс, видзөда, лэдзчысис нель кок вылас да, лапаяссё вылө-вылө лэпталөмөн, тшапа мөдөдчис менам Сашалы воча. Мишкаыс сюсьджык ли, пестунняён лоө да ичөтсяныыс асьсё төдөмөн ли, оз лэдз миянлань мөд Машасө, лапаалө, бөрлань зырөдө, көсийө жө вөлі сійө чой бөрсяыс мөдөдчыны да. Матыстчөны, видзөда, пиян... Менам кийн некутшөм өбөрөна абу, а тайө куим чоя-вокаыслөн мамыс ёсь гыжъя, пинявома. Сыкөд он на водзсась.

— Сашш-ша-а-а!.. — весьөпөрөмөн горөді ме, уськөдчи пилань да сувті водзас. — Ав-ав! Вур-вар! Ав-ав нө! Ав-ав! — повзьөдла ошписё. Но сылы, тыдалө, веськодь: локтө и локтө, тапикасьө. Абу на, тыдалө, аддзывлөма ни кывлөма мортөс ни понйөс да повнысё на оз куж.

— Зверь тэ! — мый вынысь горөді ме. — Мун аслад туйөд! — Кок улысь босьті палич пом да жбоньөда-кучкала муас.

— Ч-чу-уш-ш-ш! — варөбтіс сэки вөр тырнас да мелань уськөдчис мам ув кукань ыджада ош, ошпиянлөн мамыс, дерт.

Вөрсянныс нельыс чеччыштөмөн сійө воис ныв дінас, галөбалис сійөс лыс кодь паськыд лапанас бокньыд-бөрвыв, сувтліс бөр кокъяс вылас, би гөрд вомсө паськыда восьтөмөн бара чушнитіс паровоз моз, быттьө и сьольштіс на мелань, но измөм мортөс аддзөм бөрын бөр лэдзчысис нельнан кок вылас, тшөг порсь моз рукөстіс, дыша бергөдчис, воис пьян дінас, бара галльөдліс найөс да здук мысти ош семья эз нин вөвны Пронь нөвина вылын.

Дыр-ө ме измөмнас сулалі — ог төд... Саша, тыдалө, пальөдіс весьөпөрлөмысь.

— А ош-мамыс ой кутшөм скө-өй!

— Йөй эськө тэ, да мый сэсся тэкөд вөчан. Мыйла нө ошпьянланьыс мунан? Петкөдліс эськө налөн мамыс тэа-меалы «скө-өй», эсію кыз йылас эськө өшйин. Пьян вөснаыд өд мыйсө он вөч. Аслад челядыд тай быдөнлы мусаөсь, жальөсь.

БОСЫТТОМ ВОДЗОС



изим класс помалом бөрын, мыйта эг вөйысь, ремесленнөй училищеё менө гортсаяс эз лэдзны. Некодлы пö лоө вайыштны пес да турун, овмөс гөгөрысь мужичөй уджсө бергөдны.

Öд батыастөг быдмылом грездса зонкаяс дас кык-дас куим арөссянь нин кужим мыйяскө черөн лөсалыштны и мөлөтөн тувйыштны.

Эз кө лэдзны училищеё, и школаö эг мун. Эновтчи велөдчөмысь. Совхозö пыри. Но төвнад кутшөм сэни рөбөта? Лунтырөн додь турун вайышта либө чаньясөс додь вож костын ветлыны велөда. Дарья Коль, конюкыс, доверяйтö вөлі — тэныд удж пö и эм вөвьяссө велөдөмыс. Пельк йөзлы пö и вөчны сөмын тайö уджсө. И мынтысьлісны öд бура чаньяссө велөдөмысь. А кызди жö — вөлі чань, весьшөрö турун сөйысь, а вежон мысти, видзөдан — сэтшөм пөслукман вөлөн лоө, турунла көть песла доддяв.

Но школа дзыкөдз эг жö эновт. Ветлом-мунөм йөз велөдісны: армияын дас класс помавтөг сьөкыд лоө служитны. Веськалан сэтчө, көні сөмын лөма да зырья удж бертөны, кодьясөс тай военной строительясөн шуөны... А сійö нө служба?

Пыри рабочөй том йөзлөн школаö. Көкьямыс час рыт-сянь дас кык час войөдз велөдчим, вежоннас вит лун. Велөдчөмыс, сідзсө, вьль ёртьяскөд аддзысьлом кодь — нель частö нө мый пукалыштны. Арся няйт дырйиыс Шожымын Мишка Вань Öльөксан ордын узыльвлі. Öти

парта сайын и пукалім ськөд. А сэсся, лым усьом да вёла туй пуксьом бёрын, и гортё куті ветлыны, көть туйыс и эз вёв дженьыд: куйм верст Айкина-Шожым пыр и нёшта, вёр пыр, Митерасөдз куйм километр.

Повны ёна эг пов, но өткөннас, вой шөр бёрын, оз жё сьылігтыр ветлыссьы. И йёзас узьлыны ёна эз кыскы. А сьёлөмсянь кө висьтавны — гажтөм и эм өткөн кузь туй таявны, көть энөвт школасө.

Коркө и мамлы норассьөма.

— А төварышөс аскөдыд заводит новлөдлыны дай га-гаджык лоө,— сьёлөм сетө мам.

— Да-а, төваришөс лөсьода! Нёшта шу, гөтрась пө да кыкөн кутанныд ветлыны.

— Но, гөтрасьны ог на жө тшөкты,— серөктіс мам.

— Мишка Вань Öльөксанөс, сідзкө, чуйдны кута кайлывлыны мекөд Митерасөдз,— ог гөгөрво, кытчө мамө синө сёрнисө.— Кольөд, мися, Öльөксан, менө гортөдз, гажтөм меным да, а аски асывнас гортад лэччан?

— Мыйла нө Öльөксансө? А Лыскоыд нө? Таковскөй тай... Ветлөдлас... Поннад, майбыр, оз ло гажтөм...

— Вежөра тай эськө и вөлөмыд. Ме кута велөдчыны, а Лыско мөдас катшъявны классын, йөзыслысь серамсө петкөдлыны?

— Но, классад өд, дерт, он пыртөд... Пасьыс шоныд, кильчө улас виччысьлас, а урокъяс бөрад сэсся өтлаын и кутанныд локны.

Тайө вот меным юрө эз и волю. А збыль өд, Шожым-Айкинаас ми кымынысь ськөд лэччывлім. Казялас кө мунөмөс, вөтчас — нинөмөн сэсся он косөд. Турунла Няшаө лэччылам — Лыско зорөд улас лукйысьө, шыръясөс корсьө. Рыгнас лавкаө либө кодкө ордө пырала, оз нин, майбыр, коль. Виччысьө кильчө дорас, и көть өд мый дыра. Öтлаын и локтам сэсся гортө.

— А мый? Пөжалуй, и виччысяс өд! Кымынысь сійө мекөд удж вылө совхозө ветывліс, ни өтчыдысь на эз кольлы... Колө либө и новлөдлыны.

Сійо жё рытнас Лыскооc шыд колясөн пөттөдзыс верди дай и мөдөдчим школаө.

Понлы нимкодьыс! Котөртиштлас ыло водзө — бөр волас. Кодкө кө паныд локтө, ылісянь жө увтөдас, кытчөдз оз төд, мый ас сиктса сійө, паныд локтысыс.

Унаысь весиг Рая чойкөд паныдасьлім. Көрт туйывса уджалысьясыскөд Айкинаө няньла лэччылөмаөсь.

Любө Лысколы, ас мортөс аддзас да. И кылө өд ёсь ныриснас — нопгяс чөскыд көра роч нянь, чери либө нөшта кутшөмкө сёян вайө. Гортын сэтысь и сылы вичмөдасны. Но локтысьяслөн ме дінті прөйдитөм бөрын, сөмын неылөдз найөс колльөдыштас. Бөр ме дінө косө да мекөд и муно сэсся.

Ас морт эськө, өти семьяысь, но менө со көзяиннас лыддьө и пыдди пуктөджык. А кызди нө! Арбыд өтлаын сьөла-ур кыям, дозмөрсө кымынөс увтөдліс. Урсө лыя да медводдзасө пыр и куля. Пось яйсө сылы сета. Пажын дырйи и кыкөс на сёяс. Коді сэсся сійөс ме мозсө чөсмөдлывліс? Со и көзяитө мекөд. Кытчө муна, сэтчө и сійө, путшпөв, вөтчө...

Школаө пырны ог тэрмась. Лысколы сумкаысь небыд көлөб либө көлач сета, дурыштам-кутлысьыштам недыр. Том на понйөй да дурнысө ёна радейтө, вур-вар на сетлас, бытгьө курччасьө. Котралө гөгөр — кут пө! А сэсся инда кильчө улас.

— Вод, Лыско, вод. Ме тайө керкаас пырала, а тэ виччысь менө, эн коль. Петігөн чукөста...

Лыско пельяссө вөрөдө, бөжнас өвтчө: гөгөрвои пө, гөгөрвои.

Аддзылас өдзөсөдыс пырөмсө дай водас кильчө улас. А ме сійөс ог жө рытивбыд кежлө эновт. Урок мыйөн помассяс, перемена лоө да пыр и петала пон дорө ывлаө. Нянь тор, көлач, преник либө кампет петкөда — мый эм сумкаын. Корсюрөяс целлофан мешөкө и лытор на босьтывлі. Мед, мися, вильөдчө нем вөчигас.

Тöлысь нель, дырджык на, тадзи Лыскокöд школаö вет-
лöдчим. Зэв сьölöма, терпеливöй пон вölöма. И эз öд
вöвлы, мед коркö сийö менö эновтліс. Гузыкылö петам
школаысь, шутёвта понлы да сийö и петас кильчö увсьыс.
Чеччалö нимкодъысла, чужöмöс кöсийö нюлыштны.

— Гортö, гортö Лыскокöд мунам,— меліа сёрнита
понкöд.— Талун сэсся некытчö нин ог коль.

Школаса ёртгяс шензьöны. Эсы дыра пö терпеннöйс
понйыдлөн тырмö виччысьнысö. Ошкöны Лыскоос, а
нывгяс и жалитöны. Кынмис пö, көнкö, коньөр.

— Оз кынмы. Пасьыс зэв шоныд,— гöныс кузь, пукыс
тшöкыд,— збыльсö нин висьтавла ёртгяслы.— Вöрالیгөн
Модялөн понйыс пыр öтарö зильö дзевсьыны вөр керка-
ын нар улö, а Лысколөн пыр öти места — пашкыр коз
улын, арын кöть тöлын, узьлö. И гортын керкаö гежöда
пыравлö. Звöз улö моздор турун шыбитлі, да сэнi и узьлö.

Сёрниөн-басниөн Айкина тадзи прöйдитам, Шожым
сикт. Гортас пырысьлы «Видза колян!» шуам да водзö
мунам.

— Гашкö, инö, узям миянын? — горт дінас воём бöрын
пыртöдö ёртöй, Öльöксан.— Аски öд асывнас водз-водз
бара ковмас локны совхозад. Унмыд оз веськав?

— Гортö муна-а-ам! Видзöд со, Лыско вель ылö нин
пуксьöма туй вылас, гортö нуöдчö... Колö мунны. Бур вой!
Аскиöдз...

Оз бара гажтöмыс понкöд туй вылас босьтлы. Тöдлытöг,
быттö, и воам гортöдз...

Öтчыд школаын контрольной вöлі да кык урок чöж
ывлаас эг петав. А сэсся, кор петі, дыр чуксаси — Лыско
некыгысь эз лок. Эз лок сийö и мöд перемена дырйи, и
урокгяс бöрын.

Айкина кузя и Шожым пыр мунигөн чуксаси-шутьялі,
но пон сідзи эз и лок.

— Кык урок чöжыс эг петав да со эновтліс,— майша-
ся,— гортö, тыдалö, öтнас муніс...

— А дерт нин, муніс... Локтіс өд эськө... Узь миянын, аски аддзысянныд, — пыртөдө ас орданыс Өльөксан.

— Кутшөм нин узьөм! Сьөлөм мыйкө абу местаын... Некор на өд эз кольывлы тадзсө... Мый сылы юрас пырис? Мый вермис лоны?

Мөдөдчи гортө өтнам. Медбөрря керкаясыс колисны бөрө, Өньө му вуджи — пон абу и абу. Сідз некытысь эз и лок, эз вөтөд ни.

Лэччи Шожым кыр. Төлысь эзысь тазйөн вөртас весьт-сьыс ёна нин вылө кайөма, сьода-еджыдасө лючки нин торйода. Митерасөдз сэтысянь куим километр вөр пыр нин колө мунны. Шөр гөпсянь миян град йөрьясөдз.

Вой шөр бөрын вөр пыр өткөн мунны, поннас велалі нин да, гажтөмов, көть и повныыс нинөмысь — абу мир туй, кыті эськө шпанаяс ветлісны. Сэсса, комын градус көдзыд чишкалө да, кутшөм шпана? Шожымті мунігөн ни өти пон оз увтөд — узьоны Шарикьяс да Тузикьяс.

Но, вайөдіс менө вөла туй вөрө пыранінөдзыс. Миян грездө гөрысь-көдзысь тракторьяс кындзи көлесаа машинаяс, непөштө төлын, гожөмнас эз воывлыны. Квайт керкаа Митерас Емдін ув районса Айкина сиктлөн вөлі торья государство кодьөн. Лавка ни школа, би ни радио...

Война кадас, бөрынджык, во-мөдсө изаса-тшака нянь жө, кыдзи и быдлаын, сөйим, но грездын, кыдз помнита, тшыглы некод эз кувлы... Эг нин дзык абуас лэдзчысьөй. Муяс тырмымөн вөчлім-паськөдлім.

...Кежыштсис тай висьтасьөмысь... Шөр гөп дорө вои со. Вөрас нин пыри. Ывла көдзыдас кок улын юж лым-йыс, мурч-марч — вөрыслысь чөв-лөньсө шызьөдө.

Видзөда: кодкө меным паныд локтө... Оз лок — сьөд вуджөр ме дінө матыстчө... Воськов комын сайын... Дзык өд кок шыястөг.

Лапниті синьясөс — вуджөрыс, видзөда да, абу... Вөли-сти тай повзи!

«Морт кө вөлі — эз вермы вошны, ру моз сывны, пон кө — увзөдіс эськө, векныд вөла туйсьыс кежыштны

корис, косіс эськө көзиян дорас да увтышталомён-эргөмөн
отлаын ськөд бөр локтіс... Эз...

Господьой да Енмөй, видз менсьым оломөс-лолөс, Исус
Христосой! — повзи дай и Енмөс со казтыштсис, көть
некор ог юрбитлы-пасъясьлыв. А со, пернапас вөчи төлы-
сьыслань чатөртчөмөн.

Синъяс эз пөръявны — кодкө локтө вөлі меным паньд.

«Көин? — югнитіс юрын.— Көин! Мый нө вөчны? Бөр
Шожымлань кө бергөдчыны?.. Ог өд сиктөдзыс вонысө
удит! Öньө му кыр йылас и суас да вуз-ваз деритас...
Дерт, көин кө... А пон кө? Öд мир смек, час войын кө
кытчөкө мөда игөдчыны... И мый висьтала налы?.. Сьод
вуджөр аддзылі. Повзи? Пета на сэки серам выв став
Шожым вөлөстяс... Чаньясөс пө нин велөдны-пөкөритны
вын и сям тырмө, а кутшөмкө вуджөрысь повзьөма!» —
дыркодь сулалі, асьым, мый помнита, ичөтдырөс, челядь
кадсө тайө лунөдзыс бергөдла юрын.

Грездса челядь эг вөлөй коньөр кодьось... Нывка көть
зонка. Но юр пуктыны кутшөмкө көин водзын, мед укө-
дитіс менө, оломөс орөдіс — зэв эз көсйысьсы... Сэсса
юрө воис мөвп: «Паныдасьысьыс өд, дзебсис кө, ачыс
меысь полө. Сідзкө, меным и наступайтны колө!»

Гораа куті аскөд сёрнитны, быттьө ёна видча кодкө
вылө, муна аслам туйөд...

«Со, сійө, со-о! — Аддзи төлысь югөр улас коз пиян
сайын сулалысь сьод вуджөрсө. Понйысь джуджыджык,
станыс кузьджык... — Көин, гашкө да?»

Но өд миянладор вөръясын найө оз овны. Ошъяс эмось,
а көинъяс некор эз кывсьывны.

Медым повзьөдны локтысьсө, көть коді сійө эз вөв, куті
горзыны быд ногыс, аскөд сёрнитны, видчыны.

«Ак, тэ зверь, тэ зверина! — горза.— Он-ө тэ менө
сөйны көсйы?»

Ньөжйө, но пыр матыстча и матыстча. Синъясөн,
быттьө шылаён, быд сьөдтор бытшка, повзьөдны лок-

тысьсö кöсья. Пöрччи полёвка-сумкаöс, öвтча сійөн, юр гөгөр гартла.

— Сёйны менö кöсьян?! — аддзи коз пу сайысь зверсö.

Кöйн чеччыштис водзлань нöшта кыкысь да воши вöрас, пышйис либö сэнi и сулалö, ог тöд — кок шыыс тай оз кыв-а.

Некымын воськов бөрөн, а сэсся зэв тшöкыда бергалöмөн, мед мыш вылö оз гужелясь да голяös мед оз орöд, ньöжйö-ньöжйö кутi ылыстчыны повзёдлана местасьыс. Воськов сё сайын, дзик вöла туй дорас, вöли зумыд потш-майөгъяса картупель йөр.

«Сэтчöдз кö воа, сэсся спаситча, — бергалö юрын дорысыяна мöвп. — Чега зор да медым сэсся сöмын матыстчылö, юрсö поткöда!»

О господьöй! Туй шöрас быттьö ыжöс начкöмаöсь! Вöла туй южсö быттьö вирөн пожъялöма!

Пыр и гөгөрвои: руд рöзбойникыс Лыскоöс джагöдöма да гатшйöма. Лы ни ку абу кольöма...

Ок и ёна жö скöрми: вöралан понйös, школаö ветлан ёртös öд ад горшыс сёйöма! Кратш чеги ас кузя кымын сой кызта ён потш пом да котөрөн мунi кöинкöд паныдасян местаö. Ловсö эськö босьтi, но... Потш чегöмыс матигөгöрсö шызёдлiс, быттьö ружьеысь лыйöм шы. А сэсся мыйла зверыслы, пöt кынöм вылас, нöшта и ме ковми — пышйис, дерт...

«Лы-ы-ысö... Лыско-о-öй! Гортын тэ али абу?» — кевавлi жö звöз улö, но сэнi некод эз вöv.

Иганыс мяян — кык сой кызта майөг. Рытъя школаö мунтöдз, мед нин не садьмöдны гортсаясös, керсö напарьяөн писькöдi, гез пратьён көрталi иганлысь воссян помсö — сöмын лэптыштлы, и воссяс...

Школаысь локта час вой бöрын да ог кут игöдчыны, мамысь да чойлысь унсö пальöдны. Ачым восьта кильчö öдзöссö, чöv-чөлөн пыра керкаö, öзта карасина лампа, но мам, көть ог чуксав, садьмылö тай.

«Шыдыс пачын. Сёйышт да вод», — шуас да бөр ун-мовсяс.

А тайо войнас гортө бөрдөмөн пыри да эг сёянө кутчысь. Перйи шкапысь дрөб-порок видзан ящик да куті зарадитчыны.

— Мый нө лои, бласлө кристос? — повзис мам.

— Лыс-с-коос коин сёйөма! — шлюпгьяла-бөрда.— Аски көсья водзөссө косөдны, вөтлысьны сы бөрся кута...

— Господьо, господьо! Понтөг колин! — жалитө менө мам.

— Аски, мамө, вит час асылын чуксав! Бы-ы-ыть! Лөз-лөз югыднас на меным колө воштысьны Шөр гөп дорөдз. Муртса югдигас и кута трөпитны руд шпанасө, босьта на ме сылысь Лыскобысь водзөссө!

Мамлы чуксавны эз и ковмы менө. Эг өд и удит водлынысө да. Войбыд зарадитчи пуля-порок жалиттөг, патронташ тыр. И пуляа, и картеча, и дрөбья патроньяс тыр-мымөн лои. Зептө суйи компас. Сёйышті, пасьтаси, петны нин гортысь дась.

— Лунтыр кежлө өд мунап, босьтыштін-ө көть сёянтортө? — юалө.

— Эг-г...

— Мый тэ? Мый нө тэ? Жуялан өд! Яй тор да кыккуим көлөб тубырта, босьт... Жуялан, гортад он во... Код төдө, кытчө сійө тэнө нуодас.

Лөз югдөн на вои Шөр гөп дорө, кежи вөрас, коин кок туй вылө, мунышті километр кымын, видзөдлі компас вылө... Коин мунөма асыв-войвывлань.

«Рөдь нөвиналань сетчөма руд рөзбойниклөн,— артышті, кытчө кутө зверыс нырвизь.— Меным, артмө, кивыв... Од рытиввывлань, Айкиналань, Вомынлань кө сетчас, төдтөм вөрын ковмас вөтлысьны. Оти лунөн ог кый— воштысяс-пышгьяс. Сэтчөс вөрьясөдзыс өд гортсянь верст дас вит лоө, вывті ылын... Мед эськө асыв-войвывланьыс пыр и мунас, гортлань, миян грезддорса пармаө,— кевма думсьым да тшөкта:— Сэтчань и мун, сэтчань...»

Миша эрд кыр йывті зверыс бура и кочасьома: сетчылөма шуйгавыв, крута шыбитчылөма веськыдывыв, но туйсө, казяла, Рөдь нөвиналань кутө. Гөгөрвои тайос да веськыда сэтчань и куті мунны. И бура өд артыштсьома: көинлысь кок туйсө витысь вомөналі. Сэссия, веськыда кутіс мунны да, сылөн туй вывті и мөді вөтчыны...

Кынөм зэлавтөдзыс сөйөм зверь рытъя паныдасьланінсянь, дзик веськыдалөмөн кө, верст вит сөмын и мунөма узянінөдзыс. А өтарө-мөдарө шыблассьомнас — куим пөв унджык лоө. То шуйгавыв сетчөма, то бөр веськыдыввлань кежөма. Час куим, буди, дикъялі. Ветлөдлі-ветлөдлі да өтилаын бөр аслам лызь туй вылө петі. Первойсө эг эскы весиг: кодкө, мися, мөд вөралысь мунөма. Но бурджыка видзөдлі — аслам и мунсьома...

«А көні нө көиныс? Абу өд бордъя, эз лэб», — жугла юрөс, сюся кыйөдчөмөн лызь туй кузя муна.

И аддзи өд! Морөсөдз коз понөль сикас вомөн вывлань зыбнитчөмөн чеччыштөма, но бөръя кокъяссьыс гыжъяснас чиркнитыштөма лым туктасө. Кежи крута веськыдывыв да метр куим ылнаысь, посни пуяс сайсьыс, и аддзи туйсө...

Узьома зверыс зэв джуджыд кодзувкоткар вылын, мед сэтсысянь ылысьджык кылас и аддзас, мыйкө нелючки кө...

Менө кылөма, мый рытивыввсянь локта, да асывывыв, Рөдь нөвиналань, Митерас грездлань ыджыда сывкъялөмөн сетчөма. Кытшовтан лызьничаос восьсаинті, гашкө, метр нель кузяө чеччыштөмөн вомөнтөма да Гөрд шорө лэччөма. Чеччалөмнас пельөдзыс вөйласьө да, небось, латшиктөмө регыд вуджөма. Сідзсө оз вөйлась, лапаыс блюд пасьта да.

Ме лэччылі жө — гиблөй места: бадь тіль да нөшта пөрөм вылө — пөрөм, мунны ог вермы. Сійос и видзөд, мед лызьөй оз чег. А көинлы майбыр: леторосьяс косттыс кань моз чуکلялөмөн мунө, а увъя пөрөм пуяс вомөн улітыс кыссьөмөн либө вывсянныс чеччыштөмөн вуджө,

а меным колö пöшти быд пу кытшовтны. Увъя пуяс вылас лымйыс потшöс судта.

«Сю-усь! Тöдан, небось, мый татшöминтйыс мунигөн менö ылö бөрö колян и дзедьсынытö меысь кокныыд — комын воськолысь ылö водзсыыс тиль вöснаыс нинöм оз тыдав. Но и ме тэнö гөгөрвои, тöда: лун шөр лунö, кöть ньөръяв, вöла туй вылö он пет. Рöдь нöвиналань ныртö веськөдöмыд! — мөвпышти тадзи да шор бок яг вылас кайи. — Лыссы, лыссы, мудзтöдчы шорöдыс, а ме тэнö боксяныыд конвоируйтны кута. Пыр шортйыс öд он мун, коркö и берег вылас петан, шуйга берег вылас, кытй со ме муна. Сэки кутшöмкö эрд вылын и чолöмала тэнö, руд шпанаöс! Гөрд шорыс көрт туй вуджö. И тэныд сэтй ковмас вуджны! Петав эрд вылас!»

Час кымын козъя-пожöма ягтй мунй, көрт туй динö матысма. И сэки кылй паровозлысь тутöстөм, и зэв öд алысногаöс: «Тут-ту-ту-ту-у! Тут-ту-ту-ту-у!» — тадзи тутсöны сэки, кор кодкö туй вывсьыс оз кеж.

Мый вын вöлй, содтй öдöс и вои öд көрт туй динас поезд прöйдиттöдзыс.

— Кö-öин! Кöин! — горзö кочегарыс, Паш Коль. — Вötöд, Пашö, лый! Лы-ый!

Гогнитй юрөн: «Давай, давай! Öдйöджык прöйдитöй! — воча горза.

Көрт туй, а сэсся и Рöдь нöвина вуджөм бöрын, кöин вомöналöма ягсö да лэччöма Степ шорö. Вуджалй сййöс — зверлөн мөдарас абу кайöма, а бара шор кузяыс вывлань мунö. А тайö шорыс Митерас грездлань йывнас сетчö, — бара меным кивыв.

Кайи берег вылас, кузь вöраинас, кöин бöрся сэтй муна, гортлань нырөн. Котөрта верст джын, лэччыла шорас, видзöдла, мунöма-ö кöиныс, да бара, мыйта вынöй да сямöй судзö, водзö уськөдча вötчыны. Чужөм вылысь, сьылйысь ньылöмыс шорөн кутас лэччыны, сувтыштла, мыссьышта лымнас да бара сүödчыны босьтча.

Километр квайт тадзисö муні, шорас, гашкö, дасысь лэччылі — мунö водзын, но ог тöд, ылын-ö — шыыс оз кыв, вуджортчöмсö эг жö аддзыв. Гашкö, ылын, а гашкö, и матын. Поездыс, дерт, ёна манитіс, а öні со пемдö...

Степ шорсянь гортöдз — верст кык.

Юышті соддзөн кынмывлытöм шорсьыс васö, кигуг öвтышті кöин вылö и мöдöдчи гортö... Град йөръяс горулö вои...

Но мокойö! Кöиныслөн вөлöма тай наянлуныс! Град горувъясті, колö жö, туйöс и вуджöма. Пемыд нин. А пемыднас нö кутшöм кыйсьöм-туясьöм артмас. Гортö колö мунны.

Немторйөн ошйысьтöг висьтавлі гортын кöин бöрся лунтыр вöтлысьöмöс.

«Но и пөръявліс, но и пөръявліс!» — скöрала думысь. — Аски, мамö, чуксав югдытöдзыс на... Йөръяс горувтыд öд кöиныс Шожымкалань сетчöма...

Сёйи-ö эг-ö — паччөрö и усыртчысьсöма тай...

— Пашö-ö, Па-а-шö! Тшöктылін, да чуксала? — тöрмөшитыштіс мам.

— А-а-а! Л-л-лыс-ко-ö-öс! Счас! Счас! — здукөн паялі.— Сейчас чечча,— шуа, но мудз абу на прöйдитöма да мам мöдысь чуксаліс.

— Кытчö нö эськö талун мунан? Кытысь мöдам корсьны лысьöмтö? — тököтьö оз и бöрд мамöй пажын тубрастор гартігас.— Ас вылад кö уськөдчас! Косявлас кö! Коді, кытысь и корсяс?!

— Оз ков менö корсьны! Ме сійöс, Лыскоöс сёйысьöс, виа!

Кöин пинь улö, смерть корсьöм вылö, кöть и дасьтіс мам сёянтор, оз вöлі лэдз...

— Öвсьы, öвсьы, пиушко... Асьтö зверыс öд сёяс-калечитас, кытысь корсьнысö кутам? Ойя да ойя! Коді нö сэсся горт гөгöрын чера уджсö вöчны ку-у-тас?

— А эсійö кодды! Кöрт стволыс! Не-е-е-бо-ось! Медым сöмын аддзылöм выйöдз матыстчыла — зверсö бöжсянныс юрöдзыс камöда, пожйö вöча, скарעדьöс!

Митерас грезд водзладорті, верстыс оз ло,— леспром веськыда Айкинаö трактора тöвся туй пискöдіс. Кор вöрыс чукöрмыштас, сэки лэччöдöны öтчыд-мöдысь. Сэтчö ме и муні. Кöин, сэтчань ныра да, быть вуджас сійö трактор туйсö. Оз нин, майбыр, чеччышт — матö сизим сыв пасьтаыс...

«Он небось пöръяв менö, вуджин кö трактор туйсö».

Лэччи катыд шор туйöдз, искофта кöинлысь туйсö во-мöнавны.

Кытш вöчи: «Дивö тай — зверыс, эз кö грезд пыр прöйдит — öкладын!» — пöсьö шыбитліс...

Öдйö, кыдзи кокъяс лызьясöс сывкйöдлöны, кöинлөн рытъя кок туй кузяыс мöдöдчи... И мый? Бара öд кытш ковмис вöчны... А вужлявивса тукта вылын и узьöма кöиныс...

Ёсь пельяснас, дерт, кылö менö, ружье мавтасыс да стволсьыс сотчöм порок дукуыс чамгö нырас. Лёкинті, ёна лёкинті менö новлöдлö, но ог кольччы сыысь. Öтилаысь аддзылі ситсö — руалö на весиг вöлі. Сідзкö, уна вылö, верст джын водзын меысь котöртö, гашкö и ёна матын-джык. Тшем вöрсьыс, водзысь, мыйта тыдалö, быд пу колас синмала, но зверсö некытысь ог аддзыв.

Шондіыс лун шöр петкöдлö — кöинлөн кок туйыс менö Ванюк туй вылö петкöдіс. Сэті Шожымка видзьяс вылысь вöлаяс колхозлы быд лун турун лэччöдлісны колхозö. А на бöрся, дерт, и понъяс, гырысь и посни, вöтлысьöны. Вöла туй вылас гыж туйыс тыр. Тöдмав сэтысь, коді понлөн, а коді кöинлөн? Шожымса Пельтöм Ёгорлөн Бускоыс — быд лун жö ветлöдлö — ар джынъя кукань ыджда, лапаыс блюд пасьта, гыжъясыс чаль чунь кузяöсь. Гашкö, сійö гырысь гыж туйяссö коляліс?..

Öтарö ветлі, мöдарö, а сэсся туй кыр йывладорас вöрас пыри, туй пöлöныс мунышті да аддзи öд зверь кок туйсö.

Бара куті кӱин бӱрся вӱтчыны. Но менам корсысиг-дикъ-ялӱгкості сійӱ эз узь, ылӱ водзӱ удитіс воны. А кӱин, кыдзи и воддза лунас, туй юж вывсяньыс бара коз-пожӱм понӱльяс вомӱн чеччыштӱма, гашкӱ, куим сыв ылнаӱ, но тайӱ пӱрйӱ гыж туйсӱ тукта вылас абу кольӱма. И бара заводитчис пышгьялӱм-вӱтлысьӱм...

Шожымка видзьяслань зверыс сетчӱ, казяла, но тӱда: нем сэн вӱчнысӱ — ни сикт, ни грезд, а репасысь кӱ, сӱмын ручлы тар-сьӱла-дозмӱрыс вичмывлӱ гежӱда, но оз кӱинлы. Найӱ ӱд сюсьӱсь жӱ, юрныс дона жӱ.

Кӱин бӱрся дугдывтӱг мӱд лун нин вӱтлыся. И зверь тайӱс кылӱ и тӱдӱ, дерт, да мынтӱдчыны меысь кӱсйӱ...

Котрӱдлі кӱинӱс пӱшти сап пемыдӱдз. Казяла, дзик шойччышттӱгыс зверыс и мудзӱма, и тшыг: лымсӱ апалӱсӱйӱ — вынсӱ содтӱ. Рыгьявылыс вӱла туй кузя километр кык мунӱма, вӱрас сюсявтӱг нин кежӱма да вель ыліті воча нин меным Туй выв йӱнӱдӱдз локтӱма, а сӱсся войвыв, Микуньлань сетчӱма... Тӱді кӱ эськӱ! Ок!

Бара сап пемдіс. Мудзсӱ гортӱ ӱдва вайнысӱ верма. Но ӱд и кӱиныс мудзис. Сӱсся ме ӱд пӱт, а кӱиныс кык лун нин сӱйлытӱм. Кор нӱ сӱяс? Лунтыргьясӱн, медем кучиксӱ ог пӱрччы, пышйыны колӱ, а сы бӱрын, мудз кокъяснас, кутшӱм нин кыйсьӱм. Сідзкӱ, колӱ чайтны, лунысь-лун жӱ и усьӱ эбӱснас кӱиныс.

— Ойя, пиӱй, да ойя! — жалитӱ менӱ мам. — Висьӱм корсян, мудзтӱ чукӱртан... Ой, ой, ой!

— Мудзис ӱд и вир пузьӱдысьыс, тшыгмис, жуяліс... Талун Туй выв йӱнӱд кыр йылӱ пемдім... Узьмӱдчас. Аски быть вӱтӱда. Ог ло морт, ог кӱ Лыско вӱсна водзӱссӱ косӱд... Чуксав аски водз-водз, мед пемыднас на кок туяс вои...

...Коймӱд лун. Рыгья вӱтлысянінӱдзыс, поводдяыс небзьыштіс да, шыч-рач вои. Дыр на и югдӱмсӱ ковмис виччысьны. А сӱсся и кӱин кок туй вылӱ пыри...

Куим кытш вöчöма. Пыралöма-петалöма аслас туй вылас... Артмö: ме сюсьма, а кöиныс — куим пöв на меысь тölкаджык!

Кад серти кö, час джынйöн, эз кö унджык, менö и сийö асывнас пöръялис. Сидзкö, бара на миян костным вель ыджыд, да кузь лунтыр вöтлыси. Бөръяпомас кöин, ёна ылöдчытöг-шыбласьтöг нин, шор ковтысö пыралöма да весьшөрö мудзтöдчöма, а ме весьтасали лёкинсö да öти яг помын и аддзи мышсö.

Колö, дерт, вöли пуля вежны, но пöсьйывсьыс вунöди: картечöн лыйсис...

Кытысь нö! Эз, тыдалö, и во кöинöдзыс зарадöй. А сийö тай — скачöн да скачöн, а сэсся тиль-öтрöстель пыр, кыз чардби, лыйыштис... Эм тай выныс, он на сүöd!

Удитис öд, морыд! Бара на, коймöд лун нин, кöин кучиктöг гортö локти...

— Волкуйтö кöиныс! Асывнас чеччас, сувтас бөръя кокъяс вылас да кодарö тушаыс нёровтчас, сэтчань и прöмыс вылас мунö,— кыськö кывлöм притчасö висьталö мам.— Эновтчы асьтö песöмысь, Пашö, эновтчы-ы, пиöй! Волкуйтöм вöснаыс жö, шулöмаось, и пуля улас оз сюрöдчы.

— Волкуйтас? Оз-ö! Зэв ылын вöли... Йöйяли тай. Ещö эськö вöтчыштны да пуляөн... Туйыс öни сылөн — бөр пышйыны кывтыдлань. Аски бара на котралыштам... Сюсь, вывти сюсь, но мыйöкö и менö велöдыштис нин... Видзöдлам нöшта аски: кодным — кодöс.

А аскинас ёна видзöдлынысö немтор нин вöли. Поводдяыс вежсьöма: шондöдöма ёнакодь, лым усьö да турöбалö на нöшта. Но босьтчöма да, нем вöчны, кöин бөрся вöтлысьны нельöд лун дорыв пета. Ог тöд, кöни кöиныс, да югдыштöм бöрас пывсян дорö, ас лызьнича вылö и локти, мед сэтысянь, аслам рытъя кок туйсянь, босьтчыны зверсö корсьны... А кöиныс, но и сюсь, но и сюсь! Абу öд вöла туй вылö петöма, кöть войнас и позис, абу, небось,

ветланінад сетчōма, а веськыда, сиктсянь верст кык
войвылō, менам лызьнича вылō локтōма да, вōрас унаысь
пыралōмōн, сэтись бōр петалōмōн, менам туй бокōд пыв-
сян дінōдз со волōма. Сэссия, воштысьнысō дзик нин не-
кытчō да, ыджыда, гашкō кык сыв лō, чеччыштōма-во-
мōнталōма менсьым туйōс. Повзьōдлана кытшысь мынōм
бōрын, зверь чуклявтōг нин уттьōма-кульōма бōр Шо-
жымлань.

Миша эрд вывтї, скōтōс начкан бойня боктї, сэтчō ке-
жавтōг, дерт, сетчōма рытивыв, кытысь, тыдалō, и волїс.
Сїдзи и пышйис-воштысис меысь руд гōна рōзбойникыс,
эз сет пōрччōдны ассьыс шоныд пасьсō. Лыско вōсна
водзōссō сылысь лои босьттōм.

Оз весьшōрō вōлōм шуны: «Кōинтō кокыс вердō». Збыль, вердны — вердō, да нōшта и юрсō видзō.

ЮРИНДАЛЫСЬ

- 5 Бурдодысь дзоридзьяс
- 8 Вёрса кань
- 11 Парма-мамлөн пиян
- 17 Модялөн көч
- 24 Выль чой-вокъяскөд
- 27 Сёй, ошкөй, сёй...
- 35 Пыж пу
- 39 Шуд вайысь лэбачьяс
- 45 Ручпи
- 49 Дудысь вөв
- 60 Роза
- 65 Лыско
- 77 Юктөм кыйдөс
- 81 Горшасьёмысь лекарство
- 91 Пос
- 107 Нима дадь
- 114 Аслад челядыд жальёсь
- 119 Босьттөм водзөс

Для детей младшего
и среднего школьного возраста
Литературно-художественное издание

Одинцов
Алексей Серафимович

ПАРМА — МАМА-КОРМИЛИЦА

Рассказы на коми языке

Редактор *А. В. Тентюков*
Художник *Е. В. Сухарева*
Художественный редактор *Г. Н. Шарипков*
Компьютерная верстка: *А. В. Кетова, В. В. Осипов*
Корректор *Н. Ф. Габова*

ЮРИДАЛИСЬ

- 5 Бухарин П. И.
- 6 ...
- 7 ...
- 8 ...
- 9 ...
- 10 ...
- 11 ...
- 12 ...
- 13 ...
- 14 ...
- 15 ...
- 16 ...
- 17 ...
- 18 ...
- 19 ...
- 20 ...
- 21 ...
- 22 ...
- 23 ...
- 24 ...
- 25 ...
- 26 ...
- 27 ...
- 28 ...
- 29 ...
- 30 ...
- 31 ...
- 32 ...
- 33 ...
- 34 ...
- 35 ...
- 36 ...
- 37 ...
- 38 ...
- 39 ...
- 40 ...
- 41 ...
- 42 ...
- 43 ...
- 44 ...
- 45 ...
- 46 ...
- 47 ...
- 48 ...
- 49 ...
- 50 ...
- 51 ...
- 52 ...
- 53 ...
- 54 ...
- 55 ...
- 56 ...
- 57 ...
- 58 ...
- 59 ...
- 60 ...
- 61 ...
- 62 ...
- 63 ...
- 64 ...
- 65 ...
- 66 ...
- 67 ...
- 68 ...
- 69 ...
- 70 ...
- 71 ...
- 72 ...
- 73 ...
- 74 ...
- 75 ...
- 76 ...
- 77 ...
- 78 ...
- 79 ...
- 80 ...
- 81 ...
- 82 ...
- 83 ...
- 84 ...
- 85 ...
- 86 ...
- 87 ...
- 88 ...
- 89 ...
- 90 ...
- 91 ...
- 92 ...
- 93 ...
- 94 ...
- 95 ...
- 96 ...
- 97 ...
- 98 ...
- 99 ...
- 100 ...

ЛР № 010039

Сдано в набор 10.07.96. Подписано к печати 10.12.96.
Формат 60x84^{1/16}. Бумага офсетная. Гарнитура «Балтика».
Печать офсетная. Усл. печ. л. 7,9. Уч.-изд. л. 5,7.
Тираж 1000. Заказ № 678.
Коми книжное издательство.
167610, г. Сыктывкар, ул. К. Маркса, 229.
Отпечатано в Кировской областной типографии.
610000, г. Киров, Динамовский пр., 4.

8p





